


# Tables Anatomiques

Q V E S D V C O R P S

humain vniuersel : soit de  
l'Homme, ou de la

Femme,


ex libris  signory

*Premierement composees en Latin, par  
maistre Loys Vassée : Et depuis tra-  
duites par maistre Iean Canappe.*



72,040

A LYON,  
PAR IEAN DE TOURNES.  
M. D. XLVII.





# M A I S T R E

I E A N C A N A P P E

Docteur en Medecine au  
Lecteur Chirurgien  
Salut.



E mest vne chose assez persuadée, quil est impossible de satisfaire aux affections de tous, iouxte la sentence d'Horace : lequel quelque fois auoit inuité trois personnes seulement à vn banquet : neantmoins chacun d'eux auoit diuers goust, & appetit, tellement que ce, que lun appetoit, lautre auoit en horreur. Semblablement auiourd'hui lun ha en bonne reputation les labours d'autrui : les autres au contraire nen peuuent bien dire, ne estimer. Les autres par vne certaine malice, & affection de contredire en parlent en mauuaise partie, iagoit que leur iugement interieur soit autre. Et à ce propos me souuiet dun passage de

laſtuce,  
r cau -  
lle de  
mours.

Galien au liure de la raiſon , & maniere  
de guerir par phlebotomie , diſant ainſi.  
Certes laſtuce , & cautelle des ſophiſtes  
eſt bien digne deſtre haïe: leſquelz iaçoit  
quilz ſachent bien , quilz ſoient menton-  
giers, nonobſtant par vne certaine malice  
ilz afferment tout au contraire: ce quilz  
font ou pour vne curioſité dinuéter cho-  
ſes nouuelles, ou pour acquerir vne vaine  
ſapience, ou pluſtoſt vaine gloire. Toutes  
fois ſi ne fault il pas deſiſter de tyrer au  
but , & ſcope , qui nous eſt propoſé : ceſt  
vne fin , pour laquelle toutes choſes ſe  
font, & par qui toutes choſes ſont approu-  
uees, & à laquelle il neſt poſſible de par-  
uenir ſans les elements, & principes. Or la  
fin de lart, que nous pretédons, eſt de gar-  
der la ſanté, & de guerir les maladies: à la-  
quelle nul ne peult paruenir , ſil ne ſçait,  
que ceſt ſanté , & maladie. Et pource que  
toute ſanté , ou maladie conſiſte , ou aux  
parties ſimples , ou aux parties organi-  
ques, ou eſt commune à icelles , il ſenſuit,  
quil fault cōgnoiſtre leſdites parties. A la  
congnoiſſance deſquelles nauons aucune  
voye , ny adreſſe ſinon par lanatomie.  
Ceſt donc vne choſe aſſez demōſtree, que  
lanatomie eſt neceſſaire à tout homme,  
qui veult faire profeſſion en medecine.  
Car par elle nous congnoiſſons la ſub-  
ſtance,

stance, la magnitude, le nombre, la figure, la situation, l'utilité, & l'action de toutes les parties. Par l'ignorance desquelles choses, quand vn nerf est incisé, ou vn muscle, il aduiant aucunesfois, que le sentiment se perd, aucunesfois le mouuement, & souuentesfois lun, & lautre, & qui plus est, bien souuent la mort sensuit. Chacun voit donc la grâde, & necessaire vtilité de lanatomie: laquelle si elle est requise en aucun, cest principalemēt au Chirurgien. Et combien que la chose soit assez attestee, toutesfois ie allegueray encores ce petit mot digne de memoire, que dit Guidon de Cauliac: Ainsi comme laueugle, qui trenche du boys, tousiours, ou souuēt erre, en trenchant diceluy plus, ou moins, quil ne doit: ainsi fait le Chirurgien, quād il ignore lanatomie. Mais tu pourras obiecter, que le Chirurgien n'ha que faire de sçauoir, que cest santé, ne maladie, ne la cōposition du corps humain; & quil luy suffist d'inciser, de cauterizer, & exercer semblables opérations manuelles: ie te respondz ce, que i'ay desia dit, que nul ne peult garder santé, ne guerir maladie, sans cōgnoistre lun, & lautre, & quil nest possible cōgnoistre ne lune, ne lautre, sans entendre la nature des parties. Ie dy dauātage par lautorité de Cornelius Cel-

fus, que toutes les parties de medecine sont ainsi coniointes ensemble, qu'on ne les pourroit totalement separer: mais elles preunent leur nom de la chose, en quoy elles consistent le plus. Ce considerant, cestasçauoir les principes, aussi les moyens pour paruenir à ceste fin, me suis mis en mon deuoir de traduire selon ma petite capacité aucuns liures plus pour le profit des Chirurgiens, que pour le mien: & principalement ces quatre tables prin-  
ses, & mises en bon ordre de plusieurs lieux des bons auteurs, & principale-  
ment de Galien: esquelles est contenue toute lanatomie du corps humain. Pour-  
ce que nous nauons point danatomie en nostre langue assez ample, & suffisante: ains mutilée, imparfaite, & souuentesfois mal consonante à verité. Pourquoi nous deuons beaucoup à l'Autheur dicelles, qui les ha amassees, & redigees en si bon ordre: en confessant, que par luy auons aucun profit. Et combien que ie nensuy-  
ue pas du tout lordre, quil tient en ses fi-  
gures, ce nest pas pour deroguer à sa maniere de doctrine, mais pour donner encores plus facile, & claire intelligen-  
ce aux Lecteurs rudes, & mal exercités en telles diuisions: lesquelz pourroient souuentesfois prendre vne difference, ou  
espece

espece pour laurre. Et pour obuier à cest erreur, elles sont notees par leurs nombres. Priant au Lecteur de perseuerer en diligence, & continuel estude de bonne doctrine: & ie perseuereray aussi de ma part ( Dieu aydant ) à poursuiure autres matieres, sans lesquelles le Chirurgien ne peult estre parfait. Lequel labeur ie poursuiuray, tant pour passer le cours de la vie en choses honnestes, & vertueuses, que pour aussi suruenir à lignorance des ignorans. Et à telz iecris, & pour telz ie trauaille, non pour les doctes, & sçauans, qui nont aucunement affaire de ce mien effort. Toutesfois ie croy, quil ny ha sçauant, ou docte, qui ne trouue bonne ceste mienne entreprinse, attendu la fin dicelle, qui est de profiter au public. Or donc, Lecteur, quiconques fois, prens en gré le vouloir honneste de celuy, qui ne desire, que ton auancement, & laugmentation de ton sçauoir, & te ietter peu à peu des tenebres dignorance: ignorance indigne de tout homme genereux, & bien nay: laquelle deuons autant, ou plus, fuir, que la mort. Car lhomme ignorant nest autre chose, que vne mort viue: de laquelle tu seras exempt en acquérant le contraire de si laide chose: qui

est sçauoir, & intelligence des bonnes  
doctrines. Adieu Lecteur. De

Lyon ce premier iour de

Iuillet, Lan de

Salut,

N. D. XXXXI.







# Tables Anatomiques

Q V E S D V C O R P S

H V M A I N V N I -

V E R S E L . .



## TABLE PREMIERE.



A composition, & construction du corps humain est (selon l'opinion de tous Medecins excellens, & approuvés en cest art) diuisee communement en quatre parties, grâdes, & principales. Lesquelles parties (le tout bien cherché, & considéré diligemment) sont celles, qui sensuiuent: cest a sçauoir,

1 La teste	1 Caput	1 Cephale
2 Le thorax	2 Thorax	2 Thorax

*En Latin, En Grec,*

2 Le ventre	3 Venter	3 Gaster
4 Les extremités	4 Artus	4 Cola

La teste, laquelle, selon aucuns est appelée

a s pellee

pelée le ventre supérieur, est finie là, où commence le col. Et contient les parties animales.

*Apho.*  
*lib. 7.* Le thorax, lequel est aussi appelé le ventre moyen, & aucunes fois est dit le ventre supérieur. cest ce, qui est circonscript, cest adire limité, depuis les clavicules, ou iugules, iusques au diaphragme, par les costes, du costé, & dautre. Et contient les parties vitales.

Le ventre inférieur, auquel les parties naturelles sont contenues, est depuis le diaphragme, iusques à loz du penil, dit os pubis, ou pectinis.

Les extrémités, ce sont toutes les iambes, & les mains. Or premieremét il faut parler du ventre inférieur, pource quil doit estre le premier anatomizé,

*Des parties superficielles du  
ventre inférieur.*

*Apho.*  
*lib. 2.* **L** Epigastre, cest adire le lieu, qui est dessus le ventre, & quasi le ventre superficiel, dit en Grec epigastriou, en Latin abdomen, & en Arabic mirach, est diuisé en ces trois parties: cest asçauoir,

- 1 Les hypochondres, en Latin præcordia, en Grec hypochondria.
- 2 Les parties, qui sont enuiron l'ombilic.
- 3 Et le ventre inférieur.

Lombilic

Lombilic en Grec omphalos, & en Latin *Ex intre*  
 umbilicus, est comme la racine du ventre, *duft. sen*  
 tenant le mylieu de tout le corps. Le cuyr, *medic.*  
 qui lenuirone, est en Grec nommé græa, en *Et Ari-*  
 Latin anus, ou vetula, cestadire vne vieil- *sto. cap.*  
 le. Les parties enuiron l'ôbilic sont deux. *13. libr. 7.*

1 Dessus lombilic.

*de histor.*

2 Dessoubz lombilic.

*Animal.*

Les parties dessus lombilic.

1 Les parties laterales, de costé, & d'au-  
 tre, au dessoubz des costes nothes, ou  
 faulſes, gisantes sur le foye, & sus la ra-  
 telle, sont appellees præcordia selô Cel-  
 sus. Les Grecz les appellent hypochon- *Celsus*  
 dria, pource quelles sont soubz la carti- *lib. 4.*  
 lage, quilz appellent chondros. Or il y  
 ha deux hypochondres, cestasçauoir le  
 dextre, & le fenestre. Aussi les viscères  
 interieurs sont appellés hypochondria,  
 pource quilz sont soubz les cartilages  
 des costes nothes. Pline dit, que ce, que *Plin. cap.*  
 les Grecz appellent phrenes, sont ditz *37. lib. 11.*  
 præcordia en Latin, d'autant quilz sont  
 tenduz au deuant du cœur.

2 L'espace moyen entre les hypochon-  
 dres, est appellé epigastion, selon au-  
 cuns.

La cauité commune aux hypochondres,  
 & aux Flancz, ditz Ilia, est appellee cho-  
 las selon Aristote, & selon Gaza, cholago.

Les

## Les parties soubz l'ombilic.

- Initio cō-  
mēt. lib. 2.  
prognost.*
- 1 Les parties laterales sont appellees en Latin Ilia, & en Grec lagunes. Cē sont les parties iouxte loz dit Ischion : lesquelles en Frāçois on appelle les Flācz.
  - 2 Les parties vuydes entre la derniere coste du Thoraz, & loz Ilium, esquel-les parties vuydes est lintestin dit ieiunum, & mesenterion, & les subtilz intestins, sont appellees ceneones, & laparæ selon Galien.
  - 3 L'espace moyen entre Ilia, iusques au penil, est appellé en Grec etron, & hypogastrion : en Latin Sumen, & Imus venter. Duquel la derniere partie est dite en Grec ephēbæon, ou epision : & en Latin pubes, ou aqualiculus.

## Du cuyr.

- Gal. lib. 2.  
de usu  
part.*
- L**E cuyr couurant tout le corps, est appellé en Latin cutis, & en Grec derma, pourtant quil peult estre excorié : car derestai est vn verbe Grec, signifiant excorier. Le cuyr est different selon les parties. Car il est impossible dexcorier le cuyr de la palme de la main, de la plante du pied, du frôt, & quasi de toute la face,
- Gal. lib. 3. & 14.  
metho.*
- & daucunes autres parties, à cause des tendons, & muscles implātés en icelles parties. Cest le vray cuyr, duquel lexterieur superficie

perficie. quasi comme vne defloration, est nommee en Grec epidermis, cestadire supreme cuticule, laquelle ne ha point de sentiment.

Au dessoubz du cuyr y ha vne membrane, dite en Grec hymen : On lappelle vulgairement pannicule charneux. Par laquelle passent les veines nourrissants le cuyr : aussi par elle passent les Fibres nerveuses produites des nerfz des parties subiacentes à tout le cuyr, & donnans le sentiment. Par la traduction, & passage dicelles fibres le cuyr est aussi connexé, & lié avec les parties subiettes, ou subiacentes, cestadire situees au dessoubz.

### *De la gresse.*

**L**A gresse, en Latin adeps, en Grec pimele, ne requiert en aucune chose auoir nerfz. Laquelle est infuse en maniere dhuile grasse, aux parties membraneuses, & nerveuses : à fin de les humecter tousiours de gresse naïue, en tant quelles sont seiches. Icelle gresse est engendree de la plus grasse partie du sang, affusée, ou affluente par les subriles veines. Laquelle se congele, quand elle est coniointe avec les particules froides, & exangues, cestadire, non sanguines. Parquoy ceux, qui sont froids de nature, ont beaucoup de gresse.

Mais ceux qui sont chaulds de nature , ne en ont point,ou bien peu.

*Des muscles de lepigaſtre.*

*Gale.lib. 3. de uſu part. et de Anato. ad miniſtra. et de locis aff. cap. 5.* 370 **E**N apres apparoiſſent les muscles de lepigaſtre, leſquelz ſont huit : quatre de chacun coſté, egaux en magnitude, & nombre , & ſemblables en ſituation de fibres: tellement que lun neſt ny inferieur, ny ſuperieur à lautre. Ceſtaſſauoir,  
 4 Quatre obliques, tyſſus, & composés de vilz , ou fibres obliques : deſquelles loſſice eſt retenir ce, qui eſt cōuenable. Dont les deux premiers naiſſans de la ſixieme, ſeptieme, & huitième coſte, & principalement de la ſixieme , deſcendent aux os Ilium. Les deux autres diuiſent les deux premiers, à la ſimilitude de ceſte lettre Grecque,  $\chi$ , montans depuis Ilia, iuſques aux coſtes.

2 Deux droitz eſtenduz ſelon la longueur du corps , charnus , naiſſans den hault , de chacune part de la cartilage en ſiſorme (dite en Grec xiphoides, vulgairement málum granatum) par le mylièu du ventre : deſcendent aux os du pénil ; & illec ſe attouchent lun lautre. Leſquelz ont fibres droites deſcendentes du hault en bas : deſquelles loſſice eſt de attirer. En la partie interne de ces  
 muscles

muscles il y ha des veines, lesquelles procedent des muscles de os sacrum, en ceux cy, & montent en hault. Et puis se assemblent avec les extremitez des veines descendentes par le Thorax, aux hypochondres. Et dune mesme racine par- *Gal.li.de*  
vient vne veine, de chacun costé, ius- *dissec. 1<sup>re</sup>*  
ques à la matrice. Par lesquelles veines *natum.*  
les mamelles principalement communi-  
quent avec la matrice.

2. Deux transuersaux couurent tout le peritoyne, de toute part: lesquelz nais-  
sans de la droite ligne de l'os Ilium,  
& des laterales apophyses des verte-  
bres lumbales, font vn angle droit, a-  
uecques lesditz deux muscles droitz. Et  
sont tissus de fibres transuersales, des-  
quelles l'office est de expellir ce, qui est  
estrange.

Or nous declairerons toute la compo-  
sition du muscle en la quatrieme table,  
là où nous parlerons des muscles des ex-  
tremitez.

Laçoit que nature ayt fait les muscles de *Gale.lib.*  
lepigastre pour estre propugnacle, c'est-à- *s. de usu*  
dire muniment, & deffense des parties *pari.*  
subiettes: aussi pour estre instruments de  
lexcretion, cestadire expulsion des super-  
fluités, ou excremens: neantmoins elle  
en abuse à la generation de la grande  
effla

efflation, & de la voix ; & aussi à l'enfantement , & dauantage à la retention de l'air, laquelle Praxagoras appelle en Grec pneumatos catalepsis.

*Du peritoine.*

*Gal. li. 5.  
de Anato.  
administ.  
Or 4. de  
usu part.*

**L**E peritoine , en Grec peritonæon, en Arabic siphac, cest vne mēbrane fort subtile ; mais toutesfois bien forte, & ferme, semblable aux larges toiles des araignes. Et est vne partie entieremēt simple, toute continue à soy. Et s'appelle peritonæos tunica, seu membrana, à cause quelle est tendue à lenuiron de tous les visceres, intestins , arteres, veines, nerfz , vescie, matrice, & de toutes les parties du ventre inferieur , les seruāt de tunique. Et ha son nom, & etymologie dun vocable Grec peritetoniēni, cestadire, tendu à lenuiron.

*Gal. 4. de  
usu part.*

Les vtilitēs du peritoine sont plusieurs: cestasçauoir cinq,

- 1 La premiere est, quil couure toutes les parties subiettes, comme le vētricule, les intestins, & les visceres, lesquelz sont des soubz phrenes, cestadire dessoubz le diaphragme, ou septum transversum.
- 2 La seconde , quil diuise , & separe les parties dessusdites dauēc les muscles gisans exterieurement : de peur, que quelque fois aucun des intestins subtilz ne tombe



tombe aux espaces, qui sont entre ces muscles: lesquels intestins filz pressent, & sont pressés, ilz estraingnent, & sont estraints: se ilz font douleur, & soyent dolents, ilz empeschent les mouuemens desditz muscles, en sorte, que à grande difficulté pourront ilz expéllir en bas les excremens.

3. La tierce, à celle fin, que les excremens du nourrissement descendent plus tost. Car le peritoine tendu tout à l'entour de toutes les parties internes, se assemble par ses extremités superieures, iouxte la poitrine, & les costes nothes, avec le diaphragme aydant au mouuement du ventricule, & des intestins: lequel mouuement presse de toute part. Car par le peritoine, & le diaphragme, comme si cestoyent deux mains vnies ensemble en hault, & distantes l'une de l'autre en bas, les superfluités de la viande contenue au mylieu, sont pressées, & poussées en bas.

4. La quarte, à celle fin, que il serre, & estraingne toutes les parties dessusdites, comme vne couuerture tendue exactement tout à l'entour: de peur que le ventricule, & les parties prochaines à iceluy, ne soyent promptement surprises de ventosités.

5 La quinte , à celle fin , que toutes les parties situées au dessous du diaphragme, ayent colligance par le peritoïne, & que vne chascune dicelles parties soit particulièrement couuerte de luy, comme dune peau.

*Gal. li. 1.* Or le peritoïne est pertuysé dune part, *de semine* & dautre: iouxte les aynes ( que les *La-*  
*Co. 6. de* tins appellent inguina, & les Grecz bubo-  
*Anato.* nes) en icelle region, ou les vaisseaux sper-  
*administ.* matiques descendent aux testicules, ou genitoires.

*De epiploon, ou omentum.*

*Gale. lib.* **E** Piploon, ou epiplon en Grec, en La-  
*4. de usu* tin omentum, en Arabe zirbus, les  
*part. et 6.* Anciens lappelloient rete, cestadire vn  
*de Anato.* fillet. On lappelle vulgairement en Fran-  
*administ.* çois la coëffe. Il est composé de deux tuniques produites du peritoïne, denses, & subtiles, gisantes lune sur lautre. Et de plusieurs arteres, & veines, avecques beaucoup de gresse. A celle fin, que il entretienne le ventricule, au fond duquel gist, & par maniere de dire, il nage dessus: dont il ha prins son nom, car epiplei en Grec signifie autant, comme nager sus. Aussi à celle fin, que il garde la chaleur naturelle, au temps de necessité de famine.

ne. Il est estendu bien long sur tous les intestins, pour ayder à leurs concoctions, lesquelles sont grandement imbeciles, & debiles. En aucuns animaux il ne consiste pas beaucoup deffoubz loimbilic: en dautres il descend iusques aux os du penil, nommés ossa pubis. Sa figure represente vne gibesiére, ou vn petit sac, ou vne besace. Entre les animaux, les Hommes, & les Singes lont fort grand: & pourtant plusieurs hommes sont appellés souuentefois epiploocomistæ en Grec, & en Latin omentigestores cestadire, qui ont grand epiploon, ou omentum.

### *Des intestins.*

**L**Es intestins, en Latin intestina, *Gale.lib.* En Grec entera, sont composés de 4. et 5. de deux propres tuniques, lesquelles en *usu part.* Grec sont dites chigones, pour deux *causes.* 6. de

*Anato.*

1. La première, à celle fin, que leur faculté, & vertu expultrice soit plus forte.
2. La seconde, à celle fin, que ilz soyent plus asseürés de toutes iniures, & dommages.

Les deux tuniques des intestins sont dissemblables, & différentes à celles du ventricule.

1. Car la tunique intrinseque des intestins est plus charnue.

2. Et lextrinseque est plus mēbraneuse.

Ces deux tuniques sont tissues de fibres transuersales seulement. Pource, que les intestins ne ont eu besoing, que dun simple mouuement, car il ne leur estoit point necessaire de attirer, ny de retenir, mais seulement de expellir, en se retirant de toute part. Toutesfois aucuns intestins, & principalement les gros, ont quelques fibres droites, estendues en long, pour la tutelle, & deffense des fibres transuersales, comme le droit intestin en ha plusieurs telles. Oultreplus les intestins ont vne autre tierce tunique, du peritoine, comme ha le ventricule. La nature de tous les intestins est vne mesme, sinon que elle est diuerse en magnitude, & au nombre des reuolutions, ou anfractuosités.

*Gal. ibi.* Les intestins sont en nombre fix, c'est-à-dire. & ca. sçauoir,

1. lib. 6. de 3 Trois subtilz, lesquelz sont destinés, locis aff. & ordonnés à la distribution du chyle, par les veines mesaraiques, au foye. Et sont pour ceste vtilité principalement: iacoit que ilz ayent aussi quelque vertu concoctrice des viandes, semblable au ventricule, laquelle toutesfois est plus imbecille. Dauantage aussi ilz ont vertu expul

expultrice des excrements.

3 Et trois gros, qui sont instruments de  
lexcretion. Lesquelz (comme vn second  
ventre) sont subiets aux excrements  
secz, tout ainsi que la veseie est sub-  
iette à receuoir les vrines. Pourtant  
aucuns les appellent, le ventre infe-  
rieur.

1 Le premier intestin est conioint au  
ventricule, par pylorus, cestadire par le  
portier. Et ne se reflexchist pas inconti-  
nent en circonuolutions, ains est pro-  
duit & estedu le long de douze doigts,  
iouxte la spine : iusques à ce que il ayt  
donné assez ample espace à la veine por-  
te, aux arteres des intestins, aux nerfz,  
& aux pores contenans la cholere, ou  
le fiel. Lesquelles quatre parties il estoit  
nécessaire estre situées en cest espace,  
lequel est moyen entre le ventricule, &  
le intestin, dit ieunum, quasi enuiron  
le mylieu de cest intestin. Et pource,  
que il est sans circonuolution, les ana-  
tomistes ont acoustumé de lappeller  
ecphysis, cestadire vne origine, & nais-  
sance des intestins. Herophilus lappelle  
dodecadactylos, à cause quil est long  
de douze doigts. Vulgairement il est  
nommé duodenum.

2 Le second est appellé en Grec nestis,

b 3 en

34 en Latin ieiunum, pource quil est tousiours vuyde. Car de luy se fait distribution grande, & bien soudaine, à cause de la multitude des vaisseaux, & de la situation prochaine au foye. Pource aussi que il reçoit le premier (apres ecphyfis) le chyle, & que il le distribue au foye, qui est vuyde. Item la force de son action est augmentee, dautant que il nest pas loing de la partie, par ou le excremēt bilieux, cestadire cholérique, entre premierement en ecphyfis.

3 Le tiers, subtil, en Grec Ileon, est de semblable substance au second dessus dit. Toutesfois il differe dauec luy, de autant que il ne se trouue point vuyde: aussi il ne ha pas tant de vaisseaux. Ces deux intestins sont impliqués en diuerses reuolutions: & obtiennent la plus haulte region du ventre.

331 4 Le quart ( qui est le premier des gros) est appellé cæcum: lequel est comme vn gros ventre, idoyne à receuoir les excremens. Et est situé aux Flancz dextres, ditz Ilia; au dessus duquel est suspendu le Rongnon dextre. Les Chirurgiens vulgairement lappellent sacculus, & monoculus.

5 Le cinquieme est nommé colon, lequel est gros intestin, plus charnu, que  
les

les autres. Et est porté de la dextre region des Flancz , iusques à la fenestre, sur le fond du ventricule: tant que souuentefois il attouche la ratelle, & le foye.

6 Le sixieme est dit rectum , cest adire droit, lequel gist droitement sus la spine : & pource est il ainsi nommé. Et est vn ample, & spatieux receptacle d'excrement, estendu iusques au siege. Vulgairement on l'appelle longanon.

En chacune circōuolution d'intestins, est disseminé, & dispersé vn nerf de la sixte coniugation du cerueau, lequel nerf sert au sentiment, & à l'excretion. Pareillemēt en chacune circonuolution il y ha vne veine, & vne artere.

*De mesenterion, autrement mesaræon.*

**M**Esenterion, ou mesaræon, est ainsi nommé par deux noms, à cause des accidens, qui luy aduiennent. Cest asçauoir mesenterio est dit à cause de sa situation, pource quil est situé au my lieu des intestins. Mais mesaræon est nommé pour sa propre substance. Aucuns l'appellēt lactes. Toutesfois Plin dit, que lactes ce sont les intestins subtilz. Or mesenterion prēd son peritoine, iouxte la spine. Et est composé

*Gal. li. 9.  
9. et 16. de  
usu part.*

*Plin. lib.  
11. cap. 37.*

*Galen. li. 6. Ana. administ.* de plusieurs veines, & arteres, & de gresse, oultreplus du peritoine, tissant les espaces moyens entre iceux vaisseaux.

*et in fine. 4. de usu part.* Mesenterion enuirõne, & embrasse toutes les veines, descendentes du foye en luy (dõt elles sont appellees mesarcæ, ou me-

*Gal. ibi.* saraicæ) avec les arteres prochaines, & nerfz. Comme il comprend aussi tous les intestins, ausquelz plusieurs orifices de veines paruiennent & penetrèt en similitude de subtiles extremités des racines de quel-

*Gal. ibi.* que arbre. Or tout ainsi que nature recueille, & assemble es arbres ces petites racines en plus grosses, ainsi es animaux elle assemble les petis vaisseaux en plus grãs, & derechef iceux en autres plus grans, iusques à ce quelle paruienne au foye: là ou elle recueille tous lesdits vaisseaux en vne veine, laquelle est située aux portes du foye, & est appelée la veine porte. De laquelle nous donnerons la diuarcation, cestadire ramification, ou diuision en ses rameaux, quand nous traicterõs du foye. Pareillement nature ha retiré, & recueilli toutes les arteres en vne grande, laquelle gist sur le dos.

*Gal. ibi. de. et cap. 7. lib. 5. de locis aff.* Toutesfois il y ha autres veines du mesentere, lesquelles tendèt vers les portes du foye, pour distribuer le Chylus. Et pource sont appellees les mains du foye. Esquel-



les veines le sang est premierement engendré. Il en y ha d'autres, qui sont propres au mesentere, cestasçauoir pour nourrir les intestins, lesquelles ne paruiennent point iusques au foye, ains comme disoit Herophilus, elles se terminent en aucuns corps glanduleux, iasçoit que toutes les autres paruiénét en hault, vers les portes du foye.

Or de peur que les vaisseaux dessusdits *Galen. in fi. li. 4. de usu part.* ne soient comprimés en quelque lieu, ou quilz ne soient aucunement molestés en fautât, ou en tombant, ou en quelque autre mouuement violent, nature ha fait & constitué le mesentere double, es espaces vuydes, lesquels sont entre les vaisseaux: à celle fin quil veste, & couure tous lesdits vaisseaux, & quil leur serue de ligament, & forte deffense.

Mais dautât que la veine, artere, nerf, & *Gal. ibidem: in initio lib. 5. de usu part.* avec iceux le quatrieme vaisseau contenant la cholere, illec sont diuisés en rameaux, haults, & droits, nature ha fabriqué vn corps glanduleux, que nous appel

lôs pancreas en Grec. Lequel elle ha soubsterné, & couché tout à lentour desdits vaisseaux, & ha remply les diuisions diceux, tellement que nul deulx ne se peult facilement fendre, & nest sans appuy, & fulciment. Ains dautant que lesdits vaisseaux se reposent sur ce corps, qui est mol,

B 5 & ce

& cede mediocrement, filz sont esmeuz de quelque mouuement trop vehement, ilz sont conserués perpetuellement, sans estre blessés, conuassés, ne rompus.

*Du uentricule ; autrement  
estomach.*

*Gal. lib.  
4. de usu  
part.*

**L**E uentricule, que les Grecz appellent *gaster*, & *cœlias*, cest le receptacle de la viande, comme vn promptuaire, & repositoire communé à toutes parties. Auquel se fait la premiere concoction. Il est situé au mylieu du corps, mais plus à la partie dextre. Il est rond, long, & caue. Et ha le fond plus large, que l'orifice, especialement es hommes.

*Gal. ibi.*

Il ha deux tuniques, semblables aux tuniques de *œsophagus*, & dissemblables aux tuniques des intestins.

*Q. d. d. d.*

*ad. d. d. d.*

*ad. d. d. d.*

*ad. d. d. d.*

1 Lune interieure, laquelle est plus membraneuse. Et est continue à la tunique interne de *œsophagus*, de la bouche, & de la trachée artère. Aussi elle est tissue de plusieurs vils, ou filamets droits, descendans du hault en bas, & de peu de filaments obliques.

2 L'autre exterieure, laquelle est plus charnue, & ha de vilz transuersaux, telz comme sont ceux des deux tuniques des intestins, & non sans iuste cause. Car il fault,

fault, que le ventricule attire à soy la viande, & le breuuage, par l'œsophage. Et ce par le moyé des filaméts droits, cōme filz luy seruoiet de mains. Et fault, quil les repoulse par les transuersaux.

3 Dabondāt il ha vne tierce tunique du peritoine, ainsi que dit est des intestins.

Le ventricule ha deux orifices.

*Gal. ibi-*

1 Le superieur est situé à la fenestre, & est contenu à œsophagus. On lappelle lorifice du ventricule, ou de lestomach. Et aucunesfois abusiuement est appellé stomachus. Les anciens lappelloient le cœur. Cest orifice superieur est plus large, & plus ample, que lautre. Pource que aucunesfois lon transgloutist, & deuore aucunes choses non brisees, ains dures, & grandes. Lesquelles, à celle fin quelles passent, requierét vne voye plus large, & plus ample, quelle est icelle, qui apporte par œsophagus, en Latin gula.

*dē: et cap.*

*5. lib. 5. et*

*cap. 2. lib.*

*6. de locis*

*aff. & de*

*dissēct. ne*

*narū, &*

*apho. 38.*

*li. 6. et 56.*

*lib. 7.*

2 Linferieur orifice est situé à la dextre, aupres du foye. Et est contenu aux intestins. Les Grecz le nomment pylorus, cestadire portier. Il est plus estroit, que lorifice superieur, pource quil ne passe rien en bas, qui soit grand, ou dur: ains tout ce, qui y passe, est cuit, & mué en Chylus. Car cest orifice, comme vn portier iuste, ne donne facilement passage,

par

par bas à aucune chose, deuant que estre cuite, & redigee en Chylus.

*Gal. lib.* Plusieurs veines sont enuoyees du mesen-  
*4. de usu* tere aux intestins : mais peu au fond du  
*part.* ventre : & encores moins à l'orifice du ven-  
 tre : & encores moins & du tout obscures  
 & non manifestes, à œsophagus. Car là  
 ou il fault seulement, que les viandes se  
 cuisent, il ny fault pas beaucoup de vei-  
 nes pour faire transumption de ce, qui est  
 desia bening, & vtile. Mais ce, qui est desia  
 cuit, il conuient, quil soit distribué tout  
 incontinent.

Item aucunes petites arteres, procedan-  
 tes de la grande artere, qui gist sus la spi-  
 ne, paruiennent au ventricule, à cause de  
 la vertu vitale.

*Gal. lib.* Item vn pareil de nerfz, assez grand, de  
*4. et 16. de* la sexte coniugation du cerueau, paruient  
*usu part.* au vetricule. Et est dispersé, & tyfsist prin-  
 cipalement l'orifice du ventricule, & les  
 parties continues à iceluy. Et puis sestend  
 es autres parties, iusques au fond du ven-  
 tricule. Par lesquelz nerfz, comme par au-  
 cuns canalz, la vertu sensitiue afflue du  
 cerueau en iceluy ventricule : parquoy il  
 sent la faulte, & indigence, qui est en luy.

*Gal. lib.* Oultreplus il y ha vn vaisseau veneux,  
*4. de usu* lequel vient de la ratelle, iusques à l'orifi-  
*part.* ce du ventricule. Ce vaisseau apporte lhu-  
 meur

meur melancolique, par laquelle humeur, d'autant quelle est froide, & aigre, l'appetit est excité. Et le vètricule en est astringé, & corrobore.

*Du foye.*

**L**E foye, en Grec hepar, en Latin ie- *Gal. libr.*  
 cur, cest le principe de la faculté con- 4 *et 5. de*  
 cupiscible, & de toutes les veines, & le *usu part.*  
 premier instrument dengendrier le sang. *et 6. Ana.*  
 Lequel embrasse exactement le ventricu- *administ.*  
 le, par aucunes lobes, cestadire fibres: com-  
 me si cestoiént doigts. La plus grâde par-  
 tie du foye occupe la partie dextre, iacoit  
 quelle occupe quelque partie senestre:  
 mais ce nest pas egalemét en tous. Le foye  
 est fort grâd es hommes. Et ceux, qui sont  
 goulus, & timides lont plus grand. Et est  
 diuisé en plusieurs lobes. Toutesfois le  
 nombre des lobes, ou fibres du foye, nest  
 pas tout vn en tous animaux. Car en au-  
 cuns le foye nha point de lobes, ains est  
 du tout rond, & moins droit. En daucuns  
 il y ha deux lobes, es autres trois: & en  
 plusieurs quatre. Ité là ou il attouche au  
 diaphragme, il est gibbeux, & lisse, cesta-  
 dire plein, vny, & egal. Mais là ou il gist  
 sur le ventricule, il est caue, & inegal. Sa  
 propre chair est semblable à vn sang en-  
 groissi, duquel la plus subtile partie ha esté  
 euap

euaporee par chaleur. Laquelle chair du foye, pareillement de tous autres visceres, Erasistratus appelle paréchyma en Grec, cestadire affusion. Le foye est la premiere officine, ou boutique de sanguification, cestadire de generation de sang. Item il ha vne tunique, du peritoine, en laquelle vn bien petit nerf, de la sixieme coniugation du cerueau, est implanté: toutesfois il ne paruiet pas dedens euidentement. Car il ha suffy à ce viscere, cestadire au foye, de receuoir de ce nerf quelque sentimēt obscur, & petit, dautant quil est fait par distribution. Car veu que nul suc maling, & acre, ne deuoit demeurer en luy, pour ceste cause, il n'ha pas eu be-  
soin de plus grand sentiment. De la substance du foye naissent deux grandes veines, semblables, & en proportion correspondentes à vn tronc darbre.

*Gal. ibi.  
C. 16. de  
usu part,  
et de dis-  
sect. uena-  
rum.*

1. Lune vient de la partie caue du foye, laquelle reçoit toutes les veines du mesenterie. Et est appelée superficielle, & en Grec stelechiata, par le nom dun tronc. Les anatomistes Latins la nomment les portes du foye, ou autrement la veine porte. Ceste veine prend du ventricule, & des intestins, le chylus: & expurge le sang melancolique en la ratelle.
2. L'autre sort de la partie gibbeuse du foye,

foye, laquelle est la plus grande de toutes les veines. Les Grecz l'appellent hepatitis, cestadire iecoraria:& cœle, cestadire caua, à cause de sa magnitude. Car elle ha discours par tout le corps, veu que par icelle le sang, qui est le nourrissement de toutes parties, est distribué par tout le corps.

La veine porte, laquelle enuiron le my-lieu de ecphisis descend obliquement, ha sept rameaux insignes, & grans. *Gal.de dissect.ne narium.*

- 1 Le premier paruiet à la cœcauité du ventre.
- 2 Le second vient en la ratelle. Et apres que plusieurs rameaux sont enuoyés à toute icelle ratelle, par la partie caue, vne partie de ceste veine vient à la gibbosité du ventricule, & lautre est diuisee à la fenestre region de omentum.
- 3 Le tiers rameau à la fenestre, paruiet à lextreme mesentaire des grans intestins, iusques au siege.
- 4 Le quatrieme naissant de la partie dextre de la veine porte, pres de pylorus, paruiet iusques à la gibbosité du ventre. Et ses rameaux, ou propagines, tendent à la partie dextre de omentum.
- 5 Le cinquieme aussi de la partie dextre paruiet au mesentaire de colon, par vn grand nombre de petites veines.

6 Toute l'autre portion de la veine porte, paruiet iusques au mylieu des deux mesentaires dessusditz. Laquelle aussi enuoye plusieurs rameaux au premier intestin dit ieiunum, & puis en tout l'intestin subtil.

7 Sa derniere partie fait son discours entre l'intestin dit cæcum, & quelque partie de colon; illec ou l'intestin colon est conioint avec cæcum.

Après que nature ha vny à la veine porte toutes ces veines, lesquelles portēt le chyle du ventricule, & de tous les intestins en hault au foye, derechef elle les diuise en plusieurs. Et premieremēt en chacune lobbe, cestadire fibre du foye; elle plante vn rameau insigne, & grād. Derechef chacun diceux rameaux est distribué en plusieurs petis. Tout ainsi comme vn tronc est diuisé en plusieurs rameaux.

*Gal. lib. 4. de usu part.*

Derechef iceux rameaux sont diuisés en surcules. Et puis se terminent en petites germinations subtiles. Et ce à celle fin, que le chyle (après auoir demeuré long temps au foye, à cause de si grande implication, & anfractuosité de vaisseaux, aussi à cause du passage estroit) soit parfaitement transmué en sang.

*Gal. li. 4. & 16. de usu part.*

La veine caue naist de la partie gibbeuse du foye, & est semblable à vn tronc diuisé



uisé en deux. Cestascavoir en hault elle môte au cœur: & en bas elle est resleschie vers la spine. Elle ressemble à vn conduit rempli de sang. Et ha plusieurs ruisseaux yssans d'elle, grands, & petis, qui sont distribués en toutes les particules du corps.

En ceste veine le sang desia est rouge, & pur, lequel monte en hault, à la partie gibbeuse du foye, ou il est receu. Toutefois il est encores plein dune humeur subtile, & aqueuse, laquelle humeur est appelée selon les Latins *serosum* *recrementū*: Hypocrates lappelle *ochema trophes*, cestadire le vehicule du nourrissemēt. Or cy apres nous poursuivrons la diuision dicelle veine taue.

Les veines, qui sont en la gibbosité du foye, ne sont pas coniointes avec les veines de la partie côcaue dudit foye. Neantmoins la viande yssante de toutesicelles veines, de la partie concaue du foye, est transportee aux parties gibbeuses. Or entre toutes lesveines, lesquelles sont dispersées par tout le corps, les veines qui sont au foye, ont leurs tuniques les plus subtiles: dautant quelles ne sont exposées à aucun dâger pour souffrir (car elles ont leur situation bien seure au foye) & ainsi elles elabourent mieux le sang, en touchant au corps du foye, sans quil y ait aucun

*Gal.lib.*  
4. de usu  
part. &  
5. de locis  
affe.ca.6.

moyen entre deux.

*Gal.lib.*  
4. de usu  
part. Nature ha mis seulement à la partie caue des arteres, lesquelles gardent, & conseruent la symmetrie, cestadire la cōmoderation de la chaleur naturelle du foye, sachant que la partie gibbeuse est en continuel mouuement, à cause quelle est prochaine du diaphragme. Or ces arteres sont fort petites, comme celles, qui donnent seulement refrigeration à la partie caue du foye. Le nerf est encores plus petit, que les arteres. Mais les conduitz contenant la cholere, sont plus grāds, que les nerfz, & arteres (desquelz nous parlerons cy apres incontinent) & les veines sont plus grandes, que tous les dessusditz.

*De la vescie du fiel.*

*Gal.lib.*  
4. de usu  
part. EN ceste partie caue du foye, y ha vne vescie, ou vn follicule du fiel, que les Grecz appellent cystis choledochos, cestadire vescie receuāt la cholere. De laquelle vescie naissent aucuns conduitz, que les Grecz appellent pori choledochi. Car ilz sont de mesme substāce avec icelle vescie, & cōtiennent la cholere, non pas le sang. Non seulement ilz sont au foye, mais aussi hors du foye, tout ainsi que celuy cōduit, lequel paruiet à ecphylis, & aussi ceux, qui passent par la vescie, laquelle nest pas  
partie

partie du foye. Ceste vesicule, ou petite vescie, ha vn long col, comme par maniere de dire vn estomach, par lequel elle attire, & reçoit du foye la cholere seulemēt. Et par vn autre conduit elle lenuoye en ecphysis, cestadire en lorigine des intestins. En laquelle ecphysis ce conduit est obliquement implanté, tout ainsi que les vretères sont implantées en la grande vescie, à celle fin que rien nen regurgite, ou retourne. Et ce par vne merueilleuse providēce de nature. Neantmoins Galien au troisieme liure des facultés naturelles, affirme icelle mesme vesicule du fiel, remplie, & vuydee, par vn mesme col, en divers temps.

*Gal. libr.**4. et 5. de**usu part.**Gal. libr.**3. de natu.**facult.**Gal. libr.**4. et 5. de**usu part.*

Pour parfaire ces mouuēmēts, icelle vescie ha vne tunique propre, tissue de trois genres de vilz, ou fibres (car elle en ha vne autre du peritoine, sans vilz) comme ont toutes les autres parties du ventre inferieur. Or la premiere tunique attire par les fibres droites, & retient par les obliques, & expellist par les trāsuersales. Tout ainsi que fait la vescie receuāt lurine, & la matrice. Item elle ha vne artere, & vn nerf, de ceux, qui viennent au foye, lun & lautre fort petit, & quasi inuisible. Mais il y ha vne veine sensible, & manifeste, produite dicelles, qui sont à la porte du foye. Ces

trois vaisseaux sont fichés au col de ceste vefcie, & puis sont dispersés en toute icelle, & paruiennent iusques au fond d'elle.

*De la ratelle.*

*Gal lib.* **S**Plen en Grec, lien en Latin, cest la ratelle, laquelle cōsiste en la partie sene-  
*6. ana. ad* stre. Sa partie concaue incline à la dextre,  
*minist. &* vers le foye : mais sa partie gibbeuse est  
*4. de usu* conuertie aux extremités des faulces co-  
*part.* stes. La magnitude, & couleur de la ratelle, nest semblable en tous animaux. Car vn Lyon, & vn Chien, & toutes autres bestes fortes, & chauldes, ont la ratelle fort noire. Mais vn porc, & toutes autres bestes humides, & froides, ont la ratelle plus blanche.

*Gal lib.* Le propre corps, & substance de ce vi-  
*4. de usu* scere, est fort rare, & arterieux, & laxc en  
*part.* maniere d'une éponge: à celle fin d'attirer, & receuoir facilement les grosses humeurs du foye. Item elle est plus legiere, que nest le foye, toutesfois elle nest pas si rouge, ou flaue: car elle est nourrie de sang subtil, noir toutesfois. Et d'autant quelle est plus rare, que le foye, d'autant est elle plus dense, que le poulmon.

*Gal libid.* La ratelle purge les humeurs lymōneuses, grosses, & melancholiques, engédrees au foye. Car elle les attire par vn vaisseau  
 veneux

veneux, lequel vaisseau est estendu depuis la partie caue de la ratelle, iusques à la veine porte, en maniere d'estomach, ou mery. Et apres quelle ha attiré lesdites humeurs melancholiques, elle les cuit, & elaboure: puis se nourrist du plus subtil. Et ce, qui est inutile pour nourrir, elle lenuoye à l'orifice du ventricule, ou estomach, par vn autre vaisseau veneux, pour vne vtilité, laquelle n'est pas à mespriser, comme nous auons deuant dit.

La partie caue de ce viscere contient les implantations de plusieurs, & grâdes arteres, & veines. Des veines elle attire le plus gros nourrissement. Et des arteres, elle attire le plus subtil. *Gal. ibid.*

La tunique, qui enuironne la ratelle, procedât du peritoine, non seulement est vn ligamēt, mais dauantage est vne tunique (cōme aussi elle est nomēe) laquelle couure, & vest de toute part la ratelle. Elle reçoit vn petit nerf de la sexte coniugation des nerfz, cōme font les rongnons, & la vescie receuāt la cholere. Lesquelz trois visceres purgeans le foye, ne requierent pas plus grand sentiment, à cause quilz ne doiuent auoir aucun dōmage de leurs propres, & familiers excremens, contenuz en eux. *Gal. libr. 4. & s. de usu part.*

*Des roins, & parties  
dedices à l'urine.*

*Libr. de  
calculo :*

*¶ 16. de  
usu part.*

**L**A veine caue yssant de la gibbosité du foye (comme nous auõs dit) procede en deux parties:cestasçauoir,

- 1 En hault, & sappelle vulgairemēt vena cœle ascendēs, cestadire la veine caue montant. De laquelle nous parlerons en la seconde table.
- 2 Et en bas, & vulgairemēt sappelle vena cœle descendens.

Ceste veine descédant en bas, est derechef diuisee en trois rameaux.

- 1 Le premier rameau paruiet aux rongnons, duquel à present nous parlons.
- 2 Le secōd va aux testicules, duquel peu apres nous ferons mention.
- 3 Et le tiers aux iambes, duquel nous parlerons en la quatrieme table.

*Gal. libr.*

*de dissect.*

*uenarum.*

*l. 1. c. 14.*

*¶ 16. de*

*usu part.*

La veine caue tout incontinent que elle sort du foye, deuāt que elle descende aux reins (en Latin lumbi) estant encores bien haulte, distribue de petis surcules aux parties prochaines. Et puis enuoye vn grand rameau à chacun des rongnons, situés au deffoubz. Semblablemēt autres deux vaisseaux, aussi grās, qui procedent de la grande artere (laquelle gist sus la spine) sont implantés aux rongnõs, tout ainsi que les deux veines deffusdites. Lesquelz quatre vaisseaux, cestasçauoir deux veines, & deux arteres, communement sappellent emulg

emulgentes. Car par icelles les rongnons separent, & attirent lurine dauec le sang. Semblablement ilz attirent beaucoup de cholere, & quasi tout ce, qui est contenu en icelles veines, & arteres. Aussi ilz attirent beaucoup de sang, c'esta sçauoir la partie la plus humide, & la plus subtile dudit sang. Mais quant est de l'excrement cholérique, tout ce qui n'est pas fort gros, passe avec les vrines, dont les vrines se iaulnisent. Mais le sang est aspergé, ou arrosé à la chair des rongnons, en maniere de quelque lye. Puis peu à peu en maniere de vapeur est dispersé, & distribué en toute icelle chair des rongnons, & y adhere, & y est vny, tant que finablement est fait le nourrissement des rongnons. Mais d'autant que le rongnon dextre est plus hault, que le fenestre, aussi la generation des vaisseaux, qui sont implantés en ce rongnon dextre est d'autant plus haulte, que celle, qui est inserée en l'autre rongnon.

Ces deux rongnons, que les Grecz appellent nephri, sont de chair dense, & solide. Et sont situés pres de la veine caue, vn peu au dessoubz du foye. Le dextre en tous animaux apparoist plus enleué. Et aucunes fois touche à la grande lobe, ou fibre du foye: Car en ceste maniere il attire plus facilement, des parties opposites di-

rectement. Les rongnons ont vn nerf du cerueau; aussi grand comme le foye, la ratelle, & la vescie receuant la cholere. Tous ces visceres reçoient nerfz totalemēt petits, lesquelz nerfz sont manifestes en leurs tuniques, extrinsequemēt: dont nous auōs rendu raison cy deuant.

*Gal. libr. 6. de anat. administ.* Chacun des deux rongnons ha vn sinus, cest adire cavitē, ou les vaisseaux sont distribués en plusieurs rameaux, lequel sinus est enuironné dune membrane, par laquelle lurine distille en lautre sinus moindre, qui est receu dun cōduit assez long, nommé vreter.

*Gal. ibi. de usu part.* Ces conduitz, par lesquelz les rongnōs expellissent lurine en la vescie, sont nommés en Grec vreteres, en Latin vrinarii, à cause de lurine: de chacun rongnon en sort vn. Et sont blancz, fortz, & de telle substance, comme la vescie: en laquelle de costē, & dautre ilz implantés obliquemēt, à celle fin, que rien ne retourne en hault aux rongnons. Ces cōduitz ont leur propre tunique, ainsi que toutes autres parties suspendues au peritoine.

*Gala. de facult. natur. & de usu part.*

#### *De la vescie.*

**C**yste, & cystis en Grec, en Latin vesica, cest le receptacle de lurine. Et ha deux tuniques: lexterieure ha son origine  
da



du peritoine . Linterieure est deux fois plus grosse, laquelle est propre à la vescie. La vescie ha toute espeece de fibres , cōme la petite vescie : desquelles la diuersité, & principalemēt des obliques, est cause, quil ne se face excretion durine continuelle, ou intempestiue , cestadire en tēps indeu, & non opportun.

Le col de la vescie est large , & petit es *Galibid.* femmes , pource que toute lurine deuoit. estre illec arrestee. Mais es masles il est grand, pource quilz ont vne particule insigne situee au bout du col de la vescie, que les femmes nont pas : laquelle est appelée colis , cest la verge virile. Item la vescie ha vn conduit estroit , & fort oblique, car il est situé au dessoubz des os pubis. Item au dessoubz de ce conduit est situé lintestin droit, & os sacrū. Et aux femmes le col de la matrice est aussi situé au dessoubz de la vescie, auquel lieu, selon la longueur de tout animant , il descend en bas, iusques à ce , quil ysse dehors des os. En apres ce conduit monte en hault , vers perinæum, iusques à la racine , ou origine de la verge virile. Derechef descēd en bas, par la verge. Parquoy lon peult entendre, que ledit conduit est fort oblique , à la similitude de, S, lettre Romaine. Aux femmes ce cōduit nha que vne seule flexion,

au col de la vefcie:mais aux hōmes à cause, quilz ont la partie honteuse yffant dehors,iouste le col de la vefcie, il y ha vne seconde reflexion dauantage. Parquoy il est euident, que les hōmes necessairement ont le conduit de lurine plus flexueux, & tortu, que les femmes.

*Gal. ibid.* Le col de la vefcie, & le conduit de lurine ont vn muscle cōposé de fibres transuersale. Lequel ha trois vtilités.

- 1 La premiere est, à celle fin, quil ne reste rien au conduit de lurine, ains que ce muscle retiré de toute part expellisse tout ce, qui est contenu en luy.
- 2 La secōde vtilité est, quil ayde à clorre lorifice de la vefcie, iaçoit quil puisse estre cloz sans luy.
- 3 La derniere vtilité est, quil accelere, & haste lexpulsion des excremens.

*Gal. ibid.* Oultre plus, ces deux vefcies, dautāt quelles attirent leur propre excrement pur, & separé des autres, ne sont pas nourries, cōme les rongnons, & la ratelle, par les vaisseaux, qui separēt les superfluités: ains ont eu besoing dautres vaisseaux pour estre nourries. Car la grande vefcie, de laquelle est nostre propos à present, elle ha six grādz vaisseaux fichés au col dicelle, trois de chacun costé, costascauoir vn nerf, vne veine, & vne artere. Elle reçoit les nerfz

de

de la spinale medulle de os sacrum, & les veines, & arteres des vaisseaux prochains à elle, cest asçauoir illec, ou premierement les arteres viennent de la grãde artere gysant sur la spine, iusques aux iâbes. Quant est des vaisseaux de la petite vescie, nous en auons parlé cy deuant. Ces vaisseaux, en la premiere entree dedens le col de la vescie, sont diuisés en deux parties. Dune part sont distribués par toute la vescie, iusques au fond: ainsi cõme en la petite vescie. Et dautre part descendent en bas, iouxte le col de la vescie.

*Des vaisseaux spermatiques, & des parties genitales, es males.*

**A** Ngua spermatica en Grec , en Latin *Gal. libr.*  
 vata seminalia , ou seminaria , cest- *4. de usu*  
 adire vaisseaux spermatiques, sont larges, *part. &*  
 longs, variqueux, & durs, es masses. Les- *de dissec.*  
 quelz portent par les Flancz , en bas, aux *mem.*  
 testicules, le sang, & lesprit. Et pource vul-  
 gairement sont appellees vaisseaux prepa-  
 rans. Et sont quatre: cest a scavoir,

2 Deux veines, de chacune part vne: lesquelles ont diuerſe origine. Car la dextre procede nō pas du coſtē, mais quaſi du mylien, au deſſoubz de celle, qui tēd aux rongnons, vers icelle meſme partie dextre.

dextre. La fenestre procede dicelle, qui est portee aux rongnons, à laquelle aucunesfois aduient vn rameau de la veine caue: & va avec iceluy rameau.

2 Et deux arteres, cestasçauoir vne de chacune part: lesquelles naissent de la grande artere, laquelle gist sur l'espine.

*Gal. li. 1.* Ces quatre vaisseaux procedent aux *de semine* deux testicules, non pas par voye droite  
*Et 14. de* (comme à toutes les autres parties) mais  
*usq. part.* premieremēt sont entortillés en plusieurs manieres, à la semblāce dun bourgeon de vigne, ou de lierre. En ces anfractuosités la veine gist dessus l'artere. Et chacune fait plusieurs reflexions egales en nombre, cestadire autant lune comme lautre, en maniere de inuolutions reployés de diuerse sorte. En laquelle implication, ou reuolution, le sang, & lesperit, qui sont portés aux testicules, se cuyent long tēps: tellement que tu peux voir clerement lhumeur, qui est aux premieres reflexions, estre encores sanguine. Laquelle consequemment aux autres reflexions deuient blanche, de plus en plus: tant que aux dernieres reflexions, lesquelles sont terminees aux testicules, lhumeur est faite du tout blanche. Parquoy il appert, que non seulement es testicules, mais aussi aux veines, & arteres est la generation de sperme.

Tou

Toutesfois en icelles veines, & arteres, est elabouré bien peu de sperme, & tardiuement: lequel est meslé avecques le sang, comme rosee. Mais aux testicules cest au contraire: car il y elaboure grande abondance de sperme; & legerement, & exactement.

*De epididymis.*

**E**Pididymis, cest la superieure partie, *Gal. li. i.*  
ou la teste du testicule: laquelle est *de simie.*  
moyenne entre le vaisseau spermatique,  
& le testicule: non seulement quant à la  
situation, mais aussi quant au genre de  
toute la substance. Car elle est dautant  
plus molle, & plus charneuse, que le vais-  
seau spermatique, dautant quelle est plus  
dure, & plus nerueuse, que le testicule.  
Parquoy par le moyen, & interposition  
dicelle, les testicules sont coniointz avec  
les vaisseaux spermatiques: & qui plus est,  
epididymis est le commencement, & la  
racine de ces vaisseaux spermatiques: at-  
tirant à soy le sperme de tout le testicule,  
tout ainsi que ledit sperme est transporté  
de epididymis, dedens le vaisseau sperma-  
tique, dit vas deferens. Il y ha artere, &  
veine, adherentes à epididymis, par aucu-  
nes circonuolutions anfractueuses, & luy  
enuoyent de petis rameaux, deuant que  
dentrer

dentrer au testicule , auquel paruiennent plusieurs fistules, pleines d'humidité sereuse, lesquelles procedent de epididymis.

*Des testicules.*

*Gale. lib. 14. de usu par. Item 3. de disse. Eti. mulua. Apho. 48. lib. 5.* **T**Estes, ou testiculi en Latin , en Grec *orchæis*, & *didymi*, id est *gemelli*, selon Herophilus, ce sont les genitifz , ou testicules. Aux masles ilz sont situés au dedous du ventre , & apparoissent par dehors , & sont pendans. Pour ceste cause il y ha vn muscle à vn chacun de iceux , lequel prouient des Flancz : à celle fin , que les testicules soyent participans du mouuement volontaire. Les testicules sont de chair molle, rondz, longz, laxes, & cauerneux: à celle fin, quilz reçoient, & acheuent de cuire lhumeur, laquelle auoit commencé de cuire es vaisseaux: la faisant parfaite à la generation de lanimant: & la rendans plus chaulde.

Le testicule dextre est plus variqueux, plus flexueux, ou tortu, plus fort , & plus chauld, que le senestre: tout ainsi comme es femmes , la partie dextre de la matrice: à cause de la proximité du foye. Aussi à raison, que les vaisseaux , qui sont portés audit testicule dextre, & à la dextre matrice , prouiennent des grans vaisseaux, lesquels sont à la spine: ainsi que dessus nous

auons

auons dit. Or donc voicy les deux principes de la generation des masles : cestasca-  
noir es femmes la matrice dextre , & es  
masles le testicule dextre. Car le plus sou-  
uent le masle est trouué en la dextre ma-  
trice , & la femelle en la fenestre. Toutef-  
fois il aduient aucunesfois le contraire :  
mais ce nest pas souuent.

Deux tuniques , ou membranes couurēt *Gal. lib.*  
un chacun des testicules : cestascauoir, *de dissect.*

1 Linterieure , laquelle est la plus subti- *unlua: et i*  
le : les Grecz lappellent erythroides. *introduc.*

2 Lexterieure est plus forte , laquelle  
adhere fort à linterieure : les Grecz lap-  
pellent dartos.

En apres y ha vn sinus commun à toutes *Galibid.*  
lesdites parties, qui est rugueux , & enui-  
ronne les testicules : les Grecz lappellent  
oscheon, & les Latins scortum, ou scrotū.  
Vulgairement bursa testium.

*Du conduit spermatique, dit*  
*varicosus parastates.*

**L**Es vaisseaux spermatiques dessus- *Gal. li. 1.*  
dictz , vulgairement appellés vasa *de semre.*  
præparantia , lesquelz adherent à epididymis, comme nous auons dict , se termi-  
nent es deux conduitz spermatiques, asés  
longs : cestascauoir vn de chacū costé. Les-  
quelz deux conduitz ont leur procedure  
uariq

variqueuse, iouxtc le col de la vefcie. Parquoy Herophilus premier les ha appellés parastata cirsoedæ, qui vault autant à dire comme assistants, & auxiliateurs variciformes, ou variqueux. Lesquelz conduits transportans le sperme de epididymis, le portent dehors, iusques à l'origine de la verge virile. Et pour ceste cause, on les appelle vulgairement vasa deferentia, cestadire vaisseaux, qui apportent le sperme des testicules.

*Gal. ibid. et li. 14. de usu part.* Ces deux conduitz variqueux, cestasçauoir vn de chacun costé; naissent de epididymis. Lesquelz iouxtc leur origine, touchent aux testicules: toutesfois ne sont pas procreés desditz testicules. Ilz tendent par vne mesme voye, par ou les vaisseaux dessus nommés præparantia sont descendus, cestasçauoir par le peritoyne: lequel illec est assez pertuysé de costé, & d'autre, & sont lesditz conduitz enucloppés d'une membrane. En apres procedent non pas hors des os du penil, mais plus profond, & au dessoubz desditz os, en descendant entre deux corps glanduleux (desquelz nous parlerons cy apres) iusques à tant, que lesditz conduitz soyent paruenus au col de la vefcie: auquel la verge virile est continue. En ce lieu ces deux conduitz, cestasçauoir le dextre, & le fenestre, conuiennent



viennent en vn:lequel vient droit par dessous le col de la vefcie, au canal de lurine. Et ainfi ces vaiſſeaux, qui ſont ordonnés pour receuoir le ſperme des teſticules, ſont eſtenduz es maſſes, iuſques à la verge virile, en telle maniere, comme dit eſt : & ont leur oriſce ouuert, au conduit, qui eſt là, par lequel auſſi lurine eſt enuoyee dehors. Pource que il falloit, que les maſſes iettaſſent le ſperme dehors par là.

*Des deux corps glanduleux nommés  
glanduloſi proſtatæ.*

**I**L y ha deux corps glanduleux, leſquelz *Gal. ibid.*  
Herophilus premier ha nommés adeno- *& in fine*  
ides proſtatæ, ceſt adire glanduleux *libr. 1. de*  
preſidents. Ilz ſont ſitués aux deux parties *ſemine.*  
du col de la vefcie. Et contiennent vne humidité ſemblable à ſperme : laquelle toutesfois eſt beaucoup plus ſubtile. Iceſle humidité en la cte venerien, dit coitus, ſort incontinent avec la ſemence. Et en autre temps, ſort peu à peu, & imperceptiblement. Ses vtilités ſont deux.

1 La premiere eſt pour exciter au coit venerien, & y donner delectation.

2 La ſeconde eſt, que ceſte humidité groſſe, & viſqueuſe comme huile, humecte le conduit de lurine, & loinct, à lécontre de la corroſion de lurine: auſſi

de peur, quil ne se defeiche, & retire, en sorte, quil nempesche, que lurine seule, où la semence, ne ysse facilement.

Pour ces utilités, il conuient que nature ayt donné tel ayde à la verge virile. Parquoy es masles, ces glandules sont dune grandeur notable.

*De la verge virile.*

*Gal. li. 5. cap. 15. de usu part. et 6. de locis affect. cap. 6.* **L**Es masles surmontent les femmes par vne particule insigne, situee au bout du col de la vescie: les Grecz lappellent caulos, & les Latins colis, penis, mentula, virga, & pudendum virile. Cest vn corps nerueux, pendant, long, caue, & de toute part fistuleux: exceptee icelle partie, quon appelle glâs en Latin, & balanús en Grec. Item il est sans humeur. Et est tresconuenable au coït, & à ietter le sperme dehors. Il ha sa naissance des os du penil, & principalement des superieures parties diceux. Car ainsi il est fort esloigné du siege: & ha vn lieu bien opportun au coït venerien. Il sort de los, tout ainsi que tous autres ligaments. Toutesfois il est seul caue, entre tous ligaments: pource que son vtilité ainsi le requiert. Je dy de rechef, quil sort de los: à cause de sa substance, aussi à cause de son action: pour laquelle parfaire, mieux luy ha esté, quil feust gardé tout droit,

droit, & ferme, ayant sa naissance d'un corps ferme, & stable.

Aumy lieu des parties inferieures de la verge virile, est constitué le conduit du sperme: lequel aussi est commun à l'urine: & est estendu en l'ogitude. Dessus ce conduit gist vn nerf concaue: lequel nerf quand il est remply desperit, ou vent, lors il se estend: & la verge virile se dresse. De costé, & dautre il y ha deux muscles adherents: à celle fin, que le conduit distrait dune part, & dautre, comme par maniere de dire, de deux mains, soit dilaté: lors que toute la verge virile demeure droite, & ferme. Car il est vtile, quand le sperme yst hors, que le conduit soit gardé bien large, & droit, par telle construction. A celle fin, que tout le sperme contenu à soy mesme, paruienne incontinent aux sinus des matrices.

A lenuiron des parties honteuses nécessairement prouiennent des poilz, pource que icelles parties sont chaudes, & humides. Et les poilz donnent couuerture, & aornement à icelles parties: tout ainsi que nates, ce sont les fesses, seruent au siege: le prepuce, à la verge virile.

La sommité de la verge, en Grec est appellee balanos, en Latin glans. En laquelle le nerf fistuleux point nêtre. Et pource tous-

iours elle ha vne magnitude egale.

*Galen in* La cuticulaire excrescence, caue par de-  
*introduc.* dens, laquelle couure le balanús, est dite  
*et lib. 2.* en Grec poste, en Latin præputium. Tou-  
*de semine* tesfois Aristote le prend autrement, car il  
*et 14. de* dit, que le cuyr, qui couure le balanús, ne  
*usu part.* ha point de nom: & tout ce, qui est com-  
*Arist.ca* posé de ce cuyr, & du balanús, il l'appelle  
*pi. 13. li. 1.* præputium.

*de histo.* La partie inferieure de la verge, incli-  
*animal.* nant en longitude, est appelée en Grec  
*Galen in* raphe, cestadire future. Et la partie, la-  
*introduc.* quelle est produite iusques au siege, est  
 appelée en Grec tauros.

*Gale. lib.* L'espace entre la verge, & le siege, est ap-  
*1. de locis* pellé en Grec perinæon, en Latin semen.

*affect. et* *Des veines, arteres, et nerfs, qui sont*  
*aphor. 80.* *aux parties genitales: tant sexe*  
*lib. 4.* *masculin, que féminin.*

*Gale. lib.* **A**Vx parties genitales paruiénent vei-  
*14. de usu* nes, & arteres: non seulement bien  
*part:* grandes, mais aussi doubles. Lune des con-  
 iugations dicelles viét des lieux prochains  
 aux rōgnons, lequel (ainsi que nous auons  
 dit) est distribué aux testicules. Et aux fem-  
 mes passe oultre le fond des matrices: com-  
 me sera dit cy apres. L'autre (lequel est se-  
 paré des vaisseaux, qui sont à os sacrū) est  
 implanté aux parties inferieures, seulemēt  
 pour

pour les nourrir. C'est asçavoir es femmes, là ou commence le col de la matrice, & es masles, ou commence la verge virile. Car toutes les parties inférieures des matrices, & le col dicelles, dauantage toutes autres parties appartenâtes tant à la matrice, qu'à la verge virile, sont nourries par iceux vaisseaux. Or l'utilité dicelles veines, & arteres est double, lune à cause quelles sont grandes: l'autre à cause que elles sont doubles. Car d'autant que les matrices preparent le nourrissemēt, non seulement pour elles, mais aussi pour les enfans conceuz en icelles, qu'on appelle en Grec *embrya*, & en Latin *fœtus*, pour ceste cause elles ont besoing de grans vaisseaux. Semblablement les testicules ont besoing de grans vaisseaux: à cause que il faut non seulement quilz soyent nourriz, mais aussi que ilz engendrent le sperme.

La coniugation des nerfz mediocres est *Galibid.* estendue, & diuisee de la spinale medulle de os sacrum, avec les vaisseaux procedās, & yssāns d'autres vaisseaux, lesquelz sont iouxtes os sacrum. La grosseur de iceux nerfz est exactement mesuree, selon leur utilité. Car toutes les matrices, & aussi toutes les parties des masles, lesquelles appartiennent aux testicules, & à scortum, c'est-à-dire à la bourse, n'ont pas eu besoing de  
à 3 plu

plusieurs , & grans nerfz : ains de peu , & petis nerfz , qui deuoyent estre distribués en icelles parties: dautant que elles ne seruent ny au sentiment plus exquis , ny au mouuement volontaire : mais à celle fin , que elles ne soyent les conduitz , & voyes des excremens , comme sont les intestins. Mais la verge virile , & le col de la matrice , & autres parties appartenantes à la partie honteuse , comme requerans quelque sentiment plus exacte , à cause du coit venerien , non sans cause , ont plus de nerfz , & plus insignes . Parquoy ce iug de nerfz nest pas fort subtil , comme celuy , qui est au foye , à la ratelle , & aux rongnons. Aussi nest il pas si infigne , ne si gros , comme celuy , qui est au ventricule : ains est moyen en grosseur , autant que il est possible : pource quil en deuoit aduenir vne vtilité mixte , ou moyenne , aux instrumens.

*Du siege.*

*Gal. 3. de  
usu part.*

**L**E siege , en Latin anus , ou sedes , en Grec hedra , ne pouuoit auoir meilleur lieu , par lequel les excremens du ventre fussent euacués. Toutesfois il en y ha daucuns , qui accusent nature , de ce quelle nha pas ordonné , que les excremens fussent euacués par les pieds. Mais telz accusateurs  
de

de nature sont si voluptueux, & pleins de delices, qui leur greueroit se leuer du li& , pour euacuer les excremens. Desquelz cōbien ridicule soit leur accusation à lencontre de nature, Galien le demōstre tresbien au troisieme liure de vsu partium.

Les fesses, en Latin nates, en Grec py- *Gal. lib.*  
gæ, ou gloti, sont composees de muscles *15. de vsu*  
charneux: lesquelz ne sont pas accourcis, *part.*  
& ridicules, es hommes, comme es Singes, entre tous animaux: ains sont tresbien situés: tant pour l'ornement des parties necessaires, que aussi de peur, que le siege ne fust contus, ou brisé, ou autrement affligé, en se seant.

Il y ha trois muscles au siege: cest asçauoir, *Gal. li. 4.*  
2 Deux obliques, non pas grans, mais *2. 5. de*  
membraneux, & larges, en chacune par- *usu part.*  
tie du siege, situés sur le muscle rond: *2. 6. de*  
lesquelz sont produits du ligament, qui *Anat. ad-*  
naist de os sacrum, & aussi du penil, du- *ministr,*  
ne part, & d'autre. L'utilité de ces deux  
muscles est, quand le siege yst hors, par  
quelques grans efforts, de le retirer de-  
rechef en hault.

1 Au dessoubs de ces deux il y en ha vn  
seul, & sans pareil, transuersal: lequel  
circuit, & environne le siege: à cellé fin,  
quil cloye lintestin droit, & quil le serre  
fort. Pour ceste cause les Grecz lont ap-

pellé sphincter, cest adire compriment, & constringent: lequel nom est deriué dun verbe Grec sphinge, signifiât comprimer, & constrindre, de peur que continuellement, & intempestiuement ne se feist excretion: laquelle se fait commodement, quand ce muscle est relaxé, & que les muscles de épigastrium pressent fort, & egaleement, de toute part: & que le diaphragme (lequel est au dessous diceux muscles) obliquement comprime: ioint aussi, que les muscles intercostaux aydent au diaphragme: & que larynx est clos, de peur que lon ne respire, & aussi ne sensuyuent aucunes efflations: à loccasion desquelles, lexcretion ne se pourroit pas bien faire par le siege. Mais en tout autre temps ce muscle circulaire est serré, & clost lorifice du siege.

*Gal. lib.* Il y ha vn corps, lequel exterieuremēt gist  
*1. de usu* sur ce muscle circulaire transuersalement:  
*part.* iouxte lextremité duquel corps est faite la fin du siege, dont la substance est moyenne entre le cuyr, & le muscle: cōme composée de la mixtion des deux ensemble, telle que est lextremité des laures. Lutilité de ce dit corps est quasi semblable à celle du muscle, excepté que le muscle ha plus forte action, que nha ce dit corps.



En ce lieu il y ha de petites veines emi- *Parlue*  
nentes, ayâs lorifice ouuert:lesquelles par *Aegine*  
temps certain , & ordonné , euacuent un *ta ca. 59.*  
sang melancolique. Parquoy on les ap- *lib. 3.*  
pelle en Grec hæmorrhoides, & en Latin  
mariscæ, selon aucuns. Lesquelles, quand  
elles sont par trop euacuees, il aduiét, que  
l'habitude du corps se resoult en hydropi-  
sie. Aucunes sont cachees : & pource sont  
appelees hæmorrhoides cæcæ, cestadire  
occultes, & cachees.

*Des uaisseaux spermatiques , & des  
parties genitales , es  
femmes.*

**T**Outes parties, qui sont es hommes, *Ga. 14. de*  
tu les trouueras aussi es femmes. Il *usu part.*  
ny ha autre difference, sinon, que es fem- *Et lib. 2.*  
mes icelles parties genitales sont cachees *de semine*  
dedens: mais es hommes elles sont dehors  
iouxte le perinæum. Or quelles que tu  
voudras imaginer les premieres , tu les  
trouueras toutes semblables lune à l'autre,  
cestasçauoir en renuersant par dehors  
les parties des femmes, & les parties des  
hommes par dedens; & en les repliant. De  
linuersion desquelles, & de la maniere, en  
quoy elles sont semblables, & correspon-  
dentes, voy le quatorzieme de viu parnũ,  
& le deuxieme de semine.

*Galen.* Es femmes, cōme es hommes, de la veine de dissect. ne caue, & de la grande artere, qui est au vulu. 1. rē dessoubz, procedent deux veines, & deux 14. de usu arteres: cest asçauoir vne de chacun costé, part. et 1. La veine procede de la veine caue: & l'artere procede de la grande artere. L'une de la dextre à la dextre: l'autre de la fenestre à la fenestre. Et deuant que elles soient inserées, & insinues à la matrice, elles enuoyent des rameaux aux testicules. En apres elles sont vnies au corps de la matrice; & le composent, & tissent. Pour certain chacune veine, ou artere, apres estre portee aux parties laterales de la matrice, elle est diuisee en deux rameaux: dont lun allant au fond de la matrice, est du tout distribué en iceluy fond, en plusieurs manieres. L'autre depuis ce lieu, sen va lateralement, & est implanté aux testicules: lesquels sont adiacens aupres de la matrice. Ce rameau est anfractueux, & tortu: & ainsi que es hommes se separe, & implante au lieu, ou l'artere, & la veine se finissent au vaisseau spermatique: lequel vaisseau entre dedens les cornes de la matrice, de costé, & d'autre: par lesquelles cornes, le dit vaisseau spermatique, ayāt aucuns pertuis lateraux, enuoye le sperme dedens la matrice. Car d'autant, quil estoit necessaire, que la femme enuoyast le sperme en soym

soymesmes, & non hors de son corps, pour icelle cause nature ha implaté la matrice des vaisseaux, lesquelz reçoivent le sperme des testicules: & dauantage ha constitué, que lesdits vaisseaux iettaient le sperme en la capacité interne, par les cornes de la matrice: desquelles nous parlerons bien tost apres. Ces vaisseaux es femmes sont estroits, & briefz, & moins durs: toutesfois ilz sont suffisans pour receuoir, & pour enuoyer le sperme.

*De la matrice.*

**L**A matrice, en Grec metra, & hystera, *Gal. lib. de dissec.*  
 En Latin matrix, vulua, vterus, corre- *vulua: et*  
 spond au scrotum viril, si elle estoit ren- *14. de usu*  
 uersée, & estoit prominente dehors. Elle *part.*  
 est située entre la vescie, & lintestin droit,  
 & gist quasi du tout sur lintestin droit:  
 toutesfois elle surmonte la vescie le plus  
 souuét, iouxte l'ombilic, ou est le fond de  
 ladite matrice. Mais iouxte la partie hon-  
 teuse, la vescie excède la matrice par son  
 col. La matrice est opportune, & conue-  
 nable, tât pour le coït venerien, que pour  
 receuoir le sperme: & dauantage pour lac-  
 croissement de lenfant conceu, & pour  
 lenfanter, quand il est parfait.

La figure de la matrice, selon tout son *Gal. lib. de dissec.*  
 corps, est semblable à la vescie: si tu exce- *vulua.*  
 ptes

pres les cornes de ladite matrice, que on appelle autrement apices. Car elle ha vn fond, & vn col. Le col paruiet iusques à la partie honteuse, & le fond vient pres de l'ombilic.

*Galen.* La magnitude de la matrice n'est pas de dissec. egale en toutes femmes. Car celle, qui ha nulua: et enfanté, lha beaucoup plus petite, que cel- 14. de usu le, qui est enceinte. Et celle, qui nenfanta part. iamaïs, lha encores moindre. Aussi à cause des aages, celle, à qui le temps ne permet pas encores auoir compagnie dhomme, le ha moindre. Oultreplus celles, qui croissent encores, ont la vescie beaucoup plus grande, que la matrice. Mais celles, qui sont parfaites, & ne croissent plus, ont la matrice plus grande, que la vescie. Car la vescie se augmente selon la proportion des autres parties: pource quelle sert egale- mēt à tous aages. Mais la matrice ne peult pas bien, & cōmodemēt faire son action, ne quand les femelles croissent encores, ne quand elles sont vieilles. Voy la cause au quatorzieme De usu partium.

Depuis le fond de la matrice, iusques à l'orifice, & extreme fin, l'espace n'est pas egal en toutes. Car l'espace mediocre, & le plus souuent, est de la longitude de vnze doigts: Mais quant à la latitude, la matrice est estendue. iusques aux deux Flancz, appellés

appellés Ilia:& ce par les deux cornes, autrement apices. La profondeur de la matrice est circonscripte, cestadire limitée, & comprise, depuis lintestin droit,iusques à la vescie.

Aux matrices ha suffy vne seule tunique *Galibide* que, oultre le peritoine, pource que elles sont nourries,& alimentees dun sang pur, & bening. Laquelle tunique est veneuse, aspre, & scabre en la partie interieure, & principalement vers le fond. Et est tissue de toutes manieres de fibres: pource quil falloit non seulement que elles attirassent la semence de lhomme, mais aussi que elles la retinssent au téps, que elles ont conceu: & dauantage estoit necessaire denfanter lenfant, quand il est parfait.

La tunique de la matrice se portât bien, *Gal.lib. de dissec.* & naturellement, est de diuerse grosseur: *nulus.* cestasçauoir,

1 Selon les aages: Car à la premiere aage, tout ainsi que elle est petite, aussi est elle subtile. En apres quand les méstrues commencent à fluer, sa grosseur aussi se augméte selon sa grandeur. Et si la femme ha paisé le temps de conceuoir, ou dauoir les fleurs, tout ainsi que sa magnitude se diminue, aussi fait sa grosseur.

2 Selon le temps des méstrues: Car quand la purgation des menstrues sapproche, lors

lors ladite tunique apparoist grosse, & enflée d'autant que elle est arrosée du sang. Mais au contraire, quand ladite purgation menstruale est ia passée, lors elle est subtile, & seiche.

- 3 A cause de la cōceptiō: Car à vne, q ha porté enfant, elle est plus grosse, & tant plus souuēt elle ha porté, tāt plus elle est grosse. Derechef au cōmécemēt de la cōception, elle deuïet grosse. Et quand le tēps denfanter se approche, elle deuient plus grāde, toutesfois elle est subtile: car la grosseur sen va en grādeur, & amplitude. Entre le tēps de la cōception, & de lenfantemēt, elle se porte mediocremēt.

*Galen.  
de dissect.  
vulua: et  
14. de usu  
part. 2. de  
semine,  
Apho.  
46. et 51.  
lib. 5.*

Or ainsi que tout le corps est double, cest-à-  
asçauoir à dextre, & à senestre, semblable-  
ment la matrice ha deux sinus, lun à la  
dextre, lautre à la senestre: lesquelz se ter-  
minent en vn col, qui est correspondant à  
la verge virile. La difference est, que la  
verge virile est située dehors, mais le col  
de la matrice est dedens. Ce col (lequel na-  
ture ha muny parauāt, comme vne voye,  
pour receuoir le sperme viril, & pour en-  
fanter lenfant, que les Grecz appellēt em-  
bryon, & les Latins foetus) est musculeux,  
& nerueux, dune chair dure, & deuïet car-  
tilagineux, & tousiours plus dur, & par  
espace de temps degendre en cartilage:

comme

comme es femmes, qui ont souuentesfois frequenté les coitz veneriens, ou qui sont desia vieilles. Parquoy Herophilus compare la nature de ce col, à la superieure partie de la trachée artere. Ce col illec, ou il commence, & la matrice se finist, ha vn trou, que on appelle os matricis, cestadire la bouche, ou orifice de la matrice, par lequel la femme purge ses menstrues: & reçoit le sperme de l'homme: & enfante lenfant. Cest orifice, au temps du coït, est si ouuert, & si tendu, que le sperme entrant par vne large voye, paruiet facilement au sinus de la matrice. Apres que la femme ha cōceu, il se clost: & est si serré, que rien ne se lasche ny dedens, ny dehors, tellement que la moindre chose du monde ny pourroit entrer. Mais à lenfantement, il sestend fort: en sorte que tout lembryon, cestadire lenfant, passe par ceste voye. Ce nest pas donc sans cause, si le col de la matrice est nerueux, & dur. Le dy nerueux, à celle fin, quil se retire, & qui se dilate parfois. Et dur, à celle fin, que en telles mutations il ne soit molesté, ou affligé: & aussi, quil s'adresse pour receuoir le sperme: Carpus, & aucuns Anciens anatomistes disent, que au mylieu de ce col les pucelles ont vn pannicule, quon appelle le pannicule virginal: lequel en Grec est dit hymen:

mén : ou hymenæon, selon les autres. Et (ainsi quilz disent) au premier coït, ou combat Venerien, ledit pannicule est rompu. Ce que nest pas vray semblable: car en l'anatomie desvierges on ne trouue point ce pannicule: ioint que Galien nen ha point fait mention, au moins que iaye leu. Mais ie croy plustost, que le col, lequel est musculueux, et nerueux, est ainsi clos, et estroit: tant seulement à cause de sa texture. Et pour le dilater, le premier coït, & combat est fort vehement, au moins si les femmes sont dignes de foy.

*GA. 14. et 15. de usu part. et 2. de semit.* Le col de la nature se finist en la partie honteuse de la femme, les Grecz l'appellent ædion gynæceon. Laquelle partie honteuse est, comme vne epiphysis, cestadire appendice, ou addition dudit col, semblable au cuyr, & correspondente au prepuce des masles. Laquelle est pour grace de ornement, ainsi que le prepuce. Et dauantage sert de couuerture mise au deuant, de peur que les matrices ne soient refroidies.

*Gal. lib. 15. de usu part.* Ceste fin de la partie hôteuse de la femme, laquelle est ornee de poilz, est appelée en Grec Æter. Et les parties, qui environnent le sinus, les Grecz les nomment pterygemata, cestadire aisles. Entre ces aisles il y ha vne petite chair diuisee en deux: laquelle en Grec est appelée nym-  
phe.



phe, ou nymphe, & en Latin colliculus. Et pource quelle est fort prominente, ou yssante hors, les Egyptiens ont accoustumé de la couper aux vierges: cōme recite Galien en l'introductoire. Or tout ainsi que lunule, en Grec gargareon, est la deffence de pharynx, aussi la partie dite nymphe est pour defendre la matrice: car elle couure le col de ladite matrice, & l'engarde d'estre refroidi.

Le col de la matrice ha deux extremités.

*Apho.*

1. Lune par dedens, là ou commence le dit col, & la matrice finist. On l'appelle proprement os vteri, cestadire lorifice, ou bouche de la matrice. *46. lib. 5.*

2. L'autre est coniointe à la partie honteuse de la femme, & est appelée lorifice du col de la matrice, & non pas lorifice de la matrice: & non sans raison.

*Gal. de dissect.*

Pour sçauoir, avec quelles parties la matrice ha colligance, & connexion, il fault veoir le liure de l'anatomie de la matrice.

*nulua.*

*Gal. 14.*

*Et 15. de*

*usu part.*

*Et 1. de*

*semine.*

*11e de dis*

*sect. nulua.*

*Et de*

*dissec. ue-*

*narum.*

Quant aux nerfz, veines, & arteres de la matrice, nous en auons dessus parlé: là ou auōs dit, que oultre les vaisseaux spirituels, qui sont distribués aux testicules, & au fond de la matrice, il y ha vn autre iug de vaisseaux, cestasçauoir deux veines, & autāt d'arteres: lesquelles depuis les vaisseaux, qui sont à os sacrum, sont

e implan

implantees aux basses parties de la matrice, vn peu au dessus de la premiere apophyse du col. Dauantage sont dispersees en la matrice, & au col dicelle. Par ces vaisseaux sont nourries toutes les parties inferieures de la matrice, & le col dicelle, aussi toutes autres parties appartenantes à la partie honteuse. Hippocrates Apho. 45. libr. 5. appelle les orifices de ces mesmes vaisseaux, lesquels paruiennent aux matrices, cotyledones: nous les appellons en Latin acetabula: par lesquels la superfluité du sang est deriuee chacun moys de tout le corps en la matrice. Il y ha des veines, & arteres dites umbilicales, adherentes à iceux: par lesquelles lenfant est lié dedens la matrice, & attire le nourrissement. Mais nous en parlerons vn peu apres. Item deux autres veines, naissantes de ce mesme lieu, mōtent en hault, par les muscles droitz. En apres elles cōuiennent avec les extremités des veines, lesquelles descendent par le thorax, iusques aux hypochondres. Oultreplus dune mesme racine deux autres petites veines, cestascauoir de chacun costé vne, sont portees à la matrice: par lesquelles principalement les mamelles ont cōmun ion avec la matrice. Ce pareil de veines paruient hors des muscles à la partie honteuse, soit homme,

ou femme. Et descend de costé, & d'autre, iouxte la commissure des os du penil.

*Des testicules de la femme.*

**L**es testicules de la femme gisent aux *Gal. lib.* deux costés de la matrice, iouxte le *de disse.* fond : & sont deux, cestasçauoir vn de *mulua.* chacun costé : lesquelz se eslongnent vn *Itē 2.* de peu au dessus des cornes de ladite matri- *semine, et* ce. Et reçoient yne reuolution de vais- *14. de usu* seaux, semblable aux masles, toutes fois ne *part.* paruiennent pas en vn mesme lieu, comme es masles. Pource quil nestoit pas conuenable, que la femme iettast le sperme dehors, à la maniere du masle, ains le deuoit ietter dedès sa propre matrice. Les testicules de la femme sont beaucoup plus petis, & plus imparfaitz, que ceux de lhōme. Item il y ha grande difference, quant à la figure, & construction. Car les testicules de la femme sont larges, & glanduleux, moins rares, & laxes, mais plus humides : à cause quilz sont de plus froide substance. Car ilz nont point esté estenduz, ne enflés, par la chaleur naturelle : & par maniere de dire, nont point esté fermentés.

La matrice ha muscles, lesquelz descendent aux testicules, depuis les muscles de *Gal. 14.* hypogastrion; comme auons dessus dit, *de usu part.*

*Gal. de cōsec. mul. na.* Chacun des deux testicules est couuert de sa propre membrane, telle comme celle des masles, qu'on appelle dartos. Toutefois les testicules des femmes nont point de membrane dite erytroides, ne de scrotum, cest adire de bourse.

*Gal. 14. de usu part.* Oultre plus la superieure partie des testicules, laquelle est appelée epididymis, nest point sensible, & manifeste, es testicules des femmes: mais ou du tout ny en ha point, ou du tout elle est fort petite: à cause que les testicules des femmes sont petis: & semblablement les vaisseaux spermaticques. Parquoy ce nest pas chose merueilleuse, si ce, qui les conioint, est petit, cest asçauoir epididymis.

*Gal. libr. 1. de semi. ne.* Il ha esté beaucoup plus conuenable, que nature ayt donné des corps glanduleux, que nous auons appellés glandulosi prostatae, à la partie honteuse du masle. Car es femmes le col de la matrice nest ne long, ne nud (comme est la verge virile) mais est situé dedens: dauantage il reçoit beaucoup d'humidité, des parties, qui le cōtiennent: ioint quil est arrosé des fleurs mēstruales: lesquelles vtilités aduiennent au membre viril, par icelles glandules: cōme nous auons dit.

*Des cornes de la matrice, qu'on appelle autrement apices.*

VN peu au deffoubz des testicules, *Gal. libr.*  
dune part, & dautre, aux costès de *de dissec.*  
la matrice, apparoissent aucunes addi- *uulnæ.*  
tions, ou apophyses mamillaires, inclinã- *2. de semi.*  
tes aux flancz, correspondentes aux vais- *ne.*  
seaux spermatiques dessusditz, que nous  
auons nommés varicosi parastatae, & vul-  
gairemēt vasa deferentia. Herophilus cō-  
pare la figure dicelles additions, à vn de-  
my cercle: Diocles les compare à des cor-  
nes naiscentes. Pourtant les ha appellees  
en Grec ceræas. Par icelles cornes la ma-  
trice attire le sperme de la femme hors de  
ses propres testicules: tout ainsi quelle at-  
tire le sperme de l'homme, par son col. Car  
dautant quil y ha deux spermes, aussi y  
ha il deux colz, & par maniere de dire  
deux estomachz en la matrice: par les-  
quelz elle reçoit chacun sperme familier à  
soy. Aussi les femmes en songeant à leur  
plaisir (tout ainsi que les hommes) sans  
auoir cōpaignie dhōme, iettent leur sper-  
me, par les cornes, dedens la matrice. Le-  
quel sperme illec corrompu, est cause de  
tresgrandes maladies. Car es femmes non  
seulemēt les vaisseaux spermatiques sont  
remplis de sperme, mais aussi les testi-  
cules.

*Des parties, que nature machine,  
quand une femme est grosse.*

*Gal. libr.  
1. & 2. de  
femine.*

**Q**Vand vne femme ha cōceu (laquelle chose se fait, quand les menstrues commencent, ou cessent, & non en autre temps: ainsi que dit Galien au liure de l'anatomie de la matrice) incōtinent de toute la part, & portion exterieure du sperme, laquelle touche à la matrice, sont engendrees les mēbranes, que les Grecz appellēt hymenes. Toute l'autre part, & portion du sperme ha ses facultés naturelles. Cest asçauoir la faculté, ou vertu attrahrice des choses propres, par laquelle elle ha de coustume de retenir, & alterer, & preparer son nourrissement: & expultrice des choses estranges, & superflues. Car il faut, que la semence genitale soit telle; à celle fin, que incōtinent apres que elle est ietee dedens la matrice, vne portion de sa substance coalesce, & vienne en membrane, & l'autre en vaisseau, & que l'autre soit idoyne à la conformation.

Du sperme sont engendrees trois membranes, lesquelles enucloppent lenfant: subtiles, & semblables à toylés daraignes. Lesquelles non seulemēt se touchent, mais aussi sont coalescentes, & vnies ensemble, en plusieurs lieux: & en beaucoup de lieux elles sont separees lune daucc l'autre, par subtilz filamētz, lesquels paruiennent de lune à l'autre. Nature (autant que luy ha esté

esté possible) les ha voulu vnir: à celle fin, que til y auoit faulte de propre vertu en lune dicelles, que toutes les autres luy en communiquassent.

1 L'exterieure membrane est subtile, & forte neantmoins: laquelle enuironne les deux autres, & aussi lenfant par dehors, & par dedens elle oint toute la matrice: à celle fin, que ce, qui est au dessoubz d'elle, ne touche aucunement à la matrice. Et par le moyen dicelle, lenfant est lié avec la matrice. Les Grecz appellent ceste membrane chorion, & les Latins *secundæ*, & communement *secundina*. Les obstettrices, ou sages femmes l'appellent *l'arriere fays*: Les autres l'appellent *la deliurance*. Pource que (ainsi comme ie pense) quand ceste membrane est dehors, lors la femme est deliuree de lenfantement.

2 L'autre qui sensuit, est fort subtile: laquelle est nommee en Grec *allantoides*, à la similitude dun farcy, que les Grecz appellent *allas*. Ceste membrane est faite deuât celle, qu'on appelle *amnios*, ou *amion*: & prend son commencement du conduit appellé *ourachos* en Grec, cestadire *vrinal*. Et couure seulement les parties enuinées, cōme la teste, les fesses, & les piedz de lenfant. Elle est debile,

& estroite : pource quelle est faite du sperme féminin tant seulement. Elle est longue : car elle s'estend iusques aux deux cornes de la matrice, & paruient iusques au fond de la vescie de lenfant, par vn conduit large, droit & insigne: tellemēt quelle est coniointe par le conduit appellé ourachos, lequel est situé au mylieu des deux. L'utilité de ceste membrane est de recueillir lurine de lenfant, iusques au temps de lenfancement.

- 3 La derniere membrane est subtile, environnant lenfant de toute part : cōme receuant la sueur dudit enfant. Elle est appellee en Grec amnios, ou amnion, qui vault autant à dire, cōme membrane dun agneau, à cause de sa mollesse. Les obstetrices (comme dit Albert) l'appellent larmure de lenfant. Et selon Aui-cenne abgas.

*Gal. libr.* En tout orifice des vaisseaux, lesquelz  
*15. de usu* paruiennent intrinsequement en la matrice,  
*part.* par lesquelz aussi estoit porté le sang menstrual (comme nous auōs dessus dit) au tēps que la femme est grosse denfant, sengēdre vn autre vaisseau. Cest asçauoir vne artere à lorifice de lartere, & vne veine à lorifice de la veine: tellement que les vaisseaux, qui sengendrent, sont egaux en nombre aux orifices, lesquelz paruiennent



nent dedens la matrice. Il y ha donc en tout, quatre vaisseaux enuiron le conduit appellé ourachos, cestasçauoir deux veines en hault, & autant de arteres en bas: lesquelles sont implantées à lenfant seulement par lombilic. Pour ceste cause cōmunement on les appelle vmbilicales: par lesquelles (cōme par aucuns troncz) lenfant attire le sang, & lesprit.

Or chacun desditz vaisseaux est petit, *Gal. ibid.* quand il sort de la matrice: à la similitude *Et libr.* des extremes racines dun arbre, lesquelles *de disse.* sont fichees en terre. Mais apres que les- *unua.* ditz vaisseaux ont vn peu procedé plus oultre, ilz se conioingnent, & coalescent ensemble: en sorte que de deux nen est fait que vn. Et derechef chacun diceux se conioint avec son semblable, & dun mesme genre: cestasçauoir veines avec veines, & arteres avec arteres: & ainsi tousiours consequemment, iusques à cē, quē tous les petis vaisseaux soient cōiointz en vn: lesquels comme aucuns troncz à dextre, & à senestre, sont implantés à lenfant, par le lieu de lombilic. Car lombilic, lequel tient le mylieu du corps, nest autre chose, que ces quatre vaisseaux, ayans au mylieu de eux le receptracle de lurine, dit en Grec ourachos: lequel préd son origine du fond de la vescie de lenfant, & deriue lurine en

la membrane dite allantoides. Car es enfans conceuz nouuellement le fond de la vefcie adhère à l'ombilic. Mais des quatre vaisſeaux deſſusditz, il y ha deux veines, leſquelles conuiennent en vne, incōtinent apres que elles ont paſſé, & ſurmōté l'ombilic de lenfant. Et ceſte veine ſe va implanter en la partie caue du foye. Mais les arteres demeurent longuement deux, & puis finalement ſe implantent en la partie de la grande artere, qui eſt aux reins, en Latin nommés lumbi.

Entre tous ces grans vaisſeaux, & les petis, leſquelz ſont implantés en la matrice, eſt ſituee la membrane dite chorion, cōme vne racine de pluſieurs troncz. Laquelle neſt ſinon vne multitude de pluſieurs vaisſeaux, coniointz enſemble par vne ſubtile membrane: leſquelz neſt pas facile de nōbrer. Ceſte membrane lie enſemble leſditz vaisſeaux, & adhère tout alentour diceux: & eſt implantee aux parties intrinſèques de la matrice. Ceſte membrane eſt ſituee double, au deſſoubz de toutes les parties de la matrice, leſquelles ſont entre les oriſices: & puis ſe produit, & procede avec tous les vaisſeaux deſſus nommés, d'une part, & d'autre, conurant la moytié de chacune partie: tellement que ceſte membrane double leur ſert de veſtement

vestement, ou couuerture, de muniment,  
& ligament, tant pour lier ensemble les-  
ditz vaisseaux, que pour les lier avec les  
deux parties de la matrice.

Quand aux autres deux tuniques, celle *Galibid.*  
qui est appelée allantoides (laquelle nous *¶ 1. de*  
auons dit estre pertuisée, iouxte la vescie *semine.*  
de lenfant, pres de ourachos) elle ha esté  
faite à receuoir lurine. Car il estoit beau-  
coup plus expedient à lenfant, de rendre  
lurine par lombilic, que par la verge: à  
cause de la rectitude, & magnitude de ou-  
rachos: à lentour duquel il ny ha nul mus-  
cle par dehors, pour empescher lexcretion  
intempestiue des excrements. Comme en  
ceux, qui sont desia nays, il y havn muscle  
au col de la vescie, lequel col est aussi grâ-  
dement oblique. Car tout temps est tem-  
pestif, & idoyne à lembryon, ou fœtus, à  
excerner cest excrement: ce que nest pas  
à ceux, qui sont desia parfaitz. Donc luri-  
lité de ceste membrane est, pour receuoir  
lurine de lenfant desia formé. Car il estoit  
nécessaire à lenfant, qui est dedens la ma-  
trice, prouenir autant, & de telz excre-  
ments, quil en prouient en ceux, qui sont  
desia nays. Toutesfois lurine, & la matiè-  
re fecale sengendrent apres, que les parti- *Gale.lib.*  
cules sont conformees, & vnies ensemble. *15. de usu*

Il appert euidemment, que lhumeur, *part.*  
qui

qui est dedens la membrane allantoides, est plus subtile, plus citrine, & plus acre, que celle, qui est dedens amnios: en sorte, que elle fait horreur à lodoration de ceux, qui incisent icelle membrane. Pour ceste cause lurine est separee de lenfant: tellement que elle ne touche ny au cuyr, ny aux veines de la secundine, de peur que son acrimonie ne blessast les parties prochaines. Mais ce, qui est assemblé dedens la membrane amnios, en maniere de sueur, est tout à lenuiron de lenfant: & ne peult nullement blesser son cuyr, ains ha vne grande vtilité. Car lenfant, quasi nageant en ceste humeur, est enleué, & porté: en sorte que il nest pas si pesant, ne si grief aux ligaments, par lesquelz il est coherent avec la matrice. Aussi au temps de lenfantement, lenfant yst plus facilement par le col de la matrice: dauant que il est fort humecté de ladite humeur. Laquelle chose alors luy aduient, pource que il est adonc necessaire, que les membranes se rompent. Car ceste humeur non seulement est vtile à lubrifier, & faire couler les enfants, mais dauantage rend le col de la matrice plus facile à se dilater grandement. Pource que quand il est humecté de ladite humeur, il en deuient plus mol, & plus facilement est dilaté. Et ainsi

nature

nature ha vsé de ces humeurs (lesquelles il  
falloit necessairement produire , à cause  
de lenfant) tant pour le porter sans dou-  
leur, que aussi pour lenfanter plus tost, &  
plus facilement. Cest assez parlé du  
ventre inferieur: en la table se-  
quente nous traicterons  
des parties du  
Thorax.

FIN DE LA I. TABLE.





# T A B L E S E- C O N D E.



## *Du Thorax.*

*Gal. 6. et  
7. de usu  
part.*



**T**HORAX cest tout ce, qui est circōscript, cest adire cōpris par les costes, d'une part, & d'autre : comme vn parc bien fort, enuironant le cœur, & le poulmon: pour tutele, & defence. Que nature ha fait non pas du tout osseux, cōme est le crane: ne du tout charneux, comme le pigastre: mais par vne cōmutation d'ordre, elle y ha mis des os, & des muscles, lun apres lautre.

Le thorax ha trois parties.

- 1 La fin superieure par deuant, ce sont les clauicules, en Grec *clēs*, en Latin *clauæ*, ou *clauiculæ*. Et sont ainsi appellees, pource que elles cōferment les *omoplates* avec *sternon*, qui est l'os pectoral. Ceste fin est dite vulgairement la *furcule* superieure. Les cauités qui sont au dessous de ces clefz, ou clauicules, sont appel

appelees en Grec sphagæ, en Latin iuguli : tellement quil y ha deux clauicules, & autant de iugules : cestasçauoir le dextre, & le fenestre.

2 La partie moyenne est composee de sept os, lesquelz reçouyêt les sept costes vrayes. Et est appelee en Grec sternon, en Latin pectus, & os pectoris. A la fin duquel os pectoral il y ha vne cartilage ague, cōme la pointe dun glaiue: laquelle est vne certaine deffence, & forteresse de lorifice de lestomach, & de la partie du diaphragme estant illec, & consequēment du cœur. Les Grecz lappellent xiphoides, & les Latins entiformis, ou mucronata, pource quelle est à la forme, & similitude dune espee. Vulgairement on lappelle mālum punicū, ou mālum granatum. Nous lappelons en nostre langue Françoisē, la fourcelle.

3 La fin inferieure du thorax, cest le diaphragme, ou autremēt phrenes en Grec, & en Latin septum transversum. Ceste fin est vulgairement appelee la furcule inferieure.

Les costes, que les Grecz appellēt pleuræ, ont double situation: cestasçauoir,

1 Anterieure, nōmee pectus, la poitrine.

2 Et la posterieure, ce sont les vertebres du dos, lesquelles sont autant en nombre,

*Gal. li. 8.  
de Anato.  
administ.*

bre, que il y ha de costes.

Le nombre des costes est de vingtquatre; douze de chacun costé: cestasçauoir,

7 Sept superieures, vrayes, & parfaites: lesquelles sont coniointes aux os de sternon.

5 Et cinq inferieures, nothes, imparfaites, & mendeuses, ou faulses: dont la huietieme cōsiste iouxte la racine de la cartilage xiphoides. Les autres quatre se terminent au costé du Thorax.

On ne voit guieres souuēt vn corps ayant treize costes: encores moins, qui nen ayt que vnze: tellement que à grand peine en pourroit on trouuer vn entre mille, ayant tel nombre de costes.

### *Des mamelles.*

*Gal. li. 7.  
& 14. de  
usu part.*

**T**Out ainsi, que les femmes ont deux matrices, aussi ont elles deux mamelles. Les Grecz les appellent titthoi, ou mastoi. Chacune manielle sert à sa matrice, cōme vn bon seruiteur. Au corps humain les mamelles sont adherētes à la poitrine, & gisent dessus le cœur: lequel est l'officine, ou boutique de la chaleur naturelle. Elles sont de substance glanduleuse, semblables à quelques feutres, & sont tissues de deux veines, & autant de arteres. Lesquelz vaisseaux ne naissent pas tout in-

contin



continent de la veine caue, ou de lartere du cœur. Mais quand elles sont desia paruenues pres des clauicules, de illec nature deduit au dessoubz de sternon deux rameaux de veines, notables: & autant de rameaux de arteres, produits ensemble. Et en ceste maniere finablement elle implante deux rameaux à chacune mamelle: ne faisant autre chose en ce tant long chemin, sinon que le sang soit parfaitement cuit dedens les vaisseaux. Lequel sang, quand il monte en hault, il passe par le cœur, & derechef descendant en bas fait vn rencontre: & est tousiours exagité, & esmeu par le mouuement du thorax. Et en telz erreurs, & discours, il se eschauffe, demourât en la partie, laquelle est en continuel mouuement. Toutes ces choses sont ytiles à la parfaite concoction du lait: lequel nest autre chose, sinon la superfluité du nourrissement.

Le tubercule au mylieu des mamelles, par lequel lenfant succe le lait, se appelle en Grec thele, en Latin papilla.

Les mamelles ont deux vtilités.

1. La premiere, & la plus grande, principalement es femmes, est pour donner nourrissement à lenfant, en receuant le sang elaboré, & bien cuit, des vaisseaux paruenants illec. Lequel sang par long,

f

&amp;

Gale. lib.

1. de sani-

ta. tuēda.

Gal. li. d.

usu part.

& anfractueux chemin est conuertý en laiët : à cause duquel les mamelles ont esté faites.

2. L'autre vtilité, à celle fin, que elles seruent de deffense, & couuerture au cœur, & apres quelles auront esté eschauffees du cœur, que elles le reschauffent : tout ainsi que les vestemens, de quoy nous sommes vestus. Mais es femmes elles croissent en grande magnitude, dont elles donnent au cœur ces deux vtilités, plus que es hommes : ioint que es femmes elles aydent aux viscères, qui sont dessoubz les hypochondres, lesquels sont moins chauldz es femmes, que es hommes.

*Gal. 14. de usu part.* Asçauoirmon pourquoy lesmamelles ont si grand consentement, & colligance avec les matrices, voy Galien au quatorzieme De usu partium.

*Des muscles du thorax.*

*Gal. 13. et 16. de usu part. et 5. de Anato. administ.* **I**L y ha plusieurs muscles au thorax, deisquelz  
 1. Les vns montent en hault, depuis la poitrine, & la region des costes : & par leurs extremités se implantent à l'os du bras, seruans à l'article de humerus. Dont les vns eslieuent le bras, lesquels ont besoin de vehemente action. Les autres deprim

depriment, ou abaissent le bras, lesquelz ne requierent pas grand force pour faire leur action. Les autres font l'adduction du bras. Les autres font l'abduction du bras au dehors. Les autres font mouuoir le bras circulairement, lesquelz sont robustes, & ont des tendons fort nerueux: pource, que tel mouuement circulaire est le plus violent de tous, & surmonte grandement le simple mouuement.

2 Les autres descendent à abdomen, ayans leur vtilité: cest asçauoir, quilz retirent vn peu en bas le thorax.

3 Les autres sont obiectés exterieurement au deuant des extremités des costes par deuant, iouxte la poitrine, & les vertebres. Et par derriere ilz serrent, & contraignent les iointures des extremités, & compriment vn peu le thorax.

4 Les autres sont dediés à la respiration. Oultreplus ces muscles, il y en ha encores d'autres: lesquelz descendent depuis le col, & les scapules, iusques au thorax: toutesfois ne sont pas propres audit thorax: Parquoy ce n'est pas icy le lieu en parler. Commençons donques premiere-ment aux muscles du thorax, lesquelz mouuent le bras.

*Gal. 3. de  
usu part.* Les muscles du thorax, qui mouuent le bras, sont vnze, ou douze, si tu veux.

- ¶ 5. de  
Anato.  
administ.*
- 1 Le premier, de mediocre grandeur, est superficiel: & situé au dessus de tous les autres. Lequel commence aux costes nothes, pres des hypochondres, ou præcordia: non pas loing de la mamelle. Et monte en hault obliquement, à l'article de humerus. Ce muscle ameine le bras à la poitrine, & le tire vn peu en bas: & est autheur de la plus basse depression.
  - 2 Le second au contraire naist des haultes parties du thorax: & est autheur de ladduction du bras en hault.
  - 3 Le tiers est le plus grand: lequel naist de tout l'os pectoral, situé au dessoubz de la mamelle. Ce muscle est aucunement party en deux: duquel les fibres gisent lune sur l'autre à la similitude de,  $\chi$ , lettre Grecque: dont les vnes sont estendues depuis la region inferieure de la poitrine, iusques à la plus eminente partie de l'article: par lesquelles le bras est amené en bas, non pas toutesfois si bas, comme du premier muscle. Les autres inclinent depuis le hault, iusques en bas, par lesquelles le bras est amené plus hault, non pas toutesfois si hault, comme du second muscle. Et quand toutes les deux manieres de fibres sont rédues, l'os

l'os du bras est amené à la poitrine, égal, & ne pendant ny çà, ny là. Et ainsi si tu dis, que ce n'est que vn muscle double, ou que ce sont deux muscles vnis ensemble, tu ne erreras point.

4 Le quart est petit. lequel est esleué depuis les mamelles, & succede apres le premier, faisant la plus basse adduction du bras.

5 Le cinquieme succede apres le second : & est lautre portion du muscle, qui est iouxte à epomis : laquelle adhère à la clauicule, faisant la plus haute adduction du bras. Car ce muscle ha deux testes. Cest asçauoir des parties interieures de epomis, il est implanté à la clauicule. Et des parties exterieures, il adhère à la scapule, aux plus basses parties de icelle. Toutesfois l'action de ce muscle seul, quand il est tendu, estend le bras exterieurement : declinant vn peu de la moyenne, & droite extension, vers le costé. Mais l'action de lautre muscle, qui est iouxte la clauicule, incline semblablement dedens. Et quand tous les deux sont fort tendus également, le bras prend extension droite, & moyenne, sans decliner ny çà, ny là.

6. 7 Le fixieme, & le septieme ont action

semblable, en chacune partie de l'espine, i ouxte la scapule. Car filz sont tendus ensemble, ilz esleueront le bras du tout en hault. Mais sil ny en ha que vn tēdu, il inclinera le bras vn peu de costé.

8 Le huiētieme naissant, pour la plus grand part, de la basse coste de la scapule, fait abductiō du bras, exterieuremēt. Et est opposite aux muscles pectoraux, lesquelz esleuent le bras en hault.

9 Le neuuieme procede de la fin inferieure de la basse coste de la scapule, mouuant le bras exterieurement; & en bas: toutesfois il fait plus labduction exterieurement.

10 Le dixieme, lequel embrasse la partie caue dicelle mēme coste, meine le bras moins dehors, mais plus en bas.

11 Le dernier deprime, & meine le bras en arriere: auquel succede le petit muscle dessusdit, lequel fait, que le bras ne incline ne çà, ne là, quād il est deprimē.

Quant aux muscles, qui descēdent en epigastriō, quant à ceux, qui sont obiectēs au deuant des extremitēs de costes, voy plus amplement Galien es lieux dessusdits. Or parlons maintenant de ceux, qui seruent à la respiration.

*Galen. li. de causis* Les muscles, qui seruent à la respiration sont quarante, & cinq: cestasçauoir,

- 22 Vingt & deux muscles intercostaux: *respiratio*  
 lesquelz sont ainsi només, pource quilz *nis. Itē 5.*  
 occupent les espaces, qui sont entre les *Cost. 2. de*  
 costes. Dont les fibres declinent en bas *Ana. ad-*  
 obliquement, des parties exterieures. Et *ministr. et*  
 des parties interieures au contraire, tra- *7. de usu*  
 uersent les exterieures, iouxte la figure *part.*  
 de,  $\chi$ , lettre Grecque. Pareillemēt esmu-  
 scles des costes nothes appert vne mes-  
 me nature de fibres. Ces muscles inter-  
 costaux relaschent, & astringent exa-  
 ctémēt. Et sont doubles, cest asçauoir les  
 exterieures, qui seruent à l'expiration, &  
 les interieurs, qui seruent à l'inspiration.
- 23 Item deux muscles des premieres co-  
 stes, lesquelz dilatent seulement la supe-  
 rieure partie du thorax.
- 24 Item deux des dernieres costes, les-  
 quelz retirent seulement la partie infe-  
 rieure du thorax.
- 25 Item trois descendens du col, lesquelz  
 retirent, & dilatent ensemble les haultes  
 parties du thorax.
- 26 Item sept estendus aux racines dorsa-  
 les des costes, lesquelz astringnēt les ex-  
 tremités des cartilages.
- 27 Item hui. Et en abdomen, qui paruien-  
 nent au diaphragme: aydans à la con-  
 traction du thorax. Desquelz ha esté dit  
 à la premiere table.

**R**este encores vn muscle du thorax, qui n'est pas de petit pris : on l'appelle phrenes, & diaphragma en Grec, & en Latin septum transversum. Lequel non seulement (comme estime Platon) est le septe transuersal, cest adire, separateur des deux parties de l'ame, cest asçauoir de l'appetitiue, ou naturelle, ou nutritiue, cest tout vn. Laquelle est au foye. Et de l'animeuse, ou vitale, laquelle est au cœur. Mais aussi entre tous les muscles dedies à la respiration, cest le plus vtile. Car tout animant vse de ce seul muscle en petite respiration. Mais quãd il fault vser de violente respiration ou à cause d'exercice, ou de fiure, ou de vehemete chaleur de l'air, ou autre disposition, il est necessaire, que les muscles intercostaux aydent, & suruiennent à l'action du diaphragme. Et si encores dauantage il fault vser de plus grande respiration, adonc les plus haults muscles aydent à l'action. Or poursuyuons plus amplement de ce diaphragme.

*Gal. libr.*

*3. de usu*

*part. &*

*cap. 3. lib.*

*3. de locis*

*aff.*

*Du diaphragme.*

**L**E diaphragme est vn muscle du thorax, grand, & rond : & est la fin, par laquelle l'inférieure partie du thorax est terminee. Les anciens l'ont appellé phrenes,



nes, cestadire en Latin mens, & en Frāçois, la pensée, ou iugement: soit, que ce non simplement leur soit venu en memoire, ou (cōme aucuns pensent) pource que quand le diaphragme est affligé dinflammation, la pensée, & raison est aussi blessée. En apres les Medecins mesprisans le nom Ancien, ont accoustumé de lappeller (& non sans cause) diaphragma, en Latin septum transversum: & ce dun verbe Grec diaphratta, qui signifie separer: pource quil separe les instrumens spirituelz, des instrumens du nourrissemēt, ou naturelz. Car il est superieur au regard des instrumēs naturelz, & inferieur au regard des spirituelz.

La propre substāce du diaphragme, cest *Gal. 5. 6. & 7. de usu part. 11<sup>e</sup>* vn muscle: cest asçauoir vne chair simple, laquelle est à lenuiron diceluy: mais la partie moyenne est toute nerueuse, comme vn grand cercle, finissant en vn large tendon. Enuiron le point, cestadire le mylieu du diaphragme, il y ha vn autre cercle, lequel est vn vray, & exacte tendon, ne retenāt aucune chair, laquelle il auoit parauant. *1. 6. de Anat. ad- ministr.*

Le diaphragme ha deux tuniques: cest asçauoir,

1. Linferieure, laquelle est la summité de la tunique du peritoine.
2. La superieure est la basse, ou fonde-

ment de la tunique, qui couure les costes. Et prend son cōmencement de l'inférieure extremité de la poitrine. Dou dependent aussi les chefz des muscles droitz, de lepigastre.

*Cap. 13. de* En apres le diaphragme descédant dillec,  
*usu part.* iusques aux extremités des costes nothes; de costé, & d'autre, deuient fort oblique, tāt de la partie postérieure, que inférieure.

Et ainsi le diaphragme differe de tous les autres muscles, non seulement selon la figure, mais aussi selon l'action. Car sa figure est ronde, & sa situation oblique, & de ses parties antérieures, & supérieures il paruiet à la poitrine. Et puis sen va tousiours en arriere, & en bas: iusques à ce, quil touche la spine, à laquelle aussi il adhere iouxte les reins, appellés lumbi. Or le chef de ce muscle, ou les fibres sont coniointes, nest pas à la poitrine (cōme penseroit bié quelquun) ne aux reins, ou lumbes: mais au mylieu de tout le diaphragme: laquelle partie est nerueuse, comme dessus ha esté dit. Parquoy il ha esté necessaire, que les nerfz, qui deuoient mouoir lescdites fibres, paruinssent illec, d'un lieu hault, & esleué, cestasçauoir de la quarte, quinte, & sexte vertebere du col (car de ces trois germes est coalescé, & composé vn nerf) à celle fin, quil estende  
 egal

egalement son action en toute part. Car veu que le diaphragme est fait pour mouuoir le thorax, il ha esté necessaire, que par ses parties extremes il adhere au thorax : & que le chef soit opposite à icelles routes, dautât quil ny auoit nul autre lieu plus apte, que le mylieu du diaphragme: auquel ceste cōiugation de nerfz descéd, & se implante.

1 Le diaphragme (oultre ce, quil est cōme vn parc, & separation) ha deux vtilités. *Gal. s. de usu part.*

1 La premiere, & la plus grande, cest destre instrument de respiration.

2 La secōde est, quand on va à selle, lors que les muscles de abdomen pressent fort, & egalemēt de toute part, que tous les excremēs soient expulsés, & enuoyés non pas à lestomach, mais au siege, par ces muscles, & par le diaphragme subiet à eux obliquement. Lesquelz ensemble, comme deux mains, compriment lesdits excremens. Et à celle fin, que ce muscle seul, & vnique, ne fust deietté de son lieu, par les hui& muscles de lepigastre, lesquelz sont grans : & ne fust renuersé à l'ample sinus, & caulté du thorax (en quel cas il empescheroit toute la vertu de compression) tous les muscles intercostaux, lesquelz pourroient estendre, & retirer par dedens le thorax, ont esté faits

faits au secours du diaphragme: A celle fin, que si tout le superieur sinus estoit de toute part estre si, en sorte, que le diaphragme neust lieu, ou il peust estre receu, quil demourast immobile, & stable. Item à celle fin, que lors, quand larynx est ouuert, l'homme ne respirast point: & que aucunes efflations ne sensuyussent: à loccasion desquelles la deiection par le siege seroit empeschee, nature ha mys à lenuiron de larynx plusieurs muscles: dont les vns sont ordonnés pour le clorre: & les autres pour l'ouurir, comme nous auôs dit en la premiere table, en parlant du siege.

- Galen. 5. de Ana. administ.* Le diaphragme ha deux pertuis.
- 1 Lun grand, par ou est donné passage aux vertebres. Et est preparé à lestomach & à la grande artere.
  - 2 L'autre petit, qui reçoit la veine commune: laquelle deriue le sang aux superieures parties du corps: & l'enuoye avec grande seureté.

*De la membrane succingente les costes,  
& des membranes, lesquelles  
separent le thorax.*

*Gal. 7. de  
usu part.*

*& 5. de  
Ana. ad-  
ministr.*

**L**A tunique fort subtile, côme vne toile d'araignee, & par tout semblable, & egale, est estendue au dessus de tout le sinus,

nus, ou capacité du thorax. Les Grecz l'appellent pleuras hypozwcos, cestadire succingente les costes. Dont vulgairement est nommée pleura. En laquelle est faite la douleur de costé, dite en Grec pleuritis.

Ceste tunique, de la part, ou elle ioint *Gal. ibi.* les os des costes, elle sert de deffence au poulmon : de peur quil ne touche aux os nudz, quand il fait son action : cestasçauoir quand nous respirōs. Mais de la part, ou sont mesopleuria (cestadire les parties moyennes entre les costes, lesquelles sont en icelle part, à cause des muscles, & des vaisseaux) elle donne aux muscles leur tunique, telle cōme au diaphragme. Et aux vaisseaux elle leur donne vehicule, & cōme vn appuy stable, & ferme.

De ceste membrane succingente en naiscent deux autres: cestasçauoir de chacune *Gal. 6. de usu part.* part vne, diuisants tout le thorax. Pour- *Q. 5. de Ana. ad ministr.* quoy les Grecz les appellēt diaphrattondes, & les Latins, intersepientes. Lesquelles de la partie posterieure de la spine, adherent, & sont fichees aux vertebres : & de la partie anterieure, adherent à los pectoral. Et sont estendues en hault aux clauicules, & en bas à la cartilage ensiforme, en Grec xiphoides diuisants tout le thorax en deux parties. Et pource on les appelle vulgairement mediastinum : pource que

que par icelles deux membranes le thorax est diuisé par le my lieu.

*Gal. 5. de Ana. ad ministr.* Et ainsi toutes ces membranes ne different en rien, sinon que es costes les Grecz les appellent hypozocætes, en Latin succingentes: pource que elles couurent les costes. Mais quand elles montét droit aux clauicules, on les appelle en Grec diaphrat rondes, en Latin intersepiètes: pource que elles separent le thorax.

*Gal. 6. de usu part.* Ces membres ont deux vtilités.

1 La premiere, & la plus grâde, cest que ces membranes facét deux ventres, cest adire deux capacités au thorax. A celle fin, que si dauenture on reçoit quelque grande playe en lune des parties du thorax, tellement que l'office de la respiration dicelle partie soit perdu, que lautre ventricule, lequel nest point bleisé, retienne à tout le moins la moytié de laction. Et à cause de ce, principalement ces membranes ont esté faites.

2 La secõde est, que nature abusé de ces membranes pour autre chose, cest asçauoir comme de couuertes, & aussi ligamens: pour couvrir, & lier ensemble tous les instrumens contenus dedens le thorax. Car les arteres, qui sont au thorax, & les veines, & nerfz, & œsophagus en Latin gula, en Arabic meri, & finalement

blement tout le poulmon, ont colligance avec le thorax, & sont couuerts de toute part dicelles membranes.

*Du pericardium.*

**P**ericardion, cest la tunique du cœur, ou membrane, ou plustost le domicile, & ferme rempart, tout à lentour du cœur. On lappelle vulgairement capsula cordis. Or en quelque maniere, que on le doie nōmer, il naist bien large, & ample de la base du cœur. Mais puis apres il se estressist peu à peu, tout ainsī que le cœur se termine en pointe, que nous appellons figure pyramidale, ou figure de pōme de pin: & est conioint à los pectoral. Item il est fort distant, & eslongné du cœur, de toute part. Car il comprend autant despace entre luy, & le cœur, comme il suffisoit au mouuement dudit cœur. Mais dautant quil deuoit toucher les os du thorax, lesquels sont durs: & le poulmon, qui est le plus mol de tous les viscères, ainsī que la situation est moyēne entre ces deux parties, aussi est la substāce de son corps. Car il est plus mol, que los, dautant quil est plus dur, que le poulmon.

En ce pericardion se assemble vne humidité sereuse, ou aqueuse, aucunesfois en si grande quantité, quil fait vne palpitation

*Gal. 6. de usu part.*

*Gal. cap. 1. lib. 5. de locis aff.*

tion de cœur, que les Grecz appellent pal-  
mos. De laquelle humidité Galien nha  
fait aucune mention ne es liures de lutili-  
té des parties, ne des administrations Ana-  
tomiques.

*Du cœur.*

*Gal. 6. de  
usu part.* **L**E cœur en Grec cardia, en Latin cor,  
*7. de  
Ana. ad  
minist.* cest le principe, & commencemēt de  
l'ame irascible, & des arteres, & de la cha-  
leur naturelle, par laquelle tout animant  
est regi, & gouverné: quasi cōme vne fon-  
taine, & vn domicile. Lequel est situé du  
tout au mylieu du thorax: & principale-  
ment quāt à sa base, qu'on appelle sa teste.  
Et n'est pas totalement rond, mais en com-  
mençant à sa base large, & ample, & ron-  
de, il deuient gresle peu à peu: tellement  
que de sa partie inferieure, il finist en figu-  
re estroite, & ague, semblable à vne pom-  
me de pin, inclinant à la fenestre. Le cœur  
est de momēt, & de poix egal, autant dun  
costé, que d'autre. Car sa partie fenestre,  
laquelle est fort grosse, & fort dure, & cō-  
sequemēt plus pesante, contient vne ma-  
tiere plus legere: cest asçauoir lesprit. Mais  
sa partie dextre; laquelle est plus subtile,  
plus mollē, & plus legere, cōtient vne ma-  
tiere plus pesante, cest asçauoir le sang.  
Parquoy il sensuit, combien quil ny ayt  
nul



nul ligament, qui face colligance de luy avec les autres parties prochaines: toutesfois sans incliner plus deçà, que delà, il demeure suspendu au mylieu du pericardion.

La chair du cœur est dure, & difficile à souffrir. Elle est composée de trois genres de fibres, lesquelles different de toutes les autres, en dureté, tension, force, & difficulté de patir, ou souffrir. Par icelles fibres le cœur ha double mouuement, lequel est naturel, & non pas volontaire, comme est le mouuement des muscles.

1 Car quand les fibres droites se retirét, & toutes les autres se laschent, adonc le cœur est dilaté: laquelle dilatation est dite en Grec diastole. Et alors le cœur attire l'air, ou l'esprit du poulmon, par l'artere veneuse, au fenestre vëtricule: pour sa refrigeration, & pour la nutrition de l'esprit vital. Aussi il attire le sang, de la veïne caue, au dextre ventricule: preparant le nourrissement au poulmon tant seulement, & non pas à soy mesme.

2 Au contraire quand les fibres droites se relaschent, & que les transversales se retirét, derechef le cœur est retiré, & deprimé, laquelle contraction est appelée en Grec systole. Auquel temps le cœur expellist les excremës fuligineux du fenestre

nostre ventricule, par lartere veneuse: & beaucoup plus par la grande artere, aux autres arteres. Et enuoye du dextre ventricule, par la veine arterieuse, vn sang elabouré, au poulmon, pour le nourrir: en luy rendant la pareille.

3 Mais au temps, ou espace moyen entre ces deux mouuemens il y ha vn peu de repos. Et adonc le cœur se restraint, & retire de toute part, enuiron l'air attiré du poulmon: duquel air alors il prend sa fruition, & vsage. Et adonc toutes les fibres du cœur font leur action, & principalement les obliques.

*Gal.lib.* Le cœur ha deux oreilles par dehors; à  
*3. de usu* dextre, & à senestre, en sa base, deuant les  
*part. et 7.* orifices des vaisseaux: desquelz vaisseaux  
*de anat.* bien tost apres nous parlerons. Ces deux  
*administ.* oreilles sont quelques epiphises (cestadi-  
 re appendices, ou additions) subtiles, &  
 nerueuses: à celle fin, que promptement  
 elles ensuyuent le mouuement du cœur.  
 Elles sont caues, pour faire vn sinus de-  
 uant le cœur. Et sont ainsi nommees, à  
 cause de quelque petite similitude, pour-  
 ce que à dextre, & à senestre, elles sont ad-  
 iacentes au cœur, tout ainsi que les oreil-  
 les sont à la teste des animaux.

*Galibid.* Dedens le cœur il y ha seulement deux  
 sinus, ou ventricules, séparés par vn entre-  
 deux,

deux , dit en Latin septum. Par les pertuis duquel entredeux le sang , & lesperit sont communiquez. En chacun de ces deux ventricules il y ha deux vaisseaux.

1 La veine caue entre dedens le dextre ventricule , ou sinus , lequel est appellé sanguin , & diceluy sort la veine arterieuse : laquelle est dispersee , & distribuee au poulmon , & apporte le sang elabouré. Ceste veine est nommee arterieuse , pource que illec elle acquiert vne tunique semblable à lartere , cest-à-sçauoir grosse, dure, & double.

2 Au fenestre ventricule , lequel est la fontaine de la chaleur naturelle , & est appellé spiritueux, est inseree lartere veneuse : laquelle apporte lair du poulmon, au cœur : & euacue les excremens fuligineux diceluy. Ceste artere est appelée veneuse, pource quelle ha vne tunique semblable à la veine , cestadire simple, rare, & subtile. De ce ventricule fenestre sort la grande artere : laquelle est lorigine , & racine de toutes les autres. De laquelle nous declairerons la diuision, cy apres.

3 Ces deux vëtricules sont es animaux, qui ont poulmon. Mais les animaux, qui sont sans poulmon , nont que vn ventricule , comme les poissons : les-

quelz au lieu de poulmon , ont autres particules , que les Grecz appellent brāchia, par lesquelles ilz inspirent, & attirent l'air, & la vapeur de leau, & reiettent dehors leau. Or tous animaux, qui nont point de poulmon, nont point de voix, ne de dextre ventricule du cœur: lequel dextre ventricule est fait à cause du poulmon.

*Galibid.* Les veines de tout le corps nont que vne propre tunique rare, & subtile.

Mais les arteres ont deux propres tuniques, cestasçauoir,

1. Lune extérieure, semblable à la tunique des veines: laquelle est tissue de fibres droites, & aucunes obliques médiocrement, sans aucunes transversales.

2. L'autre intérieure: laquelle est quasi cinq fois aussi grosse, que l'extérieure, dure, & dense, diuisible en fibres transversales.

*Gal libr.* En ces deux ventricules du cœur, il y ha quatre orifices de vaisseaux, cestasçauoir deux en chacun ventricule.

*6. de usū part.*

2. Au fenestre ventricule deux, dont lun est moindre, lequel est de l'artere venseuse: par lequel le cœur est contenu avec les arteres du poulmon. L'autre est plus grand, lequel est de la grande artere:

par

par lequel le cœur est cõtenu avec toutes les arteres.

- 2 Au dextre ventricule il y en ha deux moindres, que les dessusditz : toutesfois ilz sont de plus grand pris, & valeur, que les autres parties du cœur. Dont le plus grand est de la veine caue, lequel porte le sang au cœur. Lautre qui est moindre est de la veine arterieuse, lequel porte le sang du cœur au poulmon.

Derechef en chacun de ces quatre orifices de vaisseaux naissent aucunes membranes, lesquelles sont appellees hymenes en Grec: & seruent de couuerture : à celle fin, que grande quantité de matiere, cest asçauoir du sang, & de lesperit, ne flue hors du cœur, ou ne reflue dedès le cœur. Lesquelles toutes sont en nombre vnze: cest asçauoir,

- 6 Au dextre ventricule six. Trois en lorifice de la veine caue : lesquelles paruiennent du dehors au dedens, insignes en grosseur, force, & magnitude : lesquelles sont appellees en Grec triglachines, en Latin trifulcæ, cest adire ayãs trois pointes, pource que la mutuelle composition de ces trois membranes, est semblable aux pointes des dardz, ou fleches. Item trois en lorifice de la vei-

ne arterieufe: lesquelles paruiennent du dedens au dehors. Lesquelles ont esté appellees *figmoedes*, à la similitude de ceste lettre S.

5 Au fenestre ventricule il y en ha cinq: cestasçauoir trois en lorifice de la grande artere: lesquelles aussi paruiennent du dedens au dehors. Et sont appellees *figmoedes*, pour ceste mesme raison dessusdite. Item deux tant seulement en lorifice de lartere veneuse: lesquelles paruiennent du dehors au dedens. Desquelles nul nha osé comparer la figure à aucune chose. Or elles sont deux tant seulement: car il estoit expedient, que ce seul orifice ne fust clos du tout: pour ce que luy seul deuoit donner passage aux excremens fuligineux, du cœur, au poulmon: lesquels excrements pourroient esteindre la chaleur naturelle.

Quant à ces membranes, celles qui paruiennent du dedens au dehors, sont preparees pour ceste cause, cestasçauoir à celle fin, que les matieres ne retournent dedens. Mais les membranes, qui paruiennent du dehors au dedens, lesquelles sont plus grandes, & plus fortes, sont preparees non seulement pour ceste fin deuant dite, mais aussi pour estre instrumens dattirer. Car si les tuniques des vaisseaux  
sont

sont tendues, du cœur, par icelles membranes, elles sont plus promptement retraits, & repoulsent plus facilement les matieres, quand le cœur les attire. Derochela tension du cœur, en diastole, attire les membranes par leurs racines (lesquelles parviennent du dedés au dehors) & les reflecte par dedens, vers le cœur : & en les constituant toutes droites, clost les orifices des vaisseaux. Quât donc le cœur se dilate, attirant les racines des membranes, il ouvre les orifices des vaisseaux, lesquels enuoient les matieres dedens, cest-à-sçavoir de la veine caue, & de l'artere veneuse. Mais il clost les orifices des vaisseaux, lesquels euacuent les matieres dehors.

Le cœur attire le sang, & lesperit, en trois *Galibid.* manieres: cest-à-sçavoir,

- 1 Pour eiter vacuité, tout ainsi, que les souffletz des faures, quand ilz sont dilatés, attirent lair au dedens : laquelle chose conuient au cœur principalement.
- 2 Pour sa chaleur, tout ainsi, que les flammes des meches (que les Grecz appellent ellychnia) attirent l'huile.
- 3 Item pour la similitude de toute la substance, cest-à-dire pour vne vertu, & propriété occulte : tout ainsi, que Ma-

gues (cest la pierre , quon appelle Ay-  
mant) attire le fer.

*Galibid.* Or dautant, que le cœur ha son mouue-  
*Co 7. de* ment de soy mesme, il luy ha esté necessai-  
*anat. ad-* re dauoir vn corps fort, & gros, & dense:  
*ministr.* pourquoy il ha eu besoing de gros sang.  
 Toutesfois il nest pas alimeté de soy me-  
 me, cest adire du sang elaboré en ses ven-  
 tricules : lequel deuoit estre chaud, subtil,  
 & vaporeux, & idoyne à nourrir le poul-  
 mon. Mais deuant que la veine caue soit  
 implantee au dextre ventricule du cœur,  
 vne partie dicelle veine aussi grâde, com-  
 me il suffisoit pour le nourrir, est separee:  
 & enuiron le chef du cœur exterieurement  
 elle est diuisee en deux rameaux, & di-  
 spersee en toutes les parties du cœur. Pour  
 ceste cause est appelée en Grec *stepha-*  
*hid. 1.* *niæa* : car elle enuironne le cœur en ma-  
 niere de couronne. Avec ceste partie de la  
 veine caue, la grande artere est aussi por-  
 tee tout à lenuiron du cœur, & distribuee  
 par autant de rameaux produits d'elle des-  
 soubz les membranes. Laquelle partie est  
 autant grande, quil suffisoit pour refri-  
 gerer ladite veine, & pour conseruer le  
 bon temperament de la chaleur naturelle  
 des externes parties du cœur. Il y ha donc  
 deux rameaux de la grande artere, & au-  
 tant de la veine caue, enuironnans, & em-  
 brass



brassans tout le corps du cœur.

Toutesfois il ny ha nul nerf, qui soit *Gal. libr.*  
veu estre distribué au cœur, non plus que *6. de usu*  
au foye, ne aux rongnons, ne en la ratelle. *part.*

Car seulement sa couuerture, cestadire sa  
membrane, ou tunique, appelée pericar-  
dion, est veüe receuoir quelques propagi-  
nes, & branches des nerfz subtilz. Comme  
aux tuniques des viscères (ainsi que des-  
sus ha esté dit) sont implâtes aucuns nerfz  
euidens, & manifestes, de la sexte coniu-  
gation : toutesfois on ne les voit pas ma-  
nifestement estre diuisés es corps desditz  
viscères.

Oultre plus est trouué vn os au chef du *Gal. ibid.*  
cœur auquel sont adaptés, & appropriés *6. 7. de*  
les principes de tous les ligamêts du cœur. *anat. ad-*  
Lequel toutesfois nest pas vray os en tous *ministr.*  
animaux, ains cartilagineux. En ceux, qui  
sont fort petis, on y trouue vn corps com-  
posé de nerfz, & de cartilage, dit en Grec  
*suma neurochôdrwdes*. Mais es plus grans  
animaux, cest vne exacte, & vraye carti-  
lage. Et en ceux, qui sont fort grans, cest  
vne cartilage osseuse, cestadire bien dure,  
& semblable à loz. Et tant plus lanimant  
est grand, tant plus ceste cartilage ressem-  
ble à la substance de loz. Tellement que  
es plus grans animaux, esquelz sengendre  
plus de substance osseuse, il conuient la p-

pellier os cartilagineux, & non pas cartilage osseuse.

*De la production de la veine caue,  
aux parties superieures.*

*Gal. libr.  
6. de usu  
part.*

**V**Eu que le cœur, & le poulmon, aussi tout le thorax sont en cōtinuel mouuement, le passage de la veine caue, par la spacieuse laxité du thorax, nestoit pas seur, si elle neüst eu quelques subsides, & aydes externes: par lesquelz (iaçoit quelle soit tousiours en mouuement, & quelle pende en hault) toutesfois elle resiste à ces dāgiers, & tous autres, dont elle peut estre molestee. Or les singuliers, & propres subsides dicelle veine, sont trois.

- 1 Le premier est au mylieu du thorax, auquel lieu le cœur luy estéd vne apophyse nerueulé, & forte: cestasçauoir son oreille dextre, quasi comme vne main: laquelle est preparée, non seulement pour ceste cause, mais aussi pour vne autre, laquelle ha esté dite cy deuant.
- 2 Le second subside, & ayde est la cinquieme lobe, ou fibre du poulmon: laquelle est faite seulement pour ceste veine, soy gisant dessus icelle lobe, à la partie dembas.
- 3 Le dernier est, que ceste veine ha vne grande

grande, & bien molle glandule, en la partie denhaut : laquelle glandule nest faite pour autre fin : & est appelée en Grec thymos. Ceste glandule est situee au dessoubz des parties superieures de loz pectoral : à celle fin, que loz pectoral ne touche la veine caue. Aussi à fin, que tous les autres germes, ou petis rameaux dicelle veine (lesquelz en ce mesme lieu sont beaucoup, & en grand nombre près du iugule, & dont premieremēt ilz sortent) fussent soustenuz, & establis. Car cest vne chose perpetuelle à nature, toutesfois & quantes quelle diuise vn vaisseau en hault, dentremettre vne glandule au my lieu, pour remplir la diuision. Ceste glandule dite thymus, appert facilēmēt en vne poitrine de veau : on lappelle en François le phagoue.

La veine caue montant en hault, de la partie gibbeuse du foye, par le my lieu du diaphragme, est diuisee en ceste maniere.

1. Premierement en rameaux grans, & insignes.
2. En apres en plus petites branches, & propagine.

Premierement vn insigne, & grand rameau, est porté depuis le diaphragme, iusques à la cinquieme lobe du poulmon : & mōte iusques à la dextre oreille du cœur.

Par

Par laquelle il entre au cœur, prenant vne tunique semblable à l'artere. Pourquoy nous auons dit, que on l'appelle veine arterieuse. En apres quasi comme du commencement, ce rameau deduit aucunement de l'oreille dextre du cœur, & consequemment porté sur la glandule dite thymos, monte tout droit au iugule. Et illec se diuise en deux rameaux droits, & insignes: lesquelz sont appellés selon les Grecz sphagitides, cestadire veines iugulaires, externes, & superficielles: les autres les appellent veines apoplectiques: les Arabes les nomment veines guidés, manifestes. Cestascavoir vne à dextre, & vne à fenestre. Par lesquelles veines, quasi toutes les parties superficielles du col, & de la teste, sont nourries.

*Gal. com* Les plus petis rameaux de la veine caue,  
*mēt. lib. 2.* sont sept: iacoit que on en puisse faire  
*de rat. u-* plus, ou moins:  
*et in mor* 1. Le premier est produit incontinent de  
*bis acu. et* la grande, & insigne branche, à dextre,  
*de dissect.* & à fenestre, iusques au diaphragme.  
*uenarū.* 2. Le second est seul, & sans coniugation  
 pourquoy les Grecz l'ont appellé azygos, vulgairement vena sine pari, cestadire veine sans pareil, & sans coniugation. Lequel rameau descend de ceste  
 mesme branche insigne, & deuant que  
 parue

paruenir au cœur, vient à l'inférieure partie du thorax: laquelle est composée de huit costes. Ce rameau dit azygos, en plusieurs animaux, monte iusques à la cinquième vertèbre du dos, en la fenestre partie du thorax. Mais es Singes; il est situé en la dextre partie, vn peu au dessus de l'oreille du cœur. Et aux autres animaux, comme es hommes, il sort de icelle partie, ou la veine caue touche desia l'oreille du cœur. Et de là, en descendant par la spine, est distribué à dextre, & à fenestre, aux huit costes inférieures, iusques au diaphragme, & à la membrane, qui separe le thorax.

3 Le tiers est de ceste branche insigne, qui va au cœur, deuant que elle entre dedens le dextre ventricule du cœur. Lequel tiers rameau ceint, & enuironne la superficie du cœur, en maniere de vne couronne: dont on l'appelle vena *stephaniæa*, en Latin *coronalis*. Et finalement penetre dedens la substance du cœur, comme nous auons dit dessus.

4 Le quart rameau (deuant que la veine caue, apres auoir outrepasé le cœur soit diuisée en veines iugulaires) sort à dextre, & à fenestre, nourrissant les quatre costes supérieures, & les lieux, qui  
sont

sont enuiron les scapules, ou espaules, & aucuns des muscles interieurs du col, enuoyant, & implantant aucunes petites veines à la sexte vertebre, dedens les pertuis dicelle.

5 Le cinquieme, ayant sa racine pres de celle, qui nourrist les haultes parties du thorax, paruient aux mains, tant à dextre, que à senestre, par laisselle. Et apert interieure au coulede. On lappelle vena axillaris. De laquelle nous parlerons en la quarte table.

6 Le fixieme monte de la veine caue (apres que elle est diuisee en veines iugulaires) à dextre, & à senestre, hors du thorax. Et par lespaule fait son discours au bras, dont elle est nommee en Grec *ωμιαα*: & en Latin *humeraria*. Et ha sa racine commune avec les iugulaires superficielles. De laquelle nous ferons aussi mention en la quarte table.

7 Le septieme yst de la partie interieure des veines iugulaires externes, ou superficielles, faisant les deux veines iugulaires internes, ou profondes: lesquelles aussi sont appellees apoplectiques, en Arabic *venæ Guiden occultes*. Par lesquelles toutes les parties internes, & profondes du col, & de la teste, sont nourries.

*De la diuision de la grande artere.*

**L**A plus grande de toutes les arteres *Gale. de* (laquelle Aristote appelle aorta) naist *disselt. ar* du fenestre ventricule du cœur: & doit *criarū. et* estre distribuee par tout le corps: portant *lib. 16. de* lesperit vital, & temperant la chaleur na- *usu part.* turelle, par diastole, & systole, cestadire par dilatation, & cōpression. Tout incontinent quelle est yssue hors du cœur obliquement, comme vn tronc, elle se diuise en deux parties inegales.

1. L'une est moindre: laquelle monte en hault, pour donner rameaux à toutes les parties, qui sont au dessus du cœur.
2. L'autre descend en bas: laquelle est plus grande, pource que le corps est plus grand en descendant. Et enuoye des arteres à toutes les parties inferieures.

La partie moindre, laquelle monte en *Galibid.* hault, incontinent derechef est diuisee en deux parties inegales.

1. Dont la moindre est produite iusques à la fenestre omoplate, & aisselle: laquelle portee au poulmon, & munie de membranes, monte en hault iusques à la premiere coste, sans estre diuisee. Car il n'estoit pas seur de la diuiser en hault. Mais de illec en apres elle se diuise, en-  
uoyant

uoyant vne partie aux premiers espaces intercostaux. En apres enuoye vne autre partie à lhypochondre, & à la mamelle : laquelle partie est subiacente à toute la poitrine. La tierce partie est enuoyee à la spinale medulle du col : laquelle penetre par les pertuis des six spondyles, & enuoye (en passant) des rameaux aux muscles prochains. Le reste de ceste artere est distribué en toute la main, & omoplate senestre.

3. L'autre, qui est la plus grande, monte tout droit au iugule, ayant au dessoubz d'elle la glandule dite thymos, en maniere de coulre. Et illec derechef est diuisee en deux parties inegales : lesquelles font les arteres appellees en Grec carotides, en Latin *soporariæ*, & selon les Practiciens *apoplecticæ*, ou *subeticæ*. Desquelles deux parties la senestre est la moindre : & fait l'artere carotide senestre. La dextre est la plus grande, laquelle fait l'artere carotide dextre. Et dicelle partie dextre, apres auoir vn peu procédé, se font plusieurs apophyses. Car il y ha vne artere, laquelle est portee aux haultes parties du thorax. Et vne autre paruient par la poitrine iusques à la mamelle dextre. Et deuant ces deux arteres la dextre carotide est produite declinante.



nante. En apres l'autre partie, qui reste de l'artere, vient obliquement vers la production de la premiere coste: & est distribuee à l'omoplate, & à la main, & aux dextres parties du col. Mais tout ce, qui reste des deux carotides, procede droit en hault, & entre dedens le caluaire. Et illec fait ce, que on appelle plexus retiformis, vulgairement rete mirabile. En apres derechef se assemble, & conuiert en deux arteres: & penetre le cerueau.

L'autre partie de la grande artere, qui est plus grãde, est celle, qui descend du cœur, soy inclinant vers l'espine: laquelle monte iusques à la cinquieme vertebre du thorax. Et de là descend par toute la spine, iusques à os sacrum, ou latum. Premièrement apres que elle est yssue du thorax, elle enuoye deux arteres au diaphragme. Et puis elle en enuoye vne seule, & sans coniugation, au ventre, à la ratelle, & au foye: lesquelles trois arteres prennent leur naissance des parties anterieures de la grande artere. Aucunes fois d'une racine elle est diuisee en deux parties: dont l'une est distribuee au ventre, à la ratelle, & au foye: & l'autre partie mesenterique est distribuee aux intestins. Et finalement les arteres font leur cours avec les veines,

*Gale. de  
dissec ar-  
teriarũ.*

lesquelles nous auons dit estre portees aux testicules. Or l'extreme partie de la grande artere, apres que elle est paruenue aux costés des lumbes, ou reins, elle monte au dessus de la veine là situee. Puis apres l'artere est diuisee en deux parties, tout ainsi comme la veine caue : laquelle enuoye icelles deux parties es deux iambes, cestàçauoir en chacune iambe, vne artere. Or nous poursuuyrons ceste diuision, qui paruiet aux mains, & aux iambes, en la quatrieme table.

*Du Poulmon.*

*Gal. li. 6.  
C. 7. de  
usu part.*

**L**E poulmon, en Grec pneumon, en Latin pulmo, cest l'instrumēt de la voix, & de la respiration : lequel est situé entre la partie dite fauces, & le cœur, comme le promptuaire, cestàdire le lieu, ou est gardé l'esprit. Il embrasse le cœur de ses cinq lobes, comme si cestoyent cinq doigtz : cestàçauoir de deux en la senestre partie du thorax, & de trois en la partie dextre. Dōt la cinquieme lobe, laquelle est petite, est faite à cause de la veine caue seulement : ainsi que dessus nous auons dit. Et paruiet depuis le diaphragme, iusques à la dextre oreille du cœur : seruāt d'une molle coulre à la veine caue, montant en hault.

Le

*Gal. lib.*

Le corps du poulmon, dautant que il nha pas mouuement de soy mesme, mais du thorax, ne deuoit pas estre pesant, ne dense, mais legier, rare, mol, plein de pertuis, remply d'air, & desperit: & composé quasi d'une escume de sang, concrete, & coagulee, & tissu de plusieurs vaisseaux. Et tout ainsi, que le cœur prepare au poulmon vn nourrissement pur, vaporeux, & subtil, semblablement le poulmon change, & altere, pour le cœur, l'air, ou esperit: & l'attire extrinsequement par la trachée artere. Lequel air, ou esperit y est premierement préparé, & elabouré. Et dillec au cœur, & aux arteres, & principalement es arteres, qui sont au rete mirabile. Et finalement elabouré en perfection aux ventricules du cerueau: esquelz ventricules premierement, & exactement, il est fait esperit animal.

Le poulmon est tissu, & composé de trois vaisseaux: cest asçauoir, *Gal. lib. 7. de usu*

1 De la veine arterieuse, laquelle (comme nous auons dit) procede du dextre ventricule du cœur. *part.*

2 De l'artere veneuse, ou lyffe, & souefue, laquelle procede du fenestre ventricule du cœur.

3 Et de la trachée artere, laquelle procede de pharynx, autrement fauces.

h 2      Apres

Après que ces trois vaisseaux ont procédé plus oultre, ilz sont tous diuisés d'une mesme maniere. Premièrement en deux rameaux : pource que l'une des parties du poulmon est à la dextre, & l'autre à la fenestre : lesquelles deux parties du poulmon sont séparées de fortes membranes. En après chacun de ces rameaux est derechef diuisé en deux autres : pource quil y ha deux lobes en chacune partie du poulmon. Et ainsi ces quatre rameaux sont diuisés, & distribués es quatre lobes du poulmon : mais à la cinquieme lobe (d'autant que elle est petite, en la capacité ample, & large de la partie dextre du thorax) il y ha de petis rameaux, qui luy sont dispersés des vaisseaux distribués à la grande lobe, qui luy est prochaine.

*Gale. lib. 6. de usu part.* Ces vaisseaux du poulmon sont contraires aux autres vaisseaux de tout le corps. Car au poulmon la veine est faite artériuse, cestadire grosse, dure, & double : à celle fin, quelle ne soit dilatee facilement, quand nous inspirons. Et que elle ne soit retirée, quand nous expirons : d'autant que elle est comme vn promptuaire, & recevable du nourrissement. A celle fin aussi que elle ne enuoye vn sang gros au poulmon : lequel est nourry de sang subtil, & vaporeux. Pour ceste cause icelle veine ha

ne ha esté faite bien grâde: à celle fin, que  
 autant que il luy est osté de iuste, & suffi-  
 sante nutrition, quil luy en soit autant re-  
 cōpensé par sa grandeur, ou magnitude.

Mais lartere, qui communique du cœur *Galibid.*  
 au poulmon leſperit vital, avec le sang  
 subtil, & vaporeux, & expellist les excre-  
 ments fuligineux, ha esté faite veneuse:  
 cestadire rare, subtile, & simple. A celle fin  
 que le nourrissemēt, que la veine ne peult  
 donner au poulmon, à cause que elle est  
 grosse, & dense, que lartere recompense le  
 tout, en distribuant au poulmon, à cause  
 de sa rarité, vn sang pur, subtil, & vapo-  
 reux, en abondance. Et dauantage à celle  
 fin, que (dautant quelle est le receptacle,  
 & vaisseau de leſperit) elle soit facilement  
 dilatee, & comprimée. Pource que il estoit  
 necessaire, quelle fust facilement remplie,  
 quand nous inspirons: & soudainement  
 euacuee, quand nous expirōs, & parlons.

Le troisieme vaisseau du poulmon, le- *Gale.lib.*  
 quel est appellé lartere trachœe en Grec, *7. de usa*  
 cestadire aspre, est situé entre les deux des- *part.*  
 lūsditz. Et est conioint, & connexé avec  
 le cœur, par lartere veneuse: laquelle est  
 entre deux. Ce seul vaisseau au poulmon  
 est totalement vuyde de sang, quand le  
 corps se porte bien, & est selō nature. Mais  
 quand il y ha rupture de quelque vaisseau

du poulmon, ou apertion dorifice (que les Grecz appellent anastoinosis) ou quelque erosion de vaisseau (que on appelle anabrosis en Grec) alors quelque sang se spanche en ceste artere : lequel sang empesche lesprit, luy occupant ses voyes. Et par ce moyen sensuit vne toux : & le sang vient en la bouche, par pharynx. Nous parlerôs plus amplement de ceste artere, peu apres, quand nous aurons parfait le propos du poulmō, & de œsophagus, en Latin gula.

*Gal lib.* Il y ha vne membrane subtile, qui enui-  
*7. de i su* rōne par dehors toutes les lobes du poul-  
*part.* mon : laquelle prend aucunes parties, & portions de nerfz, qui descèdent en lestomach. Car mieux ha esté au poulmon auoir de petis nerfz, à celle fin, quil eust aucune congnoissance de choses molestes, & contraires : comme ha le cœur, le foye, la ratelle, & les rongnons.

*De œsophagus en Latin gula, en  
 Arabic meri.*

*Gal. l'in-  
 troduct.*

**I**L y ha deux conduitz, qui commencēt au large espace de la bouche.

1. Lun iouxte la spine du dos : lequel conduit est appellé œsophagus, ou stomachus en Grec, & en Latin gula : cest la voye, & le passage du manger, & du boire.

2. Lautre

2. L'autre est iouste la partie prone du col, lequel conduit est appellé trachæa, ou aspera arteria : cest la voye de l'air, ou de l'esprit.

Ceste espace, qui est au deuât de ces deux conduits, les Latins l'appellent fauces, & les Grecz pharynx. *Galen. in Apho. 14. lib. 4. Et*

La voye commune, qui apporte la viande de la bouche iusques au ventricule, laquelle voye est moyenne entre fauces, & le ventricule, les Latins l'appellent gula, les Arabes meri. Et les Grecz œsophagus propremēt, & stomachus communement. Car tout col preposé au deuât de quelque ventre, cestadire de quelque capacité, ou ample espace, estroit en maniere de isthmos, est appellé stomachus. Aucunesfois on appelle lorifice du ventricule, stomachus : mais cest improprement. *prog. 18. li bro 3. & cap. 5. li bro 4. de locis aff. Gal. 4. de usu part. et 13. metho. et li. 5. de locis aff. ca. 4. et Apho. 39. lib. 6. et Apho. 56. lib. 7. Gal. li. 4. & 6. de usu part.*

Oesophagus est composé de deux tuniqs semblables aux tuniqs du vetricule: lequel descend tout droit au dessoubz de la trachæe artere, par l'espine. Et est estendu sur les quatre premieres vertebres du dos perpendiculairement, cestadire droitement sans incliner son corps çà là. Mais à la quinte vertebre, il incline à la dextre : pour ceder, & donner lieu à vn autre instrumēt de plus grād pris: cestasçanoir à la plus grāde de toutes les arteres, qui descend. Laquelle

il estoit necessaire estre portee par le my-lieu des vertebres : comme nous auons dit en la diuision d'elle. Incontinēt que œsophagus ha touché au diaphragme , il est fort esleué par fortes mēbranes : derechef il passe sur la grāde artere : en la partie senestre. Auquel lieu apres auoir passé oultre le diaphragme , il adhere à lorifice du ventricule, tout enleué : à celle fin, quil ne presse lartere, quād quelque viande aspre y passe. La cause pourquoy il passe en la partie senestre, cest pource, quil estoit plus expedient , que lorifice du ventricule fust situé en ce lieu la : comme nous auons dit en la premiere table.

*Galibid.* Oesophagus est de figure ronde : à celle  
*Ch. 7. de fin,* que beaucoup de matiere (cest la vian-  
*usu part.* de) passe par vn petit lieu, & passage. Auf-  
 si à fin quil fust plus asséuré, & mieux mu-  
 ny contre les iniures, & incommodités.  
 Mais quant à sa situation, il est oblique,  
 & tout tortu: pour donner lieu à la gran-  
 de artere. Aussi à celle fin , que les nerfz  
 soient plus assésés, qui descēdent du cer-  
 ueau, au ventricule. Lesquelz quand il ap-  
 prochēt pres du ventricule, se enuelōpent  
 enuiron lestomach : & ainsi finablement  
*Galen. li. y adherent.*

*4. de usu part.* Or nous auons dit en la premiere table,  
 quil y ha peu de veines, & du tout obscu-  
 res,



res, & non manifestes : lesquelles sont enuoyees du mesentere, à œsophagus.

*De la tracheie, ou aspre artere.*

**L**A tracheie artere, en Grec trachœa, *Gal. lib. 7. de usu part.*  
 En Latin aspera arteria, aucuns l'appellent aussi en Grec bronchos (côme ilz appellent les cartilages, dequoy elle est composee, brōchia) cest le troisieme vaisseau du poulmon : procedant de pharynx, ou fauces. De laquelle nous auons deuant fait mention. Et est situee entre l'artere lyffe, & la veine arterieuse. Car il falloit, que la tracheie artere fust prochaine de ces deux vaisseaux : cest asçauoir pres de l'artere lyffe, & non aspre : pour donner au cœur l'utilité de respiration, par le mylieu dicelle artere lyffe. Et pres de la veine arterieuse : pource quil est necessaire, que elle soit nourrie dicelle veine. Pour ces deux causes elle ha esté situee au mylieu.

Pour la construction de ceste aspre artere, nature vsant de plusieurs cartilages, *Gal. 7. de usu part.*  
 la toute fleschie en exacte circonférence dun cercle. A celle fin, que sa partie cōuexe, ou gibbeuse (laquelle nous touchons) apparoiſſe par dehors : & que elle soit cōcaue par dedens. Consequemment elle ha lyé ensemble par ligamens membraneux, & forts, les cercles, lesquels sont composés,

sés, & conioints ensemble, par vn conti-  
 nuel ordre: selon la longitude du col. Et  
 ha remply cest espace, qui est entre pha-  
 rynx, & le poulmon. Mais quant à la par-  
 tie des cercles, laquelle deuoit toucher  
 œsophagus, subiet, ou situé au dessoubz,  
 nature ne la plus faite cartilagineuse: ains  
 en ceste partie elle est, cōme vn cercle im-  
 parfait: tellement que chacune cartilage  
 represente la figure de ceste lettre Gree-  
 que Σ: dont icelles cartilages sont ap-  
 pelles sigmoïdes. Ainsi ceste trachœ ar-  
 tere est ronde: tout ainsi que œsophagus.  
 Et par dehors elle est cartilagineuse: de  
 peur que elle ne soit facilement blessée par  
 les choses externes. Mais de la partie, dou  
 elle touche œsophagus, elle est membra-  
 neuse: de peur que en le pressant, elle ne  
 prohibe la viande d'entrer. Toutesfois na-  
 ture n'ha pas fait ceste artere du tout car-  
 tilagineuse, ne du tout membraneuse: ains  
 elle ha situé vne cartilage, laquelle est  
 propre instrument de la voix, & puis vne  
 membrane, ou ligaments membraneux,  
 doubles, dont les vns lient ensemble les  
 cartilages, ou cercles: & les autres les ren-  
 dent parfaits. Lesquelz ligamēts, d'autant  
 quilz peuuent estre dilatés, & retirés, ilz  
 sont instrumens de respiration. Parquoy  
 veu, que la trachœ artere est composée  
 de

de cartilage, & de membrane, elle est particule, & instrument de la voix, & aussi de la respiration. Car par elle nous inspirons, & derechef nous expirons, nous faisons efflation, & auons la voix.

Il y ha vne membrane tendue intrinsequement dessoubz ces ligamets doubles, & cartilages, totalement ronde : qui conioint toutes icelles parties. Laquelle est dense, & compacte, subtile, seiche modement, tissue de fibres droites selon longueur. Et est continue à la membrane, laquelle oint intrinsequement toute la bouche, & œsophagus, & tout le ventricule. Mais par dehors il y ha vne membrane, qui comprend toutes les parties dessusdites : laquelle est comme vne robbe, ou tunique de toute lartere. Ceste mesme structure, & composition est gardee iusques aux extremes lobes du poulmon.

### *De Larynx.*

**L**E chef, ou la fime de la spre artere, est appelle Larynx : qui conioint lartere, avec pharynx : laquelle appert manifestemēt au col, & on la sent dure, quand on la touche. Et quand nous auallons, ou trāsgloutissons, elle monte. Elle est le premier, & le plus principal instrument de la voix; & pource est toute cartilagineuse.

*Larynx*

*Gal. lib.* Larynx est composé de trois grandes cartilages : lesquelles ne sont en rien semblables ny en figure, ny en magnitude, es autres cartilages de l'aspre artère.

1 La premiere est anterieure : qui est la plus grāde, laquelle nous touchons. Elle est conuexe, cestadire gibbeuse extrinsequemēt, & caue intrinsequement : semblable à vn bouclier, non pas rond de toute part, mais assés long : lequel proprement nous appellons en Latin scutum, & en Grec clypeus : dont ceste cartilage ha esté appelée clypeoades en Grec, & en Latin scutiformis.

2 La seconde n'ha point de nom : laquelle d'autant que elle est moindre, que la premiere, d'autant est elle plus grande, que la tierce. Elle est situee aux parties internes, illec ou est œsophagus. Et d'autant, que la plus grande, qui est la premiere, default en parfaite figure circulaire, d'autant ceste seconde y approche plus. Car ce n'est pas tout vn de Larynx, comme de la partie de la trachœe artère ; qui touche à œsophagus, laquelle est membraneuse.

3 La tierce, qui est moindre de toutes, sensuit, & commence consequemment : dont la fin est bien estroite. Sa partie, & extremité superieure est appelée selon plusieurs

plusieurs Anatomistes Arytænoïdes , à la similitude de la figure dun vaisseau, que on appelle en Grec arytæna. Item la concavité de ceste cartilage incline vers le conduit de lesprit: à celle fin, que ce, qui est composé de ces trois cartilages, soit comme vne fluste. Ceste cartilage paruiet à la capacité de Larynx, & est couuerte vers œsophagus : à celle fin, que en vomissant la matiere ne vienne en la trachæe artere.

Or dautant , que la voix se fait premiere- *Gal. ibid.*  
ment en Larynx , & que son orifice supe-  
rieur se dilate grandement, & se comprime aussi : pource quil se ouure, & se ferme aucunesfois entierement , & exactement , il nestoit possible , que sa construction, ou composition fust meilleure, que celle, quil ha maintenant : cestasçauoir de ces trois cartilages appliquees, & coniointes ensemble : lesquelles se deuoient mouuoir par muscles.

Pour ceste cause il y ha en Larynx en- *Gal. ibid.*  
uiron vingt muscles: cestasçauoir, *Or 16. de*  
12 Douze propres: dont il y en ha dix *n/ra part.*  
communs aux trois cartilages: cestasçauoir quatre , lesquelz conioingnent la premiere cartilage avec la seconde, es animaux, qui ont grande voix. Dont les deux premiers conioingnent les parties  
anter

anterieures de Larynx, & fermét la plus grande cartilage. Les deux autres subsequens conioingnent les parties intimes, & occultes. Les autres quatre en tous animaux conioingnent la seconde cartilage avec la tierce. Les autres deux conioingnent la premiere avec la tierce. Et de ces six il y en ha quatre, qui ouurent la cartilage dite arytenoïdes : les deux autres la fermét. Restent encores deux, qui sont à la base, ou fondement de la cartilage arytenoïdes:lesquelz ne sont point trouués es animaux de petites voix, comme es Singes. Il y en ha deux autres transversaux, aydans aux deux dessusdits : lesquelz coalescent, & sont vnis ensemble en plusieurs animaux : & serrent, ou contraignent la base de la tierce cartilage.

8 Item huit communs, lesquelz sont beaucoup plus grans, que les dessusdits. Et sont propres seulement à la premiere cartilage dite scutiforme : lians Larynx avec les parties prochaines. Lesquelz huit muscles sont autheurs dun autre mouuemét, par lequel tout le conduit de lesprit est amplifié, & retiré. Dôt deux naiscent des moindres costés de los dit hyoïdes : & puis sont produits selon toute la longueur de la cartilage scut

scutiforme, tant de la partie anterieure, que superieure. Lesquelz attirans ladite cartilage scutiforme, le longnēt des cartilages posterieures : & amplifient ledit conduit. Les autres quatre sensuyuent : dont deux naissants de la cartilage scutiforme, & tendans à la poitrine, sont meslés avec les deux autres : specialemēt es animaux, qui ont tout le Larynx grand, & aussi le cartilage scutiforme grande. Ces quatre muscles ayans leur action, & situation contraire aux deux dessusdits, retirent les parties inferieures de la cartilage scutiforme, & lattirēt en bas : & avec ce retirent, & reserrent legerement la trachœe artere : à celle fin, que rien ne se redouble, & ne si applique, quand on veult parler. Les autres deux transuersaux naiscent des parties obliques de la cartilage scutiforme. En apres ilz embrassent circulairemēt cesophagus, & conuiennent ensemble, attirans icelles parties obliques de la premiere cartilage dite scutiforme, & des appliquans avec la seconde cartilage : à celle fin, que le conduit de lesprit soit restraints, & reserré.

Mais aucuns muscles droits, qui sont au *Gal.li. 7. col.* prennent distributions de nerfz de la *16. de* *sexe coniugation descendente* : à laquelle *usu part.* le est

le est adiointe vne petite part , & portion de la septieme coniugation. Et cōsequem-  
ment tous les autres muscles de Larynx  
prennent distributions deſdits nerfz, ex-  
ceptés fix propres : ceſtaſcauoir quatre,  
qui louurent, & deux, qui le ferment : leſ-  
quelz ſont grandemēt neceſſaires à la ge-  
neration de la voix. Iceux muscles veu  
quilz ont vne droite ſituation , tellement  
que leur chef , & commencemens ſont en  
bas, & leurs fins en hault, nul rameau, ou  
propagine dicelle ſexte coniugation de-  
ſcédante n'ha peu eſtre diſtribuee à iceux:  
iaçoit que ladite ſexte coniugation paſſe  
pres diceux muscles , quand elle deſcend  
par le col : & donne quelque nerf à au-  
cuns muscles de Larynx. Mais il ha eſté  
neceſſaire , que des parties inferieures au-  
cuns nerfz leur fuſſent enuoyés de ceſte  
mēſme coniugation. Laquelle choſe ha  
eſté faite par vn merueilleux artiſce de  
nature, comme briueſment l'expliqueray.

*Gal. libid.* - Deux nerfz, ceſtaſcauoir la ſixieme con-  
iugation , ou pareil de nerfz du cerueau,  
deſcendent avec les arteres carotides: eſta-  
blis pour la propinquité, & munis de cō-  
munes couuertes, ou tuniques. Leſquelz  
deux nerfz apres, quilz ont paſſé le col, en  
deſcédant par le thorax, vne propagation  
de nerfz naiſſante à dextre, & à ſeneſtre  
retourne



retourne par ceste mesme voye , par laquelle elle estoit descendue : comme reciproquant, & redoublant son cours. Ceste propagation adherant à la trachæe artere, fait son recôurs aux six muscles, par lesquels larynx est ouuert, & cloz. Et luy est communiquee , à cause de faire la voix. Car sil aduient , que ces nerfz soient blesez, la trachæe artere en est blesee, ou du tout abolie, & gastee.

1. Le nerf dextre se reflexist iouxte les clauicules, enuiron le rameau de la grande artere: lequel rameau est porté à l'aisselle dextre, comme fil estoit reuolu enuiron quelque petite roue: & recourt en hault, iusques à ce quil soit dispersé , & distribué aux trois muscles de larynx, du costé mesme , cestadire de la partie dextre.

2. Le senestre nerf , lequel est produit bien loing, se reuolue enuiron la grande artere , principalement dicelle part, dou elle yst premierement du cœur , se flexchissant vers la spine. Et dillec ce nerf recourt vers larynx , & se disperse es autres trois muscles de sa partie senestre.

Or dautant, que les deux muscles, qui ferment larynx , ont tresforte action , pour ceste cause nature ha fait, quil y ait en eux

i      grande

grande part, & portion de nerfz recurrez, ou reuersifz, distribuee en ces deux muscles. Et que vn nerf solide descende du hault en bas, aux fins, & extremités diceux nerfz reuersifz: iouxte chacun de ces deux muscles. Dont les corps, qui sont enuiron larynx, reçoient aucunes particules: le reste de ce nerf solide conioint au propre nerf du muscle, luy dōne force, & seureté.

*Gal. ibid.*

Après que ceste sexte coniugation de nerfz ha passé tout le col, en produisant ceste premiere diuision de nerfz, double, appartenant au thorax, & à la racine des costes, elle produit plusieurs autres diuisions, oultre icelles: en partie au cœur, en partie au poulmon, à lestomach, au ventricule, au foye, à la ratelle, & aux rongnons. Comme plus à plein sera dit en la table subsequente.

*De epiglottis.*

*Gal. libr.  
7. de usu  
part.*

**E**N l'espace interieur de larynx, par lequel l'esperit est porté dedens, & dehors, il y ha vn corps, qu'on appelle epiglottis, cest adire la lāgue de larynx: pour ce que sa figure represente la langue d'une fluste: lequel est rond, mēbraneux, humide, & visqueux, & gras. Et est vn peu plus grand, que l'otifice de larynx. Aussi il touche à œsophagus: & ha situation cōtraire  
à la

à la cartilage arytænoïdes : & procede de la racine de la langue.

Enuiron l'origine de piglottis, il y ha vn *Galibid.* petit pertuis, de costé, & d'autre, assez lōg, descendant du hault en bas, semblable à vne ligne estroite : tellement qu'on diroit plustost, que ce fust vne fissure, ou fente, que vn pertuis. Outre plus au dessoubz de ce pertuis (lequel est cause de fermer) il y ha vn grand ventricule, ou cavitè, en la partie interieure : en laquelle cavitè, quand l'air ayant grande, & ample voye, entre dedens le corps, & yst derechef : & alors rien ne vient au ventre.

Or epiglottis est appliquee à l'orifice de *Galibid.* larynx, cōme vn couuercle, de peur (quād nous transgloutissons, cest adire quand nous auallons) que le boire, ne le menger nentre soudainement dedens le cōduit de l'esprit. Car quand nous respirons, epiglottis est toute droite. Mais quand nous auallons quelque chose, alors elle gist, & tōbe dessus larynx. Car ce que nous auallons, premieremēt vient à la racine de epiglottis : & puis est porté par la spine, tellement quil contraint epiglottis à incliner, & tomber : d'autant que sa substance est vne cartilage fort subtile. Tout ainsi dōc, que la cartilage arytænoïdes est cōtrainte à incliner vers le cōduit de larynx, quand

nous vomissons, ainsi est epiglottis, quãd nous auallons. Voicy deux admirables couuercles de larynx : cestasçauoir epiglottis, & la cartilage arytænoïdes : lesquels sont cloz, & fermés par les choses prohibees d'entrer en larynx. Semblablement nature ha icy machiné, & fait telle chose, comme nous auons dit parauãt des membranes, lesquelles sont aux orifices du cœur. Car tout ainsi, que ces membranes sont faites, non pas pour garder, quil ny entre rien du tout par contraires orifices, mais de peur, quil ny en entre en abondance, & subitement. Semblablement à ce propos le cas est tel. Car quelque petite quantité du boire passe par la trachæe artere, en la rotondité, selon ses tuniques, & non pas par le mylieu dicelle, qui est laxé, & spacieux : lequel boire arrose, & humecte le poulmon, sans empescher lesperit.

*De la Bouche, & de  
la Langue.*

*Gal. libr. 8. et 11. de usu part.* **L**A Bouche, en Grec stoma, en Latin Os, il est assez notoire, quelle deuoit estre située pres du cerueau : comme tous les autres instrumens sensioires, ou sensitifz. Aussi il estoit necessaire, quelle fust en la teste, ou plustost quelle continst la langue. Car ce nestoit pas pour le mieux, que

que la langue fust nue, & totalement sans aucune couuerture : & si ne pouuoit estre mieux couuerte, que de la bouche. Pource que la langue illec situee, pouuoit mieux iuger des saueurs, & estre instrumēt pour parler : ioint aussi quelle deuoit grandemēt ayder à mascher, & à aualler les viandes. Ainsi la langue est enclose en la bouche, comme par maniere de dire en vne caverne. Et ha fallu, que la magnitude de la langue fust exactement adaptee, & correspondente à la bouche : à celle fin, quelle peust toucher en toute partie dicelle.

La langue en Grec *glotta*, en Latin *lingua*, elle est vestue d'une tunique commune à la bouche. Elle appert grande, & forte en sa base, & racine, ou elle est fichee à loz hyoides, à cause d'estre ferme. Mais elle est subtile à son extremité, à cause du foudain, & legier mouuement. Ausquelz deux offices ayde vn ligament, qui est es parties inferieures de la langue : lequel est aussi grand, comme il estoit expedient, & commode, quil fust.

Loz situé à la base, ou racine de la langue, lequel est appellé en Grec *hyoides*, à la similitude de ceste lettre Grecque *υ*, les autres l'appellent *lambdoïdes*, à la similitude de ceste lettre Grecque *λ*, combien quil soit bien petit, neantmoins il ha de

grandes, & bien opportunes vtilités. Car la plus grãde partie des muscles de la langue ha son origine de cest os : aussi ha la coniugation anterieure des muscles de larynx (lesquelz nous auons dessus parlé) & autres muscles estroitz, & lōgs:lesquelz sont portés aux omoplates.

*Gal. libr. 11. de usu part.* D'autant que la langue des hommes est double, comme sont aussi tous les autres instrumēts des sens, non pas toutesfois fendue, ou diuisee, comme celle des Serpents: mais vnīe, & coniointe, ce n'ha pas esté chose estrange, quil y eust des muscles egaux en nombre, & en magnitude, tant à dextre, que à senestre.

*Gal. ibid.* Quant aux muscles de la langue il y en ha de trois manieres:

- 1 Les vns sont implantés aux parties superieures, lesquelz esleuent la langue iusques au palais.
- 2 Les autres sont implantés es parties inferieures, lesquelz depriment en bas la langue.
- 3 Les autres sont implantés au costés, ou lateralement, lesquelz tournent la langue de costé, & d'autre.

*Gal. ibid.* Pareillemēt la langue ha deux arteres inserées, ou implantées en elle: cest asçauoir vne de chacune part. Semblablement deux veines, lesquelles nous incisons en  
aucunes

aucunes maladies.

Item deux pareilz de nerfz sont implā- *Gal. ibid.*  
tez en la langue. *¶ 9. ¶*

1. Lun est mol, lequel est distribué de la *16. de usu*  
tierce coniugation, en l'exterieure tui- *part.*  
que de la langue: pour discerner, & iu-  
ger des faueurs.

2. L'autre est dur, lequel est distribué de  
la septieme coniugation, aux muscles:  
& est conuenable au mouuement vo-  
luntaire.

*Des amygdales, que les Grecz appellent*  
*paristhmiā, & les Latins tonsilla.*

**P**Ource que la langue, quand elle est *Gal. n. de*  
deseichee, deuient plus tardieue à fai- *usu part.*  
re ses mouuements, comme il est manife- *¶ apho.*  
ste en ceux, qui ont grande soif, sembla- *16. lib. 3.*  
blement en ceux, qui nont plus d'humidi-  
té en la langue, à cause de quelques fieures  
ardentes, nature y ha merueilleusement  
bien pourueu, que la langue ne fust faci-  
lement moleste de tel accident. Nature  
aussi ha mis pres de larynx, deux glandu-  
les charneuses, semblables à esponges, vne  
de chacun costé: pour ceste meisme vtilité.  
Laquelle chose elle ha aussi faite à la lan-  
gue. Les Grecz appellent ces glādules pa-  
risthmiā, & les Latins tonsillæ (iaçoit que  
aucunes fois ilz appellēt ainsi l'inflamma-

tion dicelles parties) on les appelle vulgairement amygdalæ. Il y ha des côduitz, qui apportent dicelles glandules, par les parties obliques, & inferieures, vne humeur phlegmatique, liquide. & l'apportet à la langue, pour l'humecter, & aussi les costés inferieurs, & tout ce, qui est au circuit de la bouche, comme larynx, & la trachœe artere.

*De Vuula, en Grec gargareon.*

**A** La fin du palais, iouxte fauces, ou pharynx, appert vne particule charneuse, suspendue: les Grecz la nomment gargareon, cestadire en Latin gurgulio, & ciwn en Grec, cestadire columna en Latin: les autres l'appellent columella. Les François l'appellent la luette, vulgairement est nômee vuula. Mais à parler proprement, vuula cest la maladie de ceste partie, comme aussi on prend aucunes fois columna.

*Gal. libr.  
11. de usu  
part.*

Ceste particule est le plectre, & instrument de la voix: luy dōnant magnitude, & elegance. A celle fin, que l'air entrant en la trachœe artere, soit premierement incisé, & que sa violēce, & impetuosité, soit rompue, & aussi sa frigidité, par ce mesme moyen. Car pour certain aucuns, à qui la luette auoit esté coupee, iusques à la base,



se, & racine, non seulement en ont plus mal parlé, mais aussi ont senti l'inspiration plus froide. En sorte que plusieurs en sont mortz: à cause, que le poulmon, & le thorax auoit esté trop refrigeré par telle inspiration dair. Parquoy il ne fault pas follement ainsi couper toute la luette, ains lon doit laisser aucune partie de sa base, & racine. Vne autre vtilité de la luette est, de garder, que la pouldre, ou quelque autre telle chose, ne tombe en larynx.

### *Des Dents.*

**L**Es Dents en Grec *odontes*, en Latin *Gal. ca. 1. dentes*, sont du nombre des os: dont *lib. de osse* le nombre est de trente & deux au plus, es *sibus*, & *hōmes: cest asçauoir seize en chacune mas-* *11. de usu*  
choire, situees par ordre. *part.*

8 En la partie anterieure il y en ha quatre dessus, & autant dessous, agues, & larges. Les Grecz les appellent *tomais*, & les Latins *incisores*: pource quelles sont conuenables à inciser les viandes, à la similitude dun cousteau. Et nont que yne racine.

4 En apres il y en ha deux de chacun costé, les Grecz les appellent *cynodontes*, & les Latins *canini dentes*: pource quelles sont semblables aux dents des chiens. Car elles sont larges en la base

inferieure, & agues en la partie superieure. Et n'ont que vne racine assez longue. Sil y ha quelque chose, que les dets incisives n'ayent peu couper, ou inciser, à cause que icelle chose estoit trop dure, ces dents canines la rompent.

- 10 Oultre les dents dessusdites, il y en ha d'autres, appellees en Grec *gōphioi*, en Latin *maxillares*. Et sont le plus souuent cinq en vne maschoire, de chacun costé, cestadire tant à dextre, que à senestre. Ainsi en la superieure maschoire il y en ha dix, & autant en l'inferieure. Ce sont en tout vingt dents maxillaires. Aucuns n'en ont, que quatre en vne maschoire, de chacun costé: les autres en ont six. Toutesfois celles, qui sont fichees en la maschoire superieure, ont trois racines: mais celles de la maschoire inferieure, n'ont que deux racines. Neantmoins les deux premieres, qui sont les plus interieures, sont souuentesfois trouuees en la mandibule superieure, avec quatre racines: & en la mandibule inferieure, avec trois. Ces dents cy sont nommees non seulement molares, mais aussi *mylæ* en Grec, cestadire en Latin *molæ*, ou molares dentes, pource quelles subtilisent, & brisent les viandes, tout ainsi, que les meules des moulins brisent les bledz.

bledz. Car elles sont aspres, & larges, dures, & grandes : pour subtiliser entiere-  
ment, & briser les viandes, desia incisees  
par les dents incisoires, & rompues par  
les dents canines.

Toutes les dents sont fichees es cõcavitès *Galibid.*  
de leurs os. Et les apophyses subtiles des  
os de chacune ioue, ou mandibule, qui cõ-  
tient les dents, sont appellees phatnia en  
Grec, en Latin præsepiola, à la similitude  
des cresches, dequoy usent les bestes. Car  
à lenuiron des dents, il y ha de ces apo-  
physes, en Latin processus, qui les serrent,  
& contiennent par si fors ligaments, quel-  
les ne peuuent estre facilement cõcullées,  
ne esbranlees. Par lesquelz ligaments les  
dents sont liees: & principalement iouxte  
les racines, ou les nerfz sont implantés.  
Mais les pertuis, qui sensuiuent, sont ap-  
pellez en Grec bothria à la similitude d'une fosse.

De tous les os, il ny ha que les dents, qui *Gal. cap.*  
participent des nerfz molz, de là tierce *1. libr. de*  
coniugation du cerueau. Et pour ceste *ostibus.*  
cause les dents tant seulemēt ont euiden- *1. tē lib. 9.*  
te vertu sensitiue : pource quelles sont ex- *16. de*  
posees nues, au deuant des choses, quelles *usu part.*  
rencōtrent: ioint aussi, quil falloit quelles  
eussent sentimēt avec la langue, & quelles  
peussent discerner, & iugēt des saueurs:  
tout

tout ainsi , que les autres particules de la bouche. Et par ainsi il y ha des nerfz molz implantés aux dents.

*Des Laures.*

*Galen.li.  
11. de usu  
part.*

**L**A substâce des Laures (que les Grecz appellent *chale* , & les Latins *labia*, ou *labra*) est telle, que tu la pourrois iustement appeller muscle semblable au cuyr, ou cuyr musculieux. Car il falloit que elle eust mouuement volontaire , & que elle fust beaucoup plus dure , que les autres muscles. Parquoy nature lha temperee, & composee de cuyr, & de muscle.

*Gal. ibid.*

Quatre muscles paruiennent aux Laures : cest asçauoir,

- 1 Deux , qui ont leur origine de l'extremité de la ioue, ou mādibule inferieure.
- 2 Les deux autres sont vn peu au des-soubz des mandibules.

Les principes , & commencemens de ces quatre muscles sont manifestes , deuant quilz soyent meslés avec le cuyr. Mais depuis quilz sont meslés avec le cuyr , ilz ne apparoissent du tout plus : & ne peuvent estre separés de la substance du cuyr. Car comme nous auons dit, les Laures des animaux sont composees de toute la substance du cuyr , mellee avec toute la substance musculieuse.

Par ces quatre muscles sont faitz huit *Galibid.*  
mouuemens des Laures: cest aſſçauoir,

4 Quatre mouuemens obliques: deux  
en chacune Laure. Dont lun eſt fait,  
quand les Laures ſont menees à la par-  
tie dextre. Et lautre, quand les Laures  
ſont menees à la ſeſtre.

4 Et quatre mouuemens droitz: dont  
il y en ha deux totalement droitz: ceſt-  
aſſçauoir quand les Laures ſont en gran-  
de diſtance lune de lautre: cōme quand  
lune des Laures eſt eſtendue en hault,  
vers le nés: & lautre eſt retiree en bas,  
vers le menton. Les autres deux mouue-  
ments droitz ſont faitz, quand les La-  
ures ſont coniointes enſemble: ceſt aſſçauoir,  
quand la Laure ſuperieure eſt tiree  
en bas, & linferieure en hault.

Et tout ainſi, que en carpus, & au bras, de  
mouuemens obliques ſe font mouuemēts  
droitz, ainſi eſt il es Laures. Car ſi vn ſeul  
muscle de lune des Laures fait ſon action,  
le mouuement ſe fait oblique. Mais ſe ilz  
ſont tous deux tendus, en telle maniere  
toute la Laure eſt tiree en hault, par les  
muscles ſuperieurs, & eſt tiree en bas, par  
les inferieurs.

Or à celle fin, que non ſeulement ces  
muscles fuſſent grans, mais auſſi ceux, qui  
ſont aux maſchoires, nature ha ſoubmis  
extrin

extrinſequement vn muscle large, & subtil, en chacune part vn: procedant iusques à la spine du col. Lequel ayde fort à parler, & à mascher. Quant est de la production des fibres de ces muscles, voy en ce mesme lieu dessusdit.

*Galibid.* Oultreplus il ha esté meilleur de deduire des nerfz à la Laure inferieure, de iceux nerfz, qui sont portés par la maschoire inferieure: & à la Laure superieure deduire aussi nerfz, de iceux, qui sont portés par la mandibule, ou ioue superieure. Semblablement il ha esté beaucoup meilleur produire veines, & arteres, des plus prochaines, à chacune Laure, que den induire, & requerir des plus loingtaines.

*Des muscles mouuans  
la bouche.*

*Gale.lib.  
11. de usu  
part.*

**N**ature ha ordonné trois geres de muscles, pour mouuoir la bouche, dont,  
 1 Deux ferment la bouche, & esleuent, & soustiennent la ioue inferieure, comme pendante de elle. Pour ceste cause il ha esté raisonnable, & cōsonant, que ces deux muscles fussent les plus grans par ordre: lesquelz en Grec sont appellés *crotaphitæ*, en Latin *temporales*.  
 2 Deux autres muscles opposites, & beaucoup moindres ouurent la bouche:

2 Les autres deux sont moyens tant en magnitude, qu'en situation mouuans la bouche circulairement en diuerſes manieres: leſquelz ſont appellés en Grec *maſeteres*, en Latin *maſticatores*.

Dauantage, il y ha deux muſcles répoſelz, *Galibid.*  
ceſtaſſauoir vn à la temple dextre, & l'autre à la ſeñeſtre: dont chacun ſe finiſt en vn grand tédon: lequel ha ſon origine du mylieu du muſcle. Laquelle choſe tu ne trouueras en nulz autres muſcles. Et ſen va explâter à la pointe, & aguité ſuperieure, dite corone, de la mandibule inferieure. Lequel ſil eſt tendu, il tire ladite mandibule en hault: & adonc la bouche ſe ferme. Ces deux muſcles ſeuilz ſont cachés dedens les os de la teſte: leſquelz muſcles autres os reçoquent, & autres os les enuironnent: tellement que vne petite part, & portion diceux muſcles apparoiſt à la fin du front. Car entre tous muſcles, principalement ſi ceux cy ſont bleſſés, ilz ſont cauſe de conuulſions, fibres, caros, ceſt ce, que les Arabiſtes appellent *ſubeth*, & *delires*, ou *reſueries*: tant pource que ilz ſont prochains au principe des nerfz, qui eſt le cerueau: auſſi pource, que l'os ſeulement les engarde; que ilz ne touchent au cerueau. Item pource, que ilz ſont grandz, & ont pluſieurs principes de  
nerfz

nerfz. Il sensuit, que le cerueau sent incontinent les affectiōs, ou dispositions de iceux muscles temporelz. Pour ceste cause Hippocrates ha tresbiē dit, que les playes, & caros, cestadire subeth, sont mortelles es temples. Et deuant Hippocrates nature aussi ha preueu, que il y auoit grand danger de mort, si elle neust proueu à la seureté, & sauuegarde des muscles temporelz. Parquoy de peur, que ilz ne fussent blessés extrinsequement, nature ha mys au deuant de iceux muscles l'os dit en Grec *zygoma*, en Latin iugale, vulgairement os paris. Lequel est sans moelle, dense, & dur, en maniere de pierre : & l'ha situé tout à l'environ, comme vn parc : de peur que ilz ne fussent blessés extrinsequement.

Il y ha deux autres muscles opposites, lesquelz sont fichés, & implantés aux parties inferieures de la mandibule inferieure, incontinent apres la flexion, iusques au pres du méton: cestasçauoir vn de chacun costé, adherant des parties interieures. Lesquelz quand ilz sont tendus tous deux ensemble, ilz ouurent la bouche. Les parties de ces muscles sont charneuses au commencement, & en la fin : & nerueuses au mylieu. Ce que tu ne trouueras en nulz autres muscles. Tout ainsi, comme tu ne trouues nul tendon naissant du mylieu du muscle,



muscle, sinon es muscles temporelz.

*Des Maschoires, ou Mandibules.*

**Q**uant est des maschoires, ou man- *Galibid.*  
dibules, que les Grecz appellēt siar-  
gonēs, & genies, & les Latins genæ, ou  
maxillæ, l'inférieure mandibule ( en la-  
quelle sont implantés les muscles ouurās,  
& fermans la bouche) est mobile, & me-  
dulleuse seule. Au contraire la supérieure  
est totalement immobile, & pource elle  
n'a point de moelle.

Il y ha deux autres muscles, que nature *Galibid.*  
ha produitz pour la circulaire action de  
la mandibule, quand on masche, qui con-  
stituēt aussi la partie charneuse des ioues.  
Aucuns estiment de chacun costé, que ce  
nest pas vn simple muscle, mais triple : à  
cause quil y ha trois tendons, ou aponeu-  
roseis, ou implantations, en chacune man-  
dibule. Ces muscles mouuent circulaire-  
ment la mandibule, selon la diuerse action  
des fibres, & implantations: à celle fin, que  
diuerses actions soyent faites en maschāt,  
quand les mouuements sont faitz succes-  
siuement. Parquoy bien, & conuenable-  
ment on appelle ces muscles en Grec ma-  
seteres, & en Latin masticatores: iagoit que  
telle denomination appartienne aussi aux  
muscles temporelz. Car les muscles mase-  
k tere

teres nont autre action es mastications, si non de ioindre fort les dents ensemble. Dont sensuit, que se il y ha quelque chose entre les dents, que elle soit diminuee, & brisee. Or que la viande soit subtilisee, & brisee en petites parties, par les dents molaires; comme par maniere de dire, par meules de moulins, cest l'action des muscles appellés maseteres, ou masticatores. Car ces muscles filz sont tendus, & en contraction, ilz muent, & alterent les viandes: & derechef les ramencent, si elles nont esté mnees. Mais les muscles temporelz ny seruent de rien. Toutesfois ce nest pas tout vn de la langue: car elle est fort vtile à ceste action: dautant que elle transporte, & tourne continuellement les viandes en la bouche, à la similitude dune main: à celle fin, que de toute part lescdites viandes soyent semblablement brisees. Et par dehors de costé; & dautre il y ha vn muscle masticateur: lequel est adiuteur de la langue, comme si cestoit vne seconde main. Et aussi les fms, & extremités inferieures des ioues aydent fort à ceste action: les Grecz les appellent gnati. Lesquelles sont de substance du cuyr, & appartiennent aux Laues. Et à icelles extremités paruiennent aucuns muscles subtilz, & larges, de chacutte part vn, qui enuironnent tout

tout le col. Desquelz nous auons deuant parlé. Car les ioues, avec les Laures sont menees par ces muscles: iacoit que la ioue soit totalement immobile. Et tous les muscles, qui la meuent, ont quelque propriété, que nont pas tous les autres.

Or (à celle fin, que nous mettions fin à ceste table) il fault entendre, que la tierce coniugation du cerueau distribue nerfs à tous les muscles de la face, & quasi à toutes les autres parties dicelle face. Laquelle tierce coniugation commence illec, ou la partie anterieure du cerueau est coniointe avec la posterieure. Et de là procede par la grosse, ou dure membrane, dite vulgairement *dura mater*. En apres se partist en deux, & se distribue en la maniere, que nous auons dit.



F I N D E L A I I. T A B L E.





# TABLE TROI-

## S I E M E.



### *Des parties de la teste.*

*Ex intro  
duët. seu  
medico.*



P R E S auoir declairé assez amplemēt les parties du Thorax, & autres particulies superieures, il est temps de nous conuertir à la demonstration des parties de la teste, qui est la partie la plus difficile à bien declairer, pour les singularités, qui sont en icelle. Donc les parties de la teste, que les Grecz appellēt cephale, sont cestes: cestāsc̄auoir,

- 1 La partie anterieure, laquelle est dessus les sourcilz, sans poilz, situee entre les deux oreilles, est appellee le front, en Grec metōpon, en Latin frons.
- 2 La partie, laquelle est au dessus du front, couuerte de poilz, est nommee en Latin sinciput, en Grec bregma.
- 3 La sommité de la teste, & partie moyenne entre sinciput, & occiput, est appellee en Grec corÿphe, & en Latin vertex:  
& là

& là est vn cercle, comme procedant du centre de vertex, en Grec trichon, c'est-à-dire l'origine des poilz.

4 La partie postérieure de la teste est appelée occiput, ou occipitium en Latin, & en Grec inion.

5 La partie, qui est située entre l'œil, & l'oreille d'un costé, & d'autre, s'appelle les temples, en Grec crotaphoi, en Latin tempora.

6 Au deuant de la teste dessous tout le front, & les oreilles, les yeux, le nez, la bouche iusques au méton (que les Grecz appellent genon, & les Latins mētum) toute ceste partie ainsi circonscripte, ou limitée, commençant aux sourcilz, est appelée la face, en Grec prosopon, en Latin facies.

La teste naturelle est, comme vne sphere *Gale. lib. 9. de usu part. et de ossib. cap. 1. et in arte medica* longue, laquelle est prominēte deuant, & derrière, & de chacun costé quasi cōpressee. Mais la teste, qui ha la sommité ague, est deprauee, & nō naturelle: les Grecz appellēt vne telle teste mal formee, phoxon.

Il y ha trois figures de testes agues, & non plus. *cap. 11.*

1 La premiere est totalement contraire à celle qui est naturelle: comme quand la teste ha perdu ses deux enuincées, cest à sauoir leminence de occiput, & celle

du front. Et que elle est egale de toute part, & quasi vne parfaite sphere.

2 La seconde est, quand il ny ha nulle eminence au front.

3 La tierce est, quand il ny ha nulle eminence en occiput.

La quarte espee de la teste ague, on la peult bien imaginer, & penser: toutesfois il nest possible de la faire. Cestascavoir si lon faisoit vne teste plus prominente vers les deux oreilles, que au front, ou en occiput.

### *Des Poilz.*

*Gale. lib.  
11. de usu  
part. et 2.  
de temp.*

**P**Remierement on rencontre les poilz de la teste, lesquelz peuuent estre beaucoup augmentés, comme ceux des parties nommees mala, dautant quilz yssent dun lieu humide, & mol. Pourtant que leur vtilité estoit double:

- 1 Lune pour couvrir les parties: laquelle vtilité est de diuerses manieres, veu que nous nauons pas tousiours besoing dune mesme couuerture en toutes aages, ny en tous temps de l'année, ou en toutes regions, ou toutes cōstitutions de corps.
- 2 Autre vtilité est pour cōsumer les plus gros excrements. Car les poilz sont engendrés du plus gros, & fuligineux excrement de la tierce concoction.

**Du**

*Du cuyr de la teste.*

**L**E cuyr, auquel les poilz adherent par leurs racines, appert dense, dur, sec, & gros. Mais le cuyr du front, lequel est glabre, cestadire sans poil, à cause des yeux, & participe du mouuement volontaire, ha obtenu, & non sans cause des fibres de nerfz sensibles, & manifestes. Car au dessous de luy il y ha quelque nature musculouse, & substance subtile: laquelle reçoit plusieurs fibres de nerfz. De laquelle nature musculouse le cuyr ne peult estre separé, comme le cuyr de tout le corps: lequel peult bien estre separé. Mais pleinement ce cuyr est coalescé, & contenu auec icelle substance musculouse: & ny ha que vn mouuement des deux, lequel esleue les sourcilz. Aussi le cuyr, qui est iouxte les yeux ne peult estre excoüé, ou separé des parties subiortes, ou subiacentes. Toutefois il n'est pas laxé: & si ne ha point de mouuement sensible, comme le cuyr du front. Mais le dessous des parties dites mala adhere aux ioues: & la partie supérieure est vnüe avec la substance musculouse subiaccète au front. Parquoy elle ha peu auoir mouuement avec lesdites parties dites mala. Quant est du cuyr des Laures, nous en auons traité en la table precedente. Voila les parties externes de la teste. Quant

aux yeux, sourcilz, poilz des paupieres, ditz cilia, nés, & aureilles, nous en parlerons, quand sera le lieu. Parquoy il fault maintenant venir aux parties internes de la teste.

*Du Perierane.*

*Gal. lib. 3. de usu part.* **S**Oubz le cuyr appert vne membrane naisant de la grosse membrane, par les sutures, ou cōmissures : laquelle pour ce quelle enuironne le Crane extrinsequement, les Grecz l'appellent propremēt pericranios, ou pericranion; & cōmunement periostios, ou periostion. Car toute membrane, ou tunique laquelle enuironne les os, est communement nommee des Grecz periostios. Or ceste mēbrane (cōme nous auons maintenant dit.) ha son origine de la grosse membrane : car dicelle grosse membrane naiscent plusieurs ligamēts, ou subtiles membranes, lesquelz ligamēts yf sans hors par les commissaires, s'estendent tous vers la partie du Crane, directement correspondante à eux : dont ilz ont leur origine. Et en procedāt plus oultre se rencontret lun l'autre, & se coalescent ensemble tant, quiz sont exactemēt vnis. Et procreent de eux mesmes ceste mēbrane commune, dite pericranios. laquelle conioint, & lie la grosse membrane avec le Crane.

Du



*Du Crane.*

**L** Os, qui enuironne extrinsequeinent *Gal. libr.*  
 la grosse mēbrane, & tout le ceruëau, 8. & 9. de  
 est appellé en Grec cranion, en Latin cal- *usu part.*  
 uaria : pource quil est dessus la teste, quasi  
 comme vn heaume, que les Grecz appel-  
 lent cranos, & les Latins galea. Le crane  
 est composé de plusieurs os:lesquelz sont  
 conioints ensemble par cōmissures:à celle  
 fin, que par icelles commissures, la grosse  
 membrane soit alliee avec le crane:& que  
 les vaisseaux ayēt passage, les vns par de-  
 hors, les autres par dedens, pour produire  
 le pericrane, ausi pour donner transpira-  
 tion, & passage aux extremés fuligineux.  
 Car la teste est situee au dessus de toutes  
 les parties du corps, comme vn tect:lequel  
 est au dessus de quelque maison chaulde.  
 Dont il sensuit, que la teste ha besoing de  
 plus large, & ample euacuation, dautant  
 que elle reçoit tous les excrements fuligi-  
 neux, & vaporeux:lesquelz sont portés en  
 hault des parties subiettes, ou subiacentes.

Au Crane naturel, il y ha cinq sutures, *Gal. libr.*  
 ou cōmissures, appellees en Grec raphæ, *de ossibus*  
 en Latin futuræ, ou commissuræ : cest- *cap. 1. &*  
 asçauoir, *libr. 9. de*

- 3 Trois vrayes, serratiles, cestadire en *usu part.*  
 maniere de serres, ou syes, penetrantes  
 tout droit dedens. Desquelles trois en-

semble la figure est semblable à ceste lettre H. Dont il y en ha deux transfuersales : cest asçauoir vne posterieure, qui est en occiput : laquelle à la similitude de ceste lettre  $\Lambda$ , est appelée en Grec lambdo $\epsilon$ des. L'autre anterieure est au sinciput : laquelle est appelée en Grec stephani $\alpha$ a, en Latin coronalis. Pource que principalement on met les couronnes en ceste partie de la teste. La tierce s'estend selon la longitude de la teste : depuis le mylieu de la suture posterieure, iusques à l'antérieure. Pour ceste cause on l'appelle en Grec obel $\alpha$ a, en Latin recta, cest adire droite, & vulgairement sagittalis.

- 2 Et deux mendeuses, ou faulces, temporales, également distantes de ladite suture sagittale : lesquelles paruiennét selon la longitude de la teste, depuis la partie posterieure, iusques à l'antérieure, dessus les oreilles. Ces deux sutures sont faites de deux os coherens ensemble, non pas par vraye suture, mais los de sinciput descendant peu à peu en maniere de squame, ou escalle, deuiét subtil : & entre dessoubz los, qui môte dembas, depuis les oreilles. Pourquoy aucuns ne les ont pas appellees sutures simplement, ains à la similitude de squa-

me, les ont appellé futures, ou conglutinations lepidodædes en Grec, cest adire squameuses.

Mais les futures du Crane, qui ha la sum- *Galibid.*  
mité ague, sont constituees en ceste maniere : cest asçauoir quand la posterieure eminence est perdue, adonc la future lambdodædes est abolie, & perdue. Et quãd l'antérieure eminence est perdue, alors la future coronale est aussi perdue : tellement que la figure de ces deux futures remanentes, est semblable à ceste lettre T. Et quãd toutes les deux eminences sont perdues, adonc les deux futures sont reseruees, & gardees : cest asçauoir vne droite, & vne trãsfuersale : lesquelles se entrecassantes, & croyzantes l'une l'autre, par angles droits, representent la similitude de ceste lettre X. Car la future droite est tousiours gardée, mais la coronale, & la future lambdodædes, lesquelles varient, & se changent avec la figure de toute la teste, se perdent aucunes fois.

Les os du Crane en Grec osta, en Latin *Gal.ca.2.*  
ossa, sont sept : cest asçauoir, *lib. de oss-*

- 1 Deux appellés ossa bregmatis, id est, *sibus. Et*  
incipitis : lesquelz vulgairement on n. de use  
nôme parietalia. Ausquelz la future sa- *part.*  
gittale est commune : laquelle procede  
droit selon la longitude de la teste. Ces  
deux

deux os bregmatis sont quarrés, & gros toutesfois ilz sont cauerneux, fort rares, & bien infirmes, & debiles.

1 Item vn autre appellé os occipitis, bien dense, ferme, & fort, lequel ha vn pertuis le plus grand de tous ceux qui sont en la teste, iouxte la premiere vertebre.

1 Item vn autre au front, qu'on appelle vulgairement coronale: lequel est moyé, quât à sa substance entre les dessusdits.

2 Item deux en bas, cestasçauoir vn en chacune aureille: lesquelz pource quilz representent lespece dune pierre, les Grecz les appellent lithoæde, & les Latins lapidosa, & petrosa.

1 Le septieme cest los du palais: lequel à la similitude dun coing, est nommé en Grec sphenoædes: on l'appelle vulgairement os cunei, & os basilare. Cest os est nombré, selon aucuns, entre les os de la teste: & selon les autres, entre les os de la mādibule superieure: pource quil est situé entre deux.

### *Des Membranes du cerueau.*

*Gal. li. 9. de Ana. administ. 8. de usu part.* **I**L y ha deux membranes dessous le Crane, lesquelles couurent rondement le cerueau: les Grecz les appellent meninges, & les Latins membranæ. Toutesfois les Anciens ne les appelloient pas seules membr

membranes, mais aussi toutes les autres:  
cestasçauoir,

1. Lune extérieure: laquelle si elle est  
appelée grosse, ou dure, ou cuticulaire,  
cest tout vn. Vulgairement on l'appelle  
dura mater.

2. L'autre est du tout coniointe au cer-  
ueau: laquelle si tu la veux appeler sub-  
tile, ou molle, ou membraneuse, cest tout  
vn. Les Grecz aussi l'appellent *chorion*-  
*des*: pource que elle est semblable à la  
mêbrane secondine (qui enveloppe len-  
fant dedens la matrice) laquelle mem-  
brane les Grecz appellent *chorion*. Vul-  
gairement est dite pia mater.

La dure membrane est la couuerture du *Galibid.*  
cerueau: ou mieux, il ne la fault pas ap-  
peller couuerture simplement, mais plus-  
tost vn propugnacle, & fortresse oppo-  
sée, pour propulser les impressiōs du Cra-  
ne. Car elle cingt, & enuironne le Crane:  
& est separee du cerueau, & fort distante  
diceluy: en adherant seulement aucc les  
vaisseaux, qui en issent. Mais quād le cer- *Ga. 13. de*  
ueau se fleue, & se baisse (car tousiours il *usu part.*  
ha pulsation, & mouuement, iacoit quil  
soit contenu dun os immobile) adonc ce-  
ste dure membrane approche pres de luy:  
& puis sen eslongne, selon le lieu vuyde,  
qui est entre deux.

Ceste

*Gal. libr.* Ceste membrane est persee en maniere  
*8. & 9. de* de crible : & est redoublée, pour munir, &  
*usu part.* défendre les veines, qui montent en hault  
à la summité de la teste : lesquelles veines  
sont receûes par ladite membrane. Car par  
beaucoup de pertuis faits en icelle, passent  
plusieurs veines: les vnes petites, les autres  
grandes : dont les vnes montent, les autres  
descendent, non seulement pour donner  
le nourrissemēt, mais aussi pour conioin-  
dre, & lier tous les corps prochains avec  
la dure membrane. Or les duplications de  
ceste membrane, lesquelles portēt le sang,  
conuiennent ensemble à la summité de la  
teste, en vn lieu vuyde, quasi comme vne  
cavité, ou fosse dite en Latin lacuna. He-  
rophilus l'appelle en Grec lenon, qui signi-  
fie en Latin torcular, cest adire vn treul, ou  
vn pressoir. Et dillec lesdites duplications  
de membrane enuoyent à toutes les par-  
ties subiettes des ruisseaux innumerables:  
pource que le nōbre des parties, qui doi-  
uent estre nourries, est infiny. Mais les ar-  
teres viennent dun lieu contraire, se im-  
planter au cerueau. Car par la base, elles  
sont produites à ce fillet merueilleux, ap-  
pellé plexus retiformis, & vulgairemēt re-  
te mirabile. Or la dure membrane est plei-  
ne de pertuis, & rare : iouxte les os nom-  
més en Grec ethmoidea, en Latin colato-  
ria:

ria:desquelz nous traiterōs cy apres,pour  
trois vtilitēs : cestasçauoir,

- 1 A celle fin, que l'air paruiennent lege-  
rement au cerueau, à cause de la respi-  
ration.
- 2 Et que la vapeur ausſi y paruienne, à  
cause de la congnoiſſance des odeurs.
- 3 Et finalement : à celle fin, que labon-  
dance des excrements ſoit ſoudainemēt  
euacuee, quand il en eſt beſoing.

L'autre membrane dite vulgairement pia *Galen.li.*  
mater, eſt vne couverture naïue au cer- *3. de uſu*  
ueau. Car elle leſtabliſt, & couure : & da- *part.*  
uantage elle lie, & conioint tous les vaiſ-  
ſeaux, qui ſont au cerueau : pource quelle  
eſt ſemblable à la ſecondine, & au meſen-  
tere. Car tout ainſi, que la ſecondine, &  
auſſi le meſentere ſont composēs de plu-  
ſieurs arteres, & veines prochaines lune à  
l'autre, & dauantage d'une membrane ſub-  
tile, tiſſant les eſpaces moyens entre icel-  
les arteres, & veines ſemblablement ceſte  
membrane contient les arteres, & veines  
de tout le cerueau : de peur que elles ne  
ſoient miſes lune apres l'autre, & ne ſe re-  
plient. A celle fin auſſi, que elles ne ſoient  
transmues de leur place, quand elles font  
leurs mouuemens : veu que leur baſe, &  
ſiege eſt infirme, & debile : en tant quel-  
les ſont portees en vn corps humide, &  
mol,

mol , & quasi fluxile , ou fluide. Dont il sensuit, que ladite membrane non seulement embrasse le cerueau, mais aussi elle se infinue, & met d'icelle la profondeur du cerueau : procedant par toutes ses parties, & le liant tout, & soy estendant de toute part, iusques à l'interne capacité des ventricules dudit cerueau.

*Galibid.* Or tout ainsi, comme entre la terre, & le feu (pource quilz sont fort dissemblables, & de contraire nature ) Dieu ha entremis leaue, & lair : ainsi que dit Platon. Pareillemét entre le Cerueau, & le Crane (pource quilz sont de substance fort differente) nature y ha mys les deux membranes dessusdites. Car si nature neust fait que la subtile membrane, certainemét il eust esté impossible , que elle se fust accoustumee, ou habituee avec le Crane, sans en estre blessée aucunement. Aussi si nature neust fait, que la grosse membrane , le Cerueau en eust esté blessé. A celle fin donc, que le cerueau, & aussi sa couuerture neussent aucune passion, la subtile membrane ha esté située, & mise la premiere, aupres du cerueau, & puis apres la grosse membrane : laquelle d'autât que elle est plus molle, que los, d'autant est elle plus dure, que la subtile membrane. Et d'autât, que ceste subtile membrane est plus molle, que la grosse,



grosse, dautant le cerueau est plus mol, que la subtile membrane. Parquoy naturellement de deux moyens, ha cōioint seulement, & sans offense le crane, & le cerueau, moyennant vn petit interualle, ou espace entre deux.

*Du Cerueau.*

**L**E Cerueau en Grec est nommé encephalon, à cause de sa situation, pource quil est situé en la teste: & en Latin cerebrum. Cest le domicile de lame ratiocinatrice, ou raisonnable, & le principe, ou commencement des nerfz, & de tout sentiment, & mouuement volontaire.

La substance du cerueau est semblable à la substâce des nerfz, sinon quil est plus mol, que les nerfz. Car cela luy estoit cōuenable: pource quil reçoit tous les sens, ou sentiments, & comprend toutes imaginations, & intelligences.

Et pourtant, quil estoit necessaire, quil y eust double matiere des nerfz, aussi le cerueau est double: cest asçauoir,

1. Anterieur, lequel derechef est diuisé en dextre, & senestre, par la dure membrane. Herophilus appelle ce cerueau anterieur par le nom du tout, cest asçauoir le cerueau, à cause de sa magnitude. Car il est beaucoup plus grand, que toute

*Gal. libr.*  
9. metho.  
C 8. de  
usu part.

*Gal. libr.*  
8. de usu  
part.

C 9. de  
anat. ad-  
ministr.

toute parencephalis : dautant quil est estendu depuis la suture lambdoeides, iusques au front. Et ha fallu ; quil fust plus mol, que parécephalis : pource quil deuoit estre le principe des nerfz molz, appartenans aux organes, ou instrumens senssoires, ou sensitifz .

- 2 Le cerueau posterieur est contenu à la spinale medulle, ou moelle. Les Grecz appellent ce cerueau posterieur parencephalis: pource quil est adiacent à lautre , autrement encranion. Et les Latins lappellent cerebellum , pource quil est petit. Car il occupe seulement occiput, & est enueloppé de ses propres mébranes , & non pas des grandes flexuosités comprinses par la subtile membrane, comme est le cerueau antérieur : mais il est composé de plusieurs corps, qui sont bien petis : non pas toutesfois de semblable maniere. Sa fin est situee aupres du cōmencement de la spinale medulle : & pource il y est plus dur : dautant quil deuoit estre le principe des nerfz durs ; lesquelz doiuent estre distribués par tout le corps vniuersel. Car de ceste partie posterieure du cerueau nul nerf mol nen est produit : iagoit que de la partie anterieure en soient produitz aucuns nerfz durs , lesquelz doiuent mou-  
 uoir

uoir les yeux.

Or le cerueau anterior, & posterieur sont diuisez par la dure membrane redoublee. Et sont coniointz par vn conduit, qui est dessoubz la summité de la teste (duquel tantost nous parlerons) & par les corps enuironnans ce conduit.

Maintenant il est temps de parler de la construction, ou composition de tout le cerueau. Et quelle vtilité ont les corps, que les Grecz appellent *choroide*. Item de la multitude des *vêtricules* du cerueau: & du corps, dit en Grec *psallioedes*, de *conarion*, *gloutia*, *epiphysis vermiciformis*, & des conduitz, qui purgent le cerueau. Item de la cavitè dite en Grec *choane*, ou *choana*, de rete mirabile, autrement *plexus retiformis*. Des *apophyses* des nerfz procedantes non seulement aux instrumens des sens, mais aussi en *pharynx*, & *larynx*, en *gula*, au ventricule, aux visceres, en tous les intestins, & finablement en toutes les parties de la face. Item les productions en la *spinale medulle*. Quant est des deux membranes nous en auons deuant traitté: la ou nous auons ensemble parlé des vaisseaux, lesquelz se implantent au cerueau, de diuers lieux, ou plustost du tout contraires: par vne merueilleuse prouidence du createur. Lequel ha

produit du foye les veines, & du cœur les arteres : qui montent en hault par le thorax, & par tout le col, iusques à la teste. En apres il ha produit les arteres, iusques au rete mirabile : & les veines iusques à la summité de la teste. Et ce avec grande assurance : comme il ha esté dit en ce mesme lieu. Or disons donc par ordre de toutes les parties dessus nommees, & premierement des corps appellés *choroïdes*, ou *plexus choroïdes*.

*Des corps, que les Grecz appellent  
plexus choroïdes.*

*Gal. libr.  
8 de ana.  
administ.  
C 8. de  
usu part.*

**V**Ne grand part, & portion du cerueau doit estre ostee, avec vn scalpelle, ou rasoir : tant qu'on soit paruenue à la region calleuse, cestadire, qui represente aucunement la nature dun calle. Apres laquelle on rencontre les deux ventricules anterieurs du cerueau: cestasçauoir lun à la dextre, & lautre à la fenestre : lesquelz sont dispersés par tout le cerueau. En ces deux ventricules apparoissent les corps ditz *plexus choroïdes*, qui sont formés, & tissus, comme la membrane secondine. Pourquoy les Grecz les ont appellés *choroïdes* : en desduisant le nom de la membrane, qui enuironne exterieurement lenfant, qui est en la matrice: lesquelles textures,

res, ou plexus choroïdes sont les conuolutions des veines, & arteres, contenues de subtiles membranes. Semblablement le cerueau est tissu, & implexé de veines, & d'arteres, liees avec la subtile membrane: laquelle (comme iay deuant enseigné) ha vne substance semblable aux membranes secondines, ou secondes: & à la membrane succingente, dite en Grec hypozocos: Et au peritoine: & autres telles.

*Des Ventricules du cerueau.*

**E**N tout le cerueau, il y ha quatre ventricules, esquelz beaucoup desperit animal est cōtenu (lequel esperit non seulement est contenu en ces quatre ventricules, mais aussi en tout le corps du cerueau, & beaucoup au cerueau posterieur) cest asçauoir,

*Gal. libr. 9. de usu part. & 9. de ana. administ.*

- 2 Deux ventricules anterieurs: entre lesquels il y ha vn entredeux, distermiñāt le dextre ventricule du fenestre. Et est de telle substance, que le cerueau: toutesfois il est si subtil, que sa splendeur reluit, comme vn myrouer. Ces deux ventricules sont l'inspiration, & expiration, & lefflation du cerueau. Aussi ilz sont, & preparēt au cerueau lesperit animal, par les textures, dessusdites plexus choroïdes. Item ces deux ventricules en-

uoient de leurs parties inferieures deux canalz, ou voyes aux narilles: à cause de l'inspiration: & de l'odoration, ou olfaction: aussi à cause de purger les excremens, ou superfluités du cerueau. Desquelz nous parlerons vn peu apres.

1 Il y ha vn lieu, ou conduit, auquel ces deux ventricules anterieurs s'assemblét, & conuiennent: lequel si tu lestime estre vn conduit commun aux deux ventricules, ou quelque autre tiers ventricule oultre les deux dessusditz, il ny ha pas grand different. Ce cōduit reçoit l'esprit, des ventricules anterieurs: & lenuoye à parencephalis. Laquelle est coniointe au cerueau anterieur, par ce conduit, comme nous auons deuant dit. A ce conduit seruent ces parties circoniacentes, en le fermant, & ouurant: cest asçauoir le corps appellé psallionides, enarion, gloutia, & epiphysis vermiformis.

1 Le quart, & dernier ventricule est au petit cerueau, ou parencephalis, ou cerebellum, ou cerebrum posterius, cest tout vn. En ce quart ventricule le conduit commun dessusdit entre, transportant l'esprit animal, parauant elabouré aux deux vétricules anterieurs. Ce quart ventricule est le moindre de tous: pource  
quil

quil contient leſperit tresbien elabouré à perfection, & beaucoup. Car tous les nerfz, qui ſont distribués au deſſoubz de la teſte, par tout le corps, ou ilz ont leur origine du cerueau poſterieur, ou de la ſpinale medulle. Or tout ainſi, que les deux premiers ventricules anterieurs ſont dediés à limagination, & le tiers, qui eſt au mylieu, à la cogitation: ſemblablement ce quart, & dernier ventricule eſt dedié à la memoire.

*Du corps ſemblable à une vouſte, qu'on appelle pſallioedes en Grec, en Latin fornix.*

**L**A partie du cerueau, laquelle eſt deſ- *Gal. libr.*  
ſus le ventricule commun, eſt faite à *8. de uſu*  
la ſimilitude de la ſuperficie concaue du- *part.*  
ne ſphere, ou comme vn teſt de maiſon.  
Et pource eſt appellee en Grec camarion,  
& pſallioedes. Car ceux, qui ſont ſçauans  
en larchitecture, ont de couſtume dappel-  
ler telz edifices camaræ, ou pſallides en  
Grec, & en Latin camerae, fornices, ou te-  
ſtudines, ce ſont vouſtes en François. Il ny  
ha autre vtilité de ce corps dit pſallioe-  
des, que celle des vouſtes es edifices. Car  
tout ainſi, que les vouſtes ſont plus aptes,  
& idoynes, que toute autre figure, pour  
1 4 ſouſt

110 T A B L E  
 soustenir les faix, & charges incombentes. Semblablement ce corps psallion des soustient toute partie incōbente du cerueau: sans douleur, & sans moleste. Car la figure ronde est de toute part semblable à soy mesme: & pource entre toutes figures, elle est la plus difficile à souffrir, & la moins passible. Aussi est elle la plus capable entre toutes figures, ayans egale perimetre, cest adire egale circonference.

*De cœnarion.*

*Gal. libr.  
 1. de usu  
 part.*

**I**Ouxte le principe du conduit, qui enuoye lesperit animal, depuis le ventricule moyen, iusques au posterieur, & dernier, il y ha vn corps, que les Anatomistes appellent cœnarion: pource que sa figure est semblable à vne pōme de pin, laquelle en Grec est nommee cœnus. Sa substance est glanduleuse. Aussi il est fait pour vn tel vsage, & vtilité, cōme les autres glandules, lesquelles remplissent, & tiennent fermes les diuisions des vaisseaux. Car cœnarion remplit la diuision de la grande veine: de laquelle veine quasi toutes les textures, qui sont aux ventricules anterieurs ( que nous auons dessus appellés plexus chæroides) sont composees.

*Des*



*Des deux eminences du cerueau,  
en Grec gloutia , en Latin  
nates,ou gemelli.*

**D**E chacune partie de ce conduit , ou ventricule moyen , tant dextre, que senestre, il y ha de subtiles, & bien lōgues eminēces du cerueau, qui reçoient cōnation : lesquelles en Grec sont appellees gloutia , & en Latin parux nates , ou gemelli. La concurrence dicelles peult estre tresbien comparee aux deux cuisses des hommes, coniointes ensemble. Aucuns les comparēt aux deux testicules appellés en Grec didymi, id est, gemini, ou gemelli, en Latin : & pource les ayment mieux nommer didymia , que gloutia. Les autres appellent les corps prochains à cōnation, didymia : & les autres corps prochains à ceux cy , ilz les appellent gloutia. Entre ces deux corps nommés gloutia, ou nates, consiste le conduit, qui vient du ventricule moyen, au posterieur.

*De lepiphyse, ou excrescence  
urmi forme.*

**I**L y ha vne epiphyse , cest adire vne ex- *Gal. ibid.*  
crescence, ou addition , ou appendice,  
qui gist au dessus du conduit dessusdit.  
& est estendue selon tout ce conduit , le  
courāt du tout. Laquelle epiphyse, pour

sa seule figure, est appellee en Grec *scœlécodes*, en Latin *vermiformis* : pource quelle est semblable à vn vers naissant en quelque boys:lequel est nommé en Grec *scœlechos*. Ceste epiphyse, ou excrescence, nest point plus grosse, ne plus subtile, quil nappartient : & est articulee en plusieurs manieres. Aussi elle est composee de plusieurs particules connexees, & coniointes ensemble, par subtiles membranes : ayant telle vtilité, comme pylorus, cestadire le portier du ventricule, ou de lestomach. Car tout ainsi, que pylorus prohibe, & engarde, que la viande ne soit transportee du ventricule, à lintestin subtil, deuant quelle soit cuite : pareillement ceste epiphyse preside, & domine au passage de lesperit animal, iusques au ventricule posterieur : comme vne garde, & economer, cestadire dispensateur, qui ne laisse passer duduit esperit non plus, quil en fault. Car elle ferme, & ouure ledit conduit, selon que la chose le requiert.

*Gal. ibid.* Mais pource, que ceste apophyse deuoit auoir plusieurs, & faciles mounemés, à cause de plusieurs articles, & flexions, dont elle est composée: & quil y auoit dangier, quelle ne fust deiettee, & separee des dos de glouria, lesquelz sont coniointz ensemble, & quelle ne delaisast le conduit

duit dessusdit. Nature luy ha machiné, & fait aucuns ligaments, avec gloutia : lesquelz ligaments les Anatomistes appellent tendons. Par lesquelz elle est estroitement liée de tous costés, & tellement contenue, que elle ne peult diuagner, ny aller çà, ny là.

*Des conduitz, qui purgent  
le Cerueau.*

**L**Es excrements du cerueau sont de *Gale lib.*  
deux manieres. *9. de usu*

1 Les vns sont vaporeux, & fumeux, ou *part.*

fuligineux, & legers : lesquelz comme ( nous auons dit ) sont purgés, & euacués, par les sutures situées en lieu hault.

2 Les autres excrements sont, comme aqueux, & lymonneux, pituiteux, ou phlegmatiques, gros, & pesants. Et pour ce ha fallu, que ilz fussent euacués par aucuns conduitz decliues, cest adire descendants : desquelz maintenant conuient parler.

Il y ha deux canalz, ou conduitz, qui paruiennent des ventricules anterieurs du cerueau, iusques aux narilles. Lesquelz sont faitz pour trois ytilités.

- 1 La premiere , & la principale vtilité, cest à cause de l'inspiration au cerueau.
- 2 La seconde, à cause de l'olfaction, ou odoration.
- 3 La tierce , à cause de purger les excrements , & superfluités du cerueau. Aufquelles superfluités si nature ne y eust fait quelque voye, & conduit, souuentefois nous tomberions en apoplexie.

*Gale.lib.* Quant aux conduitz, qui font l'instrument de l'odoration, la grosse membrane, dite dura mater, leur donne vne couuerture, rare, & pleine de plusieurs pertuis, comme nous auons deuant dit. Et pour la composition de ceste couuerture, nature luy ha mys au deuant, des os ayants plusieurs pertuis, comme vne esponge: à celle fin, que quelque autre corps dur ne tombe dessus extrinsequement: & que l'air froid ne entre dedens les ventricules du cerueau, quand nous inspirons: & aussi, que les superfluités (lesquelles sont coulees par lesditz os) ne tombent trop subitement. Ces os des narilles sont pertuisés, & cauerneux: parquoy sont appellés en Grec *ethmoide*, à la similitude dun crible, dit en Grec *ethmon*, ou mieux *sphongoide*, à la similitude dune esponge. Car ilz ont diuers pertuis, comme les sponges: & toutesfois ces pertuis ne sont pas droitz

droitz, comme ceux des cribles. Vulgairement on les appelle colatoria: pource que ilz coulent les superfluités.

Il y ha deux autres conduitz, qui descendent au palais: *Gal. lib. 9. de usu part.*

1 Lun descend du fond du moyen ventricule du cerueau.

2 L'autre yst du conduit, lequel conioint le cerueau avec parencephalis. Et descend obliquement, vers l'autre cerueau.

Quand ces deux conduitz se assemblent en vn, il y ha vn lieu commun, qui les reçoit: lequel est caue, & decline, ou descendant. Sa Laure superieure est vn cercle parfait. Et de illec deuient tousiours plus estroit, en descédant: & se met, ou infinue en vne glandule, situee au dessoubz: laquelle est semblable à vne sphere de terre: ayant cauité manifeste. En apres l'os ethmoïdes, finissant au palais, reçoit ce conduit: duquel os nous auons deuant parlé. Voyla donques la voye des grosses superfluités.

Or l'utilité de tous les instruments, qui sont en ceste voye, est manifeste. Mais la cauité commune, qui reçoit ces conduitz (laquelle aucuns appellent en Grec *ptyelos*, en Latin *peluis*, cest adire vn bassin: les autres, à cause de son vtilité, l'appellent en Grec

Grec choane, en Latin infundibulum (cest adire vn entonnoir) à l'utilité quasi dune lacune, ou fosse, quant aux parties supérieures : & pour ceste cause vulgairement est dite lacuna. Mais quant aux parties inférieures (comme son nom le monstre) elle ressemble à vn entonnoir : & illec elle ha vn conduit sensible, & manifeste, iusques au ventricule de la glandule dessusdite. Or dautant quil falloit, que ceste cavité, appelée choane, fust coniointe au cerueau, par le hault, & implantée à ladite glandule, par le bas, en descendant : il ha esté conuenable, quelle fust membranueuse. Dauantage dautant, que la subtile membrane contient le cerueau, ce n'estoit pas chose raisonnable, de requerir vn autre ligament, pour lier ladite cavité avec le cerueau. Parquoy ce ha esté chose iuste, & conuenable, que vne part, & portion, produite de ceste subtile membrane, constituast le corps de ceste cavité.

*Du fillet admirable, dit plexus retiformis, vulgairement reticulaire.*

*Gale. lib.  
9. de usu  
part.*

**A** La base du cerueau, iouxte ceste glandule dessusdite (pource que cest vn lieu le plus seur, qui soit en tout le corps) nature ha colloqué, & mis vn corps, appelé

pellé en Grec plegma dictyoædes, en Latin plexus retiformis, vulgairement rete mirabile, qui est le plus admirable, & merueilleux de tous les autres corps, qui soyét en ce lieu. Lequel enuironne ladite glandule: & paruiet bien loing derriere. Or à celle fin, que il ne fust pressé des os subietz, la grosse membrane luy ha soubsterné, & estendu au dessoubz, vne part, & portion produite d'elle mesme. Ce fillet cy nest pas simple: mais tel, comme si tu assemblois plusieurs filletz de pescheurs, iet tés les vns sur les autres. Toutesfois ce fillet ha telle propriété, que les replications, ou replis de lun, sont coniointz avecques les replis de lautre: en sorte, que il nest possible den rien prendre, qui soit séparé lun de lautre. Aussi nest il pas fait de toute matiere sans choïs, & election: ains nature lha composé dune grande part, & portion des arteres carotides: lesquelles montent du cœur, iusques à la teste. Voylà la matiere, de quoy ce fillet admirable est fait. Car aucunes petites propages, ou rameaux procedent de icelles arteres carotides, iusques au col, & à la face, & aux parties externes de la teste. Et tout le reste desdites arteres (comme il ha esté depuis le commencement) montent droit en hault, par le thorax, & par le

le col,iusques à la teste. Lesquelles arteres, apres que elles ont passé oultre le crane, au lieu moyen , entre ledit crane , & la grosse membrane, premieremēt elles sont diuisees en plusieurs arteres , fort petites, & subtiles: en apres vne partie de icelles sen va aux parties anterieures de la teste, & les autres aux parties posterieures: les autres à la fenestre , les autres à la dextre, entrelassees , & compliquees ensemble. Consequemment de ces arteres,comme racines coalescentes , & vnies ensemble , en vn tronc,naist vne autre coniugation d'arteres:egale à celle,qui du commencement procedoit du cœur, en montant en hault. Et en ceste maniere entre dedés le cerueau par les pertuis de la grosse membrane.

*Galibid.* Tout ainsi donc, que nature ha preparé  
*et lib.7.de* au sperme , ou semence , vne circonuolu-  
*placitis* tion,& anfractuosité, deuāt les testicules  
*Hippo.et* & au laiēt,vne lōgitude de vaisseaux,ten-  
*Platonis.* dans aux mamelles: à celle fin , que la se-  
 mence,& aussi le laiēt(apres auoir demou-  
 ré long temps es instrumēs de cōcoction)  
 soyent plus exactement , & parfaitement  
 elabourés. Pareillement nature faisant de  
 l'esprit vital,lesprit animal,ha fabriqué,  
 & fait pres du cerueau le rete mirabile,  
 semblable à vn labyrinthe: auquel lespe-  
 rit est elabouré. Et puis il est enuoyé, &  
 transm



transmis aux ventricules anterieures: esquelz il est encores mieux preparé, & elaboré. En apres il est enuoyé, par le conduit commun, au ventricule posterieur, au quel il acquiert parfaite elaboration.

*Des productions, ou origines des nerfz.*

**L**Es nerfz sont produitz du cerueau, *Gal. li. 1.*  
 Lou de la moelle spinale. Toutesfois *de motu*  
 vn mesme instrument ha deux noms, à cau *muscul.*  
 se de ses deux operations, cest asçauoir en  
 Grec neuron, en Latin neruus, cest adire  
 nerf: pource quil est fait pour fleschir: ce  
 que signifie neuerein verbe Grec, en Latin  
 nutare, seu flectere. Lautre nom est tonos  
 en Grec: pource que il est aussi fait pour  
 tendre, ce que signifie teinein verbe Grec,  
 en Latin tendere. La substance des nerfz  
 est telle, comme si tu entends, & imagines  
 vn cerueau constipé, & condensé, & con-  
 sequemment endurcy.

Nature ha eu trois scopes, & intentions *Gale. lib. 1. de usu.*  
 en la distribution des nerfz,

- 1 Le premier scope ha esté, à celle fin, *part.*  
 que elle departist sentiment aux instru-  
 ments sensioires, ou sensitifz: à cause de-  
 quoy elle ha donné de bien grans nerfz  
 à la langue, aux yeux, & aux oreilles:  
 & dauantage aux parties internes des  
 mains,

maines, & à lorifice de leſtomach, ou ventricule : car ces parties ſont aucunement ſenſibles. Pource que par les mains, plus que par autres parties, nous auons trefcertaine congnoiſſance de l'atouche-ment : iaçoit que il y ayt ſix cents particules ſenſibles, par maniere de dire. Et lorifice de leſtomach ſent bien le deſault du nourriſſement : qui neſt autre choſe, que auoir faim. Or en toutes ces particules, veu quelles ſont ſenſibles, on y trouue de grans nerfz.

2 Le ſecond ſcope ha eſté, à celle fin, que nature donnaſt mouuement aux instruments motoires, ou motifz : comme aux muſcles, qui ſont instruments du mouuement volontaire : leiſquelz (d'autant que ilz ſont faitz pour mouuoir les membres du corps) reçouyent de grans nerfz.

3 Le troiſieme ſcope eſt, à celle fin, que toutes les autres parties euſſent congnoiſſance des choſes, qui leur cauſent douleur. Et pour ceſte vtilité nature ha diſtribué des nerfz en toutes parties : non pas ſelon vne meſme meſure, mais aux vnes plus, & aux autres moins. Tout ainſi, que à tous instruments nutritifz (veu, & conſideré) que nul d'iceux neſtoit instrument ny du ſentiment, ny du mou

mouuement, il ha esté expedient, que nature leur ayt donné de petis nerfz, pour accomplir le tiers scope, & vtilité. C'estasçauoir à celle fin, que ilz apperceussent par leur sentiment les choses à eux molestes, & grieues.

Or combien, que les nerfz soyent portés *Gale. 16.* en toutes les parties du corps, toutesfois *de usu* nul ne est implanté aux os (exceptés les *part.* dents) ny aux cartilages, ny aux ligaments ny en la gresse, ny finalement aux glandules, lesquelles sont comme letablissement des vaisseaux: cestadire ce, qui soustient, & deffend la diuision desditz vaisseaux. Car toutes ces particules dessusdites ne ont eu beioing ny de sentiment, ny de mouuement. Mais les glandules ordonnees de nature pour engédrrer aucuns sucz, & humeurs vtiles au corps, ainsi que elles ont des veines, & arteres, aucunesfois manifestes, & grandes, aussi ont elles des nerfz, pour vne raison commune à toutes icelles parties: car nature ha créé les muscles, pour le mouuement volontaire. Par ainsi, iagoit que tous nerfz ayent les deux facultés, & vertus (cestasçauoir du sentiment, & du mouuement) toutesfois nulle autre partie receuant nerfz (sinon le muscle) n'ha aucun mouuemēt volūtaire: mais elle sent tant seulemēt, comme le cuyr, les

membranes, les tuniques, l'artere, la veine, les intestins, l'estomach, tous les visceres, & finalement la seconde espece des glandes. Sept coniugations de nerfz sont produites du cerueau, oultre deux grandes productions du cerueau, aux narilles, à cause de l'odoration, ou olfaction: lesquelles ne sont pas comptees entre les coniugations des nerfz: pource que elles ne ont pas telles productions de nerfz, comme les autres: ioint quelles ne yssent pas hors du crane.

- 1 La premiere coniugation prend sa naissance illec, ou les deux ventricules anterieurs finissent lateralement. Et environne rondement l'humour vitree, comme vn fillet. Et est implâtee en l'humour cristalline, transportant aux yeux la vertu visible. Pourquoy ces deux nerfz sont appellés en Grec optici, en Latin visorij: lesquelz seulz entre tous nerfz ont conduitz sensibles, & manifestes. Dont plusieurs aussi les ont appellés pores, pource que eux seulz contiennent beaucoup de spirit animal: Et pource ilz sont caues, & gros, & bien grands, & les plus molz de tous: combien que les autres sens ayent aussi nerfz grands, & molz. La figure de ces nerfz optiques est semblable à X, lettre Grecque, en sorte, que

quelc

quelcun penseroit , que ilz montassent lun sur lautre : mais il nest pas ainsi. Car dedens le crane ilz conuiennent , & se assemblent en vn , pour cōioindre leurs conduitz. Et derechef deuant, quilz entrent dedens les yeux, ilz se separent. Et ce pour deux vtilités. Dont la premiere est , à celle fin, que ce, que nous voyons extrinsequement, napparoisse estre double. La secōde vtilité, si lun des yeux est clos , que tout lesperit soit porté à lautre œil , par le nerf commun . Et ainsi quand la faculté visible est doublee , la veine deuient plus ague.

- 2 La seconde coniugation est des nerfz, q sont implantés aux muscles des yeux: lesquelz muscles iāçoit quilz soyēt bien petis, neātmoins iceux nerfz sont grans, & durs: combien quilz soyēt plus molz, que il ne appartient aux nerfz motifz, mais la mollesse est recompensee par leur grandeur.
- 3 La tierce est produite illec , ou la partie anterieure du cerueau est coniointe avec la partie posterieure . Laquelle procede par la grosse membrane , dite dura mater . En apres est diuisee en deux : & consequemment est distribuee en plusieurs. Et premieremēt elle se produit aux deux parties de la langue , &

en toutes les parties de la boucher à cause du goust. Car tout incontinent quelle est implantée en la langue, elle se amplifie, & eslargist, en tissant, & composant l'externe tunique de la langue ( par laquelle tunique la langue deuoit toucher les faueurs ) sans rien toucher aux muscles de dessous. Or les genciues, & toutes les dents, la tunique interieure du nez, les Laures, tout le cuyr de la face, & tous les muscles, & quasi toutes les parties dicelle face, reçoient aucuns rameaux, ou propagines, de ceste tierce coniugation: par les os, qui sont persés, à cause delle: lesquels os donnent passage esdits rameaux, en quelque part, quilz tendēt, ou procedent. Auquel passage les nerfz deuiennent si durs, quilz mouuent les muscles: iagoit que ces nerfz soient petis.

- 4 La quarte est située vn peu plus arriere, yssāt de la base du cerueau, plus bas, que les autres. Laquelle quarte coniugation est fort petite: & vn peu plus dure, que la tierce. Mais tous ses rameaux sont pres lun de lautre: car incontinent elle se mesle avec les nerfz de la tierce coniugation. Et puis est portée bien loing avec elle. Et finalement se separer dauec elle: & sen va planter en toute

toute la tunique du palais.

5 La cinquieme, laquelle n'est pas encore dure, en passant par les os, est diuisee en deux parties. D'ot lune est distribuee au conduit auditoire, ou de l'ouye: l'autre est distribuee au pertuis, dit cæcum foramen: ainsi nommè, non pas quil soit sans fin, mais à cause de la flexuosité oblique du conduit.

6 La sixieme, oultre les dessusdites, est produite de la base du cerueau: laquelle n'est pas encores dure. Toutesfois elle est d'autant plus dure, que toutes les autres deuât dites, d'autât que elle est desia plus pres de la spinale medulle. Ces nerfz cy sont distribués presque en tous les intestins, & visceres: à cause du seul sentiment: & aussi produisent les nerfz recurrents, ou reuerfifz: desquelz parauant nous auons parlé.

7 La septieme procede dillec, ou est la fin du cerueau, & le commencement de la spinale medulle. Et apres que elle ha aucunement procedé avec les nerfz de la sexte coniugation, puis elle en est separee. Et adonc d'une petite part, & portion d'elle sont tissus les muscles droits de Larynx: & de l'autre part, & portion, qui est plus grande, elle sen va implanter en toute la lāgue, ou en tous les mu-

scles dicelle : à cause du mouuement.

*De la spine.*

*Gal. libr. 11. de usu part. et de ossibus. c. 7. 8. 9. 10.* **T**oute la Spine, en Grec rachis, en Latin spina, est comme le fond d'une nef, en Latin carina : & est nécessaire à viure. Laquelle ha quatre parties bien grandes : cest asçauoir,

*11. 12.* 1 Le col, en Grec trachelos, en Latin colum, ou ceruix, est cōioint avec la teste. Auquel sont sept spondyles, ou vertebres plus petites, que toutes les autres. La premiere vertebre est la plus large, & la plus subtile. La secōde est plus estroite, & plus forte. Et ainsi sont les autres consequemment. La premiere vertebre ha double cauité : laquelle cauité contient les conuexités, cest adire gibbosités, ou apophyses de la teste. Et par le benefice, & moyen de ceste articulation, la teste ha mouuement de costé, & d'autre. La seconde vertebre ha vne apophyse d'une part, & d'autre, acclieue, ou descendente, & bien longue : laquelle est lyee avec la teste, par vn ligament fort robuste. Par le benefice dicelle articulation, la teste est esleuee, & baissée. Les ieunes medecins appellent ceste apophyse, ou processus, pyrenoides : pource quelle est de figure tendant  
en



en acuité , laquelle en Grec est appelée pyramidalis, & en Latin turbinata. Mais les Anciens , & mesmement Hippocrates, l'ont nommée dent.

- 2 En apres sensuit metaphrenon, en Latin dorsum, cest le dos : lequel ha telle longueur, comme le thorax. Car il y ha en luy douze vertebres , receuans les douze costes.
- 3 Lumbus, en Grec osphys , & ixys , est au dessoubz de metaphrenon : auquel il y ha cinq grandes vertebres.
- 4 Item los appellé en Grec hieron, en Latin sacrum, les autres l'appellent platy en Grec, & en Latin latum, est au dessoubz des dessusdits : lequel est la dernière partie de la spine, & cōme vn fondement subiect à toutes les vertebres. Or il est composé de trois parties, comme de ses propres vertebres. En l'extremité dicelles y est adiousté vn autre os quart , qui est appellé en Grec coccyx, vulgairement cauda. Lequel est composé de trois propres particules : lesquelles sont plus cartilagineuses , que nest os sacrum , & principalement en l'extremité.

Et ainsi la spine est composée de vingt & quatre vertebres, en Grec spondyles : encores oultre os sacrum, duquel les os ne

font point comptés entre les vertebres. Et fil y en ha plus, ou moins, elles sont contre nature. Or toutes vertebres ont vne apophyse posterieure, qui est appellee en Grec *acantha*, en Latin *spina*: exceptee la premiere vertebre, laquelle ha vne petite apophyse, en la partie anterieure seulement.

*De la spinale moelle, ou medulle.*

*Gal. li. 9.* **T**Out ainsi, que la grande artere yst  
*12. 13. &* du cœur, & la veine caue du foye,  
*16. de usu* semblablement du cerueau est produit vn  
*part. et li.* tronc, estendu par toute la spine: lequel  
*1. de motu* est appellé en Grec *νωτιος myelos*, en  
*muscul.* Latin *spinalis medulla*, & vulgairement  
*nucha*. Cest le principe, & racine des nerfz  
durs: & pour ceste cause elle est beaucoup  
plus dure, que le cerueau: pourtant que le  
corps dicelle moelle spinale est semblable  
ha vn cerueau fenne, & compacte, & par  
consequent endurcy. Car la partie poste-  
rieure du cerueau, laquelle est continue à  
la spinale medulle, est plus dure, que la  
partie anterieure. Et en ce lieu la spinale  
medulle est plus molle, que en toutes ses  
autres parties: & peu à peu tant plus elle  
descéd en bas, tant plus dure elle devient.  
Et tous nerfz, qui sont molz, tesembleront  
ne differer point de la spinale medulle.

Aussi

Aussi elle ha deux membranes , comme le cerueau : toutesfois en la spinale medulle ces deux membranes sont coniointes ensemble , sans aucune distance : & non pas au cerueau, pource que la spinale medulle n'a point de pulsation, ne de mouuement, comme ha le cerueau : i'açoit que elle soit contenue de spondyles mobiles. D'auantage il y ha vne autre tunique nerueuse, & forte, qui enuironne ces deux membranes : de peur que la spinale medulle ne se rompe en diuers mouuements de la spine. Aussi il y ha quelque humeur visqueuse circonferée à l'enuiron de ceste tunique: tout ainsi comme à l'enuiron de la tunique liant les spondiles ensemble , aussi à l'enuiron de tous les articles, & à la langue, & à Larynx, & au conduit de l'urine: comme il y ha de la gresse aux yeux. Et pour le dire sommairement , en toutes parties, qui falloit mouuoir continuellement, il est requis, quil y ayt quelque humidité visqueuse, ou gresse. Car il y ha danger, que lesdites parties ne se desseichent, & ne sen  
*Gal. libr. 12. 13. & de usu 16. part. et 7.*

Ceste spinale medulle , en maniere dun fleue yssant du cerueau, cōme dune fontaine , enuoye tousiours quelque nerf en tous lieux, ou il passe : lequel nerf est, cō-

me vn petit ruisseau du sentiment, & du mouuement. La spinale medulle enuoye soixāte nerfz, cestasçauoir par pertuis d'une chacune vertebre vn nerf : lesquelz nerfz sont principalement constitués, & ordonnés pour les mouuements de toutes les parties situees au dessoubz de la teste: & secondement sont ordonnés pour le sens de l'attouchemēt : lequel est cōmun à toutes parties. Car les piedz, & les mains, & les extremités, & toutes les parties, qui sont au dessoubz de la face, reçoient nerfz : exceptés les intestins, & les visceres, & les instrumens de la voix, lesquelz reçoient nerfz du cerueau: comme nous auōs dit. Quant est de la production des nerfz, aux mains, & aux iambes, nous en traiterons en la table subsequente.

*Gal. libr. 13. de usu part.* Mais pource, que de chacune vertebre est produite vne coniugation de nerfz, il est manifeste, que le nōbre des nerfz doit estre egal au nombre des veines, & arteres. Donc ce, que on dit de l'origine, & production des nerfz, doit estre entendu des arteres, & veines. Derechef il conuient icy admirer nature, de ce, que elle ha esleu vn lieu bien seur, pour la naissance tant des vaisseaux, que des spondyles. Car elle ha vsé dun seul pertuis, pour donner passage aux trois instrumens. Cestasçauoir  
en

en deduisant le nerf du dedens au dehors, & lartere, & veine, du dehors au dedens: & ce des prochains vaisseaux. Quant aux petites vertebres, deux pertuis peuuēt suffire, pour dōner passage ausdits vaisseaux. Mais aux grandes vertebres il y ha dauantage dautre petis, & subtilz pertuis, en la partie superieure : cestasçauoir en chacune vertebre vn. Et par ces petis pertuis, les vaisseaux nutritifz sont implantés esdites vertebres.

*Des yeux.*

**L**Es yeux en Grec ophthalmi, en Latin *Gal. libr.*  
 Loculi, sont deux : ainsi que tous les *10. de usu*  
 autres instrumētis sensitifz. Et sont de sub- *part.*  
 stance molle, situés en la teste, en lieu hault & en la partie anterieure du corps : en laquelle aussi nous faisons nostre mouuement. Nature les ha munis pour asseurance, en diuerses manieres : cestasçauoir de paulpieres, & de poilz appellés cilia en Latin : & d'os, & aussi de cuyr. Et premieremēt elle ha cōstitué les poilz dits cilia, que les Grecz appellent blepharides, quasi comme vn rempart, pour propulser les petits corps: de peur quilz ne tombassent dedens les yeux, quand ilz sont ouuerts. Item nature ha constitué, & ordonné les paulpieres, que les Grecz appellēt blephara,

ra, & les Latins palpebræ : à celle fin, que elles fussent coniointes, & compliquees ensemble : & que elles formassent l'œil, si d'auenture quelque grande chose y tomboit. Et à lencōtre des choses encores plus grandes, nature ha constitué en hault les sourcilz, que les Grecz appellent ophrys, & les Latins supercilia. Et en bas nature y ha constitué les parties dites en Grec mala, en Latin poma. Et iouxte le plus grand angle, ou coing de l'œil, elle y ha situé le nés : & iouxte le moindre angle, elle y ha constitué la production de los iugal, dit en Grec zygoma. Et au mylieu de toutes ces parties dessusdites (lesquelles reçoivent les premiers rencōtre des plus grâs corps) l'œil est cōstitué : dont il nest point blessé. Aussi le mouuement du cuyr y ayde grandement à la difficulté de patir, ou souffrir : lequel cuyr retiré de toute part, comprime l'œil dedens, bien estroitement.

*Galien.* Il y ha sept muscles mouuans les yeux : cest à sçauoir,

- 1 Vn superior, qui les eleue en hault, vers les sourcilz.
- 1 L'autre inferior, qui les deprime en bas, vers les parties dites poma, ou mala,
- 2 Item deux lateraux, dont lun est au grand angle, dit magnus canthus en Grec, ou angulus, en Latin. Lequel muscle

sele ameine l'œil interieurement, vers le nés. L'autre est au petit angle, & ameine l'œil vers ledit angle.

2 Item deux autres, situés obliquement: c'est à sçauoir en chacune paupiere vn, vers le petit angle : estendus en hault, & en bas. Lesquelz tournent promptemēt, & mouuēt l'œil circulairement par tout.

1 Item vn autre grand, à la racine des yeux : lequel estraint, & munit le nerf optique : & esleue l'œil en hault: & aussi le conuertit, & tourne aucunement. Tous ces muscles assemblés ensemble, font par leurs aponéuroses, ou enneruations, vn cercle dun tendon large, finissant au lieu appellé Iris.

Les tunique des yeux lesquelles sont appelées en Grec *chiramaes*, sont en nombre quatre, ou (si tu veux) cinq. *Galibid.*

1 La premiere tunique est appelée en Grec *epipephycos*, en Latin *adnata*: pource quelle est adnascence par dehors sus les autres tunique, qui constituent l'œil: & quelle lie, & conioint tout l'œil, avec les os, qui sont à létour: ioint quelle couure les muscles mouuās les yeux. Pour ceste cause on l'appelle vulgairement *conianctiua*. Elle prend son origine du *pericrane*.

2 La seconde est appelée en Grec *cera-*  
toides,

toïdes, en Latin cornea : pource quelle est semblable à cornes fort extenuées, & incisées bien menu. Laquelle est produite de la grosse mēbrane du cerueau. Et premierement elle est subtile, & dense. Et puis en procedant peu à peu, principalement en son my lieu, vis à vis de la prunelle, dite pupilla, elle deuient encores plus subtile, & plus dense. Elle est resplendissante, blanche, & dure: à celle fin quelle soit la tresopportune defense, & propugnacle de l'humeur crystalline: & aussi quelle enuoye promptement les splendeurs.

- 3 La tierce est appelée rhagoïdes en Grec, en Latin vnea : pource quelle est semblable & de couleur, & de forme à vn grain de raisin noir. Ceste tunique est faite en plusieurs parties, noire, & fusque, & cerulee, ou verde : procedant de Iris, avec la tunique dite cornea: pour donner trois vtilités. Cest asçauoir pour nourrir icelle tunique cornea, située au pres d'elle. Item pour prohiber, que elle ne vinst à tomber sur l'humeur crystalline. Et finalement pour estre, comme vn spectacle medicamenteux, cest adire vn chose que on regarde : laquelle est comme médicament, à la veüe, qui est blesee. Ceste membrane ha son origine



la subtile mēbrane du cerueau: & pour-  
ce est nommee choroïdes: car en la ma-  
niere de la tunique secondine, dite en  
Grec chorion, qui contient lenfant en  
la matrice, elle lie plusieurs vaisseaux  
ensemble: à cause de nutrition, & con-  
nexion, ou colligance. Oultre plus ceste  
tunique est persee: iouxte la prunelle,  
dite en Grec core, en Latin pupilla. Et  
seulement la ou est le pertuis, il ny ha  
nulle autre tunique moyenne entre la  
tunique cornea, & lhumeur crystalline.  
Donc la tunique rhagoïdes est veneu-  
se, cest adire pleine de veines: à celle fin,  
quelle nourrisse abondamment la tuni-  
que cornea. Item elle est humide, &  
molle, cōme vne esponge, de peur, quel-  
le ne blesse lhumeur crystalline, par son  
attouchement. Item elle est noire: à celle  
fin, quelle recueille la splēdeur, & quel-  
le lēuoye à la prunelle, ou pupille. Item  
elle est persee: à celle fin, quelle mette  
dehors ladite splendeur.

4 La quatrieme, est la naturelle, & pro-  
pre tunique de lhumeur crystalline: la-  
quelle tunique non seulement est sem-  
blable à vne subtile escorce dun on-  
guon, mais dauantage est plus subtile,  
que les filletz daraignes, & plus blāche.  
Pourtant est appelee arachnoïdes en

Grec. Et qui plus est, elle ne couure pas toute l'humour crySTALLINE : mais sa partie, laquelle est portee par l'humour vitree, est du tout sans nourrissement, & sans tunique. Car il estoit meilleur, & plus expedient, que les humeurs fussent coniointes ensemble en icelle partie. Mais sa partie, laquelle est toute promimente dehors, & qui touche à rhagoades, est vestue de ceste tunique subtile, & claire, dite arachnoedes. Et aussi lydole, cest adire l'ymage, & semblance de la prunelle, consiste en ceste tunique, comme en vn myroir. Voyla quen dit Galien. Il semble toutesfois, que la tunique arachnoedes environne, & encloye toute l'humour crySTALLINE.

- ¶ La cinquieme est appellee en Grec amphiblastroedes, en Latin retiformis: pource quelle est semblable à vn fillez, dit en Grec amphiblastron, en Latin rete. Laquelle naist de la substance du nerf optique, dissolue, & amplifiee, & eslargie. Ceste tunique environne, & nourrist l'humour vitree. Ce corps retiforme est appelle selon aucuns proprement tunique : toutesfois nullement ce n'est tunique, ny en couleur, ny en substance. Mais si tu le separes à part, & le metz en vn monceau, il te semblera à veoir quelque

que part, & portion du cerueau. Sa premiere, & plus grande vtilité est, de sentir, quand l'humeur crySTALLINE est alteree: & danantage d'apporter nourrissement à l'humeur vitree. Aussi lon voit, quil est répli de veines, & arteres, beaucoup plus en nombre, & plus grandes, que selon sa grandeur, & magnitude. Car tous les nerfz, qui procedēt du cerueau, sont couuertz d'une portion de la membrane choroïdes, nec avec eux: laquelle apporte artere, & veine avec soy. Oultreplus de la tunique choroïdes, laquelle contient ce corps retiforme, aucunes subtiles productions, & semblables aux araignes, sont estendues en ce corps: Et leur seruent de ligaments, & aussi leur apportent nourrissement.

Il y ha trois humeurs contenues dedens *Galibid.* les tunique des yeux.

- 2 La premiere est appellee en Grec hydatoïdes, en Latin humor aqueus: à la similitude deau. Elle est semblable en substance, & couleur à vn aubin dœuf: & pource on l'appelle vulgairement albugineus. Et est cōtenue entre l'humeur crySTALLINE, & la tunique rhagoïdes; & cornea: non seulement pour remplir l'espace vuyde, mais aussi de peur, que l'humeur crySTALLINE, & la partie interne

de la tunique rhagoades, ne soit de-  
seichee.

- 2 La seconde, crystalloides en Grec, en  
Latin glacialis, pource quelle est sem-  
blable à crystal, & à glace, en couleur.  
Car elle est blanche, claire, resplendis-  
sante, mediocrement dure, non pas exa-  
ctement spherique, ou ronde. Et est si-  
tuee deuant l'humeur vitree, au mylieu  
des deux autres humeurs. Car elle est  
portee au mylieu de l'humeur vitree, cō-  
me vne sphere à demy incisee, ou vn de-  
my cercle, en leau:prohibant, que lhu-  
meur vitree ne se meuue plus oultre. Cest  
le premier, & le plus principal instrumēt  
de la veüe.

- Gal. ibid.* 3 La tierce est appelee en Grec hya-  
loides, en Latin vitreus humor: pource  
quelle est semblable & en substance, &  
en couleur, à vn voirre fondu. Elle est  
contenue en la concauité du corps reti-  
forme. Or l'humeur crystalline est nour-  
rie de ceste humeur vitree, par diadosis,  
cestadire transsumption. Et l'humeur vi-  
tree est nourrie du corps retiforme, qui  
lenuironne: & le corps retiforme, de  
la tunique choroïdes: comme deuant  
ha esté dit.

En loeil, au lieu, ou le blanc est conioint  
avec le noir, il y ha sept cercles coherents  
ensem-

ensemble, & gisâns lun sur lautre : toutes-fois ilz different lun dauec lautre. Ce lieu est appellé des sçauans Anatomistes, iris en Grec, ou stephane, en Latin corona, cestadire couronne. Tu verras plus à plein la description de ces cercles, au lieu allegué.

Quant est des paupieres, il ha esté rais- *Galibid.*  
sonnable, quelles fussent faites de substâ-  
ce totalement dure : laquelle facilement  
peust estre metie, & tournée, avec la tui-  
que cornea, sans aucune lésion dicelle. La  
paupiere inferieure est beaucoup moin-  
dre, que la superieure, & est du tout im-  
mobile: mais la superieure on la voit eu-  
demment mouuoir.

Pour ceste cause, il y ha deux petis mus- *Galibid.*  
cles mouuans la paupiere superieure.

1 Lun est au grād canthus, pres du nés:  
constitué oblique, lequel paruiet à la  
moytié de tarsus.

2 Lautre est tout oblique : lequel est  
estendu au petit canthus, & paruiet  
à lautre moytié de tarsus, qui est pro-  
chaine.

Or quād le premier muscle fait son actiō,  
il attire en bas la partie de la paupiere  
continue à soy : laquelle est pres du nés.  
Mais quand lautre muscle fait son actiōn,  
il attire lautre partie en hault. Et si tous

deux tendent, & font leur action en vn mesme temps, la partie de la paulpiere estât au petit cāthus, sera attiree en hault: & la partie, qui est au grand canthus, sera attiree en bas. Parquoy il aduient, que loeil nest pas plus ouuert, que cloz. Et cest la figure de la paulpiere, que Hyppocrates appelle campylos, cest adire courbe, & reflexe: laquelle il nombre entre les signes de maladie, signifiāns grand mal. Et en quelque lieu il appelle ceste euerfion de paulpiere, helwſis.

*Galibid.*

*Ch. 11. de  
usu part.*

La partie extreme de la paulpiere superieure, receuant les fins, ou extremités de ces deux muscles dessusditz, est appelée en Grec tarsos. Laquelle est de substance plus dure, que membrane, & comme cartilagineuse. Elle clost, & cōprend, & serre ce, qui est fait conuexe, ou gibbeux, de sa reduplication: & est ordonnee pour ceste vtilité. Or tarsus ha de petis, & subtilz pertuis: dou yssent les poilz des paulpieres, ausquelz tarsus donne lieu, & rectitude dextension: à cause de sa dureſſe. Car tout ainsi, quil estoit meilleur que les poilz des sourcilz fussent les vns sur les autres, aussi estoit il plus expedient, que ces poilz des paulpieres fussent tousiours gardés droitz, & tendus, & egaux en nombre, & magnitude. Car les poilz des sourcilz re-  
çoient

coient tout, ce qui descend du front , & de la teste : deuant quil tombe aux yeux. Mais les poilz des paulpieres engardent, que larene , & la pouldre ne tombe dedés les yeux:& aussi que les petites bestes, qui volent, ne facent mal aux yeux. Ces poilz tant des sourcilz, que des paulpieres, sont petis : & ne croissent point : pource quilz naissent des parties dures, & seiches.

En apres il fault enquerre ce, qui appar- *Gal. libr.*  
tient aux angles des yeux , que les Grecz. 9. & 10.  
appellent canthi. Il y ha vn trou depuis *de usu*  
le grand angle de chacun œil , iusques au *part.*  
nés : par lequel pertuis les excrements des  
yeux sont euacués. A ce mesme vsage , ou  
vtilité ce cōduit est persé, depuis canthus,  
iusques au nés. Aussi le nés est persé , ius-  
ques en la bouche: pour ceste mesme vtili-  
té. Car en nons mouchant, ce qui flue, sort  
par le nés: mais en crachant, lexcremēt yst  
par la bouche. Pour ceste cause plusieurs  
ont souuent craché les medicaments des  
yeux, tātost apres lonction : les autres les  
ont euacués , en soy mouchant. Par ces  
mesme pertuis vne part , & portion des  
nerfz de la tierce coniugation paruient à  
la tunique interne des yeux : Desquelz  
nous parlerons cy apres. *Gal. libr.*

Parquoy il y ha vn corps charnu , qui *10. de usu*  
gist sus le grand canthus : lequel corps est *part.*

illec situé , pour couvrir ledit pertuis : de peur que les excremens des yeux ne soient euacués par les angles : & que nous ne pleurions continuellement : aussi pour repoulsier lesditz excrements à leur propre conduit.

*Gal. ibid.* Mais ces choses ont esté diligemment prouuées par nature : & encores dauantage les petis, & subtilz trous , qui sont aux paupieres : lesquels sont vn peu au dehors du grand cāthus. Car ilz paruiennent, iusques au nés : en donnant , & en prenant quelque subtile humidité, lun à lautre. Or il y ha grande vtilité en donnant ce , qui abonde : & en prenant ce , qui default. A celle fin, que leur naturelle symmetrie , & commodation soit gardee : pour lagilité des mouuements. Car siccité exuperante, ou abondante engendre difficulté de flexion, & de mouuement : à cause de la dureté. Et laffluence dhumidité les rend infirmes, & molz. Mais la seule constitution moyenne , & moderee , est la plus expediente , & la meilleure à toutes actions naturelles.

Aussi pour la facilité des mouuements, il y ha deux glandules , en chacun œil : dont lune est es parties inferieures : & lautre, es parties superieures. Lesquelles espaissent, & enuoient humidité aux yeux, par quelq



quelques conduitz assez manifestes : tout ainsi que les glandules, qui sont adiointes à la racine de la langue, deriuent, & enuoient la salie en la bouche.

Or que nature ait fait aucune gresse à lentour des yeux, seulement pour faire le mouuement plus facile, la dureté le monstre.

Par le benefice, & vtilité dicelle gresse *Galibid.* (dautant quelle ne se fond pas facilement) les yeux en peuuent estre amoytis, & humectés perpetuellement: pource quelle est vntueuse.

#### *De Nés.*

**L**E Nés en Grec rhin, ourhis en Latin *Gal. libr.* *nasus*, est situé entre les deux yeux. *ii. de usu* Cest le propugnacle, & deffence de tout part. *Et* linstrument dolfaction, ou odoration : & *in intro-* par ordre est le premier instrument de re- *duct.* spirer. Les parties du Nés situées dun costé, & dautre, par lesquelles les animaux rendēt, & reçoient lair, sont appellees en Grec mysteres, ou myxoteres, en Latin nares: ce sont les narilles. Et les parties exterieures dicelles, sont appellees en Grec pterygia, en Latin pinnulæ, ou alæ. Lesquelles sont cartilagineuses: pource que telle substance nest pas facilement contusee, ne rompue. Aussi elles sont mobiles:

n s      pource

pource que leur mouuement est grandement vtile aux inspirations; & aussi aux efflations. Pour ceste cause il y ha de petis muscles implâtés aux dites parties: lesquels muscles naissent au dessoubz des parties appellees poma: iouxte les principes, ou cōmencemens des muscles descens aux Laues: lesquels coniointz avec iceux paruiennent au Nés obliquemēt, de plus en plus. Aucunes propagines, ou petis rameaux des nerfz, portés par la maschoire superieure, sont deriués à ces muscles.

*Gal. in introduc.* Lentredeux, qui separe par dedés les pertuis des narilles, est appellé en Latin septum cartilagineum.

Quant aux conduitz, qui paruiennent des anterieurs ventricules du cerueau, iusques aux narilles, nous en auōs desia parlé. Semblablement des pertuis du nés, qui sont communs au nés, & aux yeux: lesquels pertuis dune part, & dautre paruiennent iusques au grād canthus. Par ces pertuis il y ha vn nerf assez grād, dun costé, & dautre, de la tierce cōingation, qui paruient à la tunique, laquelle oinct les conduitz du nés. Et non seulement ledit nerf est dispersé en icelle tunique, ains procede iusques au palais. Mais ceste tunique, laquelle oinct les narilles par dedens, naist de la grosse membrane: & est com

commune, & continue à la tunique: laquelle couure interieurement la bouche, la langue, pharynx, larynx, la trachée artere, œsophagus, & tout le ventricule, ou estomach.

### *Des Oreilles.*

**L**es Oreilles, en Grec *وتا*, en Latin *Galen. in* *Laures*, sont situées aux extrémités des *introduc.* temples: desquelles la partie extérieure, est appelée en Latin *auricula*: laquelle est composée d'une partie supérieure, dite *pinn*: & d'une partie inférieure, dite *fibra*.

Les oreilles sont de substance cartilagineuse: comme sont toutes parties nues, *Gal. libr.* & *9. et 11. de* & *usu partu* *prominentes*, & exposées aux iniures, & incommodités externes: de peur quelles ne se puissent facilement contondre, ou rompre. Or elles sont *prominentes*: à celle fin, quelles couvrēt le cerueau, qui est prochain d'elles: de peur qu'il ne soit blessé. Aussi elles sont *gibbeuses*, ou *convexes* par dehors, & *caues* par dedens, de peur, que aucune chose n'entre dedens le conduit, & quelles ne fussent facilement blessées. Pour ceste mesme utilité, chacune oreille a eu plusieurs *flexuosités*, ou *anfractuosités*: dont leur pertuis est appelé *cæcum*, cestadire, qui ne passe point oultre: non pas *vrayement* qu'il soit tel, mais à cause

de lobliquité flexueuse du conduit:laquelle est cause, que vne petite chorde, ou vne foye de porc, ne peult passer tout oultre.

*Gal. li. 11.* Mais les oreilles des hommes, d'autant  
*Chap. 16. de* quelles sont petites, n'ont du tout point de  
*usu part.* mouuement, ou il est bien petit, & obscur.

Et pource il y ha quelque lineaments de muscles, à lentour de loreille. Item quatre nerfz durs, & bien petis viennent de la seconde coniugation de la spinale medulle du col, iusques en ce lieu: cest asçauoir,

1 Deux des parties posterieures.

2 Et deux des costés, distribués au cuyr, & en chacune oreille.

Mais es bestes, qui ont les oreilles fort mobiles, & grandes, tout ainfi, que loreille est enuironnee de plusieurs muscles, aussi il y ha de grans nerfz distribués en iceux. D'auantage chacune oreille ha vn nerf mol, de la cinquieme coniugation du cerueau: comme dessus nous auons dit.

Or apres auoir exposé lanatomie des trois parties, cest asçauoir du ventre inferieur, du thorax, & de la teste, reste à parler des extremités, que les Grecz appellét cōla, & les Latins artus.



FIN DE LA III. TABLE.



# TABLE QVA- TRIEME.



## De la Main.



A Main, en Latin manus, en *Gal. li. 1.*  
Grec cheir, cest l'instrument et 3. de u-  
pour prendre, & pour tou- su part.  
cher : donné à L'homme seul,  
pour toutes armes defen-  
soires. Le dy instrument conuenable à la-  
nimant sage : lequel instrument est neces-  
saire à tous artz, & autant idoyne en paix,  
que en guerre.

Quand on parle de la main sans addi- *Gal. li. 1.*  
tion, lon entend tout le membre, lequel et 1. de u-  
commence à l'article de humerus, & finit su part. et  
aux extremités des doigtz. Laquelle main 3. de Anat.  
ha trois parties: cest asçauoir, administ.

1 Brachium, qui est la partie située entre l'article de humerus, & de cubitus. *11<sup>e</sup> de os- sib<sup>9</sup> ca. 17.*

2 Vlra, ou cubitus, en Grec pechys, cest 18. et 19.  
tout le membre, qui est entre larticula-  
tion de carpus, & de cubitus. *Cornelius Celsus li. 8. cap. 1.*  
Celsus lappelle brachium. Item lun des os de

os de vlna, cestasçauoir le plus grand, est appellé plus spécialement pechys. Duquel os la postérieure, & plus grande tuberosité, dite coræne, sur quoy nous nous appuyons, Hippocrates lappelle ancon, cest cubitus en Latin: les Grecz Attiques lappellent olecranon. Et ainsi cubitus est prins en trois manieres.

- 3 Acrochæron en Grec, cestadire la main extreme, commence à larticle de carpus, & se finit à lextremité des doigts. Laquelle ha trois parties: cestasçauoir carpos, ou carpus en Grec, en Latin brachiale, & en Arabic rasceta. Cest la iointure, ou articulation, par laquelle la main extreme est coniointe avec cubitus. La seconde partie de acrochæron, ou de la main extreme, est nommee metacarpion, en Latin postorachiale, & vulgairement pecten. Cest icelle partie, qui est situce entre carpus, & les doigts: de laquelle la partie caue, & interne, est dite vola, ou palma, en Latin: & en Grec thenar. Et la partie opposite hypothénar: laquelle nha point de nom Latin. La tierce partie ce sont les doigts, en Grec dactyli, en Latin digiti. Et sont cinq, inegaux: pource quil estoit meilleur, que la sommité diceux vinst à quelque equalité, quand ilz empongnet  
quelq

quelques grâdes choses circulairement,  
 & quand on veult contenir quelque  
 corps humide, ou petit, en iceux doigts.  
 Dont le premier est le poulce, en Latin  
 pollex, en Grec antichor: pource que il  
 est opposite, & equipollent, ou equiva-  
 lent aux autres quatre doigts: comme  
 qui diroit en Latin pro manus, cestadire,  
 qui est pour toute la main. Hippocrates  
 le nomme mega, cestadire grand, com-  
 bien que il soit petit: pource que sans  
 luy les autres sont quasi inutiles: com-  
 me dit Aristote. Toutesfois selon Ga-  
 lien il est appellé grand, non seulement  
 pour sa vertu, mais aussi pour sa magni-  
 tude, & quantité. Car le commence-  
 ment du poulce (comme dit Galien) est  
 aupres de radius: tellement que quasi  
 il le touche. Neantmoins selon Corne-  
 lius Celsus, & Aristote, il est appellé  
 grand, seulement pour sa vertu. Le se-  
 cond doigt est appellé en Grec licha-  
 nos, en Latin index. Le tiers en Grec  
 mesos, en Latin medius, cestadire mo-  
 yen. Ces deux doigts ainsi que ilz sont  
 secondz en ordre, apres le grand doigt,  
 aussi sont ilz en vtilité. Le quart en  
 Grec paramesos, en Latin annularis, ou  
 medicus, est de moindre vtilité. Le  
 cinquieme en Grec micros, en Latin  
 minim

*Aristote*  
*les libr. 4.*  
*de parti-*  
*bis ani-*  
*mal. c. 10.*

minimus, ou auricularis , est le moindre de tous, de corps, & de vtilité.

Les ongles en Grec onyches, en Latin ungues , sont engendrees de l'excrement des tendons, qui finissent aux racines des ongles. Pourtant les ongles croissent continuellement, iacoit que tout le corps ne croisse plus: mesmement apres que l'homme est mort. Mais alors ilz croissent, non pas comme les autres parties, en long, large , & profond: mais en la maniere des poilz, en long seulement. Et tousiours renaissent autres ongles nouvelles, qui repoulsent les vieilles. Or les ongles sont mediocrement dures , egales aux sommities des doigts, rōdes de toute part. Et sont faites telles, pour l'apprehension, & collection des corps peris, & durs: comme tesmoigne Galien contre Aristote , qui dit, que Nature ne ha fait les ongles, sinon pour couuerture.

*Gale. lib.*  
*1. de usu*  
*part.*  
*Aristote*  
*les ca. 10.*  
*lib. 4. de*  
*par. ani.*

*De la composition du Muscle.*

*Gale. lib.*  
*1. de motu*  
*muscul. et*  
*12. de usu*  
*part.*

**L**E Muscle, en Grec mys, en Latin musculus, ha esté ainsi nommé , possible à la similitude dun rat. Le muscle est orga ne du mouuement volontaire: lequel est composé des fibres , ou filamēts des nerfz, & ligaments, de chair simple , naissante à lentour de icelles fibres , & de veine , artere, &



re, & tunique.

Le muscle ha trois parties: cest asçavoir, *Galibid.*

1 Le principe, ou commencement, qu'on appelle le chef, ou teste, en Latin caput musculi: qui est nerueux.

2 Le mylieu est charnu, que on appelle le ventre.

3 Et la fin, qui est beaucoup plus nerueuse, que le commencement: de laquelle fin naist le tendon.

Pour certain le nerf, & le ligament, sont *Galibid.* implantés au chef du muscle: en apres sont *lib. 1.*

disseminés, & dispersés par tout le muscle. *lib. 1. de* Et finablement des deux assemblés, & co- *usu part.*

alescés à la fin du muscle, est faite la generation des tendons, que les Grecz appellét tenondes, & les Latins tendones, ou tédines, & selon les nouveaux medecins Grecz aponeuroses, cest adire quasi enervations des muscles: pource que les muscles sont veuz finir en iceux tendons. Donc leur nature est meslee, & moyenne entre le ligament, & le nerf. Car le tendon est plus dur que le nerf, dautant quil est plus mol, que le ligamét. Et nest pas insensible, dautant quil participe du nerf. Aussi il nest pas si sensible, que le nerf: car il nest pas nerf seulement. Dautant donc, quil participe de la nature du ligament, dautant est hebetee lacrimonie, ou acuité de son sentiment. Et

ainsi quant à la magnitude de son corps, & quant à son sentiment, il est tel, comme celuy, qui est fait de tous deux. Or il est manifeste, que le tendon est beaucoup plus grand, que le nerf, qui descend au muscle: pource que il n'est pas seulement fait du nerf, mais aussi il ha prins beaucoup de la nature du ligament. Car il lie le muscle avec les os subietz ausquelz il est implanté: & en ce il ne differe en rien du ligament. Mais il est sensible, & mobile: à raison, quil est participant du nerf. Or il est fait plus grand, que le nerf: pource que il doit mouuoir l'os. Car tout tendon est implanté en l'os: toutesfois tout muscle ne se finist pas en tendon.

*Gal. 1. de motu musculorum.* Le ligament, en Grec syndesmos, en Latin ligamentum, est vn corps nerueux, insensible, ayant sa naissance de l'os, implanté en l'os, ou au muscle. Car par les ligamēts les muscles sont liés, & coalescés aux os. Dont ilz ont prins leur nom (à cause de l'utilité quilz ont) dun verbe Grec dew, en Latin ligo, cestadire lier.

*Gal. li. 1. de motu muscul.* Les nerfz (desquelz nous auons parlé en la table precedente) en maniere de ruisseaux, deduisent, & apportent aux muscles, la vertu motiue, & sensitiue, du cerueau, comme dune fontaine.

Or chacun de ces deux, cestasçauoir le  
nerf

nerf, & le ligament, est diuisé en vitz, ou fibres, cestadire filaments subtilz, que les Grecz appellent inæ. Lesquelz filaments sont liés ensemble, pour la constitution, & composition du muscle: lequel il falloit estre meslé des deux. De ces mesmes filaments, qui conuiennent, & sont meslés ensemble, le tendon est composé: & de tous ensemble, le muscle.

Il y ha trois manieres de fibres, comme nous auons dit en la premiere table: cest asçauoir,

1 Droites, par le mouuement desquelles est faite attraction, de la chose conuenable.

2 Obliques, par le mouuement desquelles est faite retétion, de la chose cōuenable.

3 Transuersales, par le mouuement desquelles est faite expulsion, de la chose estrange.

Mais les muscles nont, que vn genre de fibres seulement: car ou ilz ont seulement fibres droites, selon leur longitude: ou transuersales, selon leur latitude: ou obliques, selon leur obliquité. Toutesfois il ny en ha nul, qui les ayt toutes ensemble.

Il y ha vne chair simple, de subitâce molle, meslée avec ces fibres: laquelle deuoit estre ferme, en maniere de siege, dit, stœbe replissant les espaces moyens entre icelles

fibres, de peur quelles ne soyent contuses, ou rompues. Pour ceste cause nature n'a pas delaisé ledit siege (dit stœbe) vuyde: mais pour propulser le chaud, & le froid. Aussi pour servir de couuerture semblable à feultres, nature ha enuironné les fibres de ce dit siege: lequel sert de coulre, & de couuerture admirable, aux veines, & arteres.

Quant à l'utilité de la veine, artere, & tunique, elle est assez manifeste, des propos dessusditz. Quât est de la production des vaisseaux, en toutes les extremités, nous en parlerons cy apres, quand nous aurons parfait le traicté des muscles.

*Des differences des mouuements des parties de toute la Main.*

*Gale.lib.  
1. de usu  
part.*

**L**Es doigts (comme l'on peut voir par l'euidente experience) ont quatre mouuements.

1. Deux droitz, cest a sçauoir flexion, & extension.

2. Et deux obliques, aux costés.

Parquoy il y ha aussi quatre tendons, qui sont guides, & conducteurs de ces quatre mouuements: lesquels sont appliqués en quatre manieres, en chacû article. Or d'autant quil y ha aux doigts des deux mains trente articles (dont chacun ha en quatre lieux

lieux implantations, & applications de tendons, excepté le premier article du poulce, lequel nen ha que trois, cestasçauoir deux laterales, pour les mouuements lateraux, & vne extrinsequement pour la extension. Car intrinsequement il nen ha point pour la flexion) lon trouue cent, & dixhuiët implantations de tendons aux doigts des deux mains.

Carpus, en Latin brachiale, ha aussi quatre mouuements: cestasçauoir, *Gale.lib.*  
*1. de usu*

1 Flexion.

*par. et ca.*

2 Extension.

*17. lib. de*

3 Circonduction en figure prone, cest adire vers la terre. *osibus.*

4 Et en figure supine, cest adire vers le Ciel.

Car carpus ha deux articulations.

1 Lune est grande, cestasçauoir larticulation des fins, & extremités de carpus, qui entrent dedens la cauité moyenne entre lepiphyse de radius, & de ulna. Par laq̃lle, larticle de carpus, & la main extreme est estendue, & fleschie.

2 Autre articulation est petite, cestasçauoir du huiëtieme os de carpus: lequel os enuironne la petite apophyse de ulna, appelée styloides: par laquelle articulation carpus est mené en figure prone, & supine.

*Gal.lib.*  
*1. de usu*  
*part.*

Aussi toute vlna ha quatre mouuements, correspōdens en proportion aux mouuemens de carpus. Car larticulation de los de vlna, laquelle est au mylieu du bras, en la poulie, dite trochlea, fait lextension, & la flexion de toute vlna, & par elle de la main extreme. Mais larticulation de radius, en la teste exterieure de brachium, fait la circonduction aux costés.

Brachium aussi ha quatre mouuemens: cestasçauoir,

2 Deux droits.

2 Et deux obliques aux costés, ou lateraux.

Ces quatre mouuemens sont faits par les muscles du thorax: desquelz nous auons parlé en la seconde table.

Maintenant il fault traiter, par quelz muscles sont faits les mouuemens dessus-dits.

### *Des muscles de la main.*

*Gal.lib.*  
*1. de usu*  
*part. et 1.*  
*de Anat.*  
*administ.*

**L**Es muscles de toute la main sont treize, & trois.

16 Seize en cubitus, ou vlna: cestasçauoir sept interieurs, & neuf exterieurs.

7 Sept en la main extreme.

6 Six entre les os de metacarpium, ou postbrachiale.

4 Et quatre au bras.

Or

Or il fault noter, que les muscles, qui ont la moindre action, sont en la superficie: & les plus insignes, cestadire, qui ont la plus grande action, sont cachés plus profond.

*Des muscles interieurs de cubitus,  
cestadire ulna.*

**L**Es muscles interieurs de cubitus, pour *Gal. li. i.*  
conuenable vtilité, sont sept, *En 2. de*  
1 Le premier, qui est le moindre, & le *usu part.*  
plus menu, ou subtil de tous les muscles  
internes de vlna, ha esté incongneu aux  
anciens Anatomistes: & inuété par Ga-  
lien. Il appert en la superficie, deffoubs  
le cuyr: & occupe la region interne, en-  
tre vlna, & radius. Or il est le moindre  
de tous les autres: pource quil ne meult  
nulle articulation, & que nul mouue-  
ment des doigts ne luy est commis. Mais  
vn peu deuant larticulation de carpus,  
vn tendon est nay, ou explanté de luy:  
lequel tendon commence premierement  
à se dilater en icelle articulation de car-  
pus. En apres ce tendon est estendu des-  
foubz tout le cuyr de la main extreme  
interieure, & des doigts. Et appert, com-  
me vn second cuyr: blanc, & exangue,  
donnât ceste vtilité, cestasçauoir de fai-  
re, que ce cuyr interieur soit moins ver-  
satile,

fatile, cestadire moins muable, en latouchement des corps: & quil soit glabre, & sans poil: & plus sensible, que tout le reste du cuyr: pour auoir certaine congnoissance des qualités tactiles, cestadire que on peut toucher. A cause dequoy aussi aucuns grans nerfz sont produitz de la spinale medulle du col, en toute la main. Car il ha fallu, que la main fust organe, ou instrument pour prendre, & aussi pour toucher.

- 2 Item deux autres, les plus grans de tous, fleschissans les doigts, occupent exactement la moyenne region de vlna interieure. Dont le mineur, gisant sur le maieur, est situé au mylieu de cubitus, ou vlna: lequel procede tout droit en carpus. Ou il est diuisé en quatre tendons, lesquelz sont implantés au second article des quatre doigts: pour le fleschir seul. Lesquelz tendons, vn peu deuant, quilz soient paruenus au second article, illec derechef sont diuisés chacun en deux parties. Et chacune dicelles deux parties amplifiee enuiron les tendons situés dessoubz, lesquelz fleschissent le premier, & le tiers article, sont enueloppés: & dillec donnent passage à la tierce articulation des doigts. Mais le muscle maieur, & le plus profond, situé



situé au dessoubz du precedent , est caché entre vlna, & radius : lequel est porté semblablement en carpus. Et est diuise en cinq tendõs : dont quatre sont implâtés au premier, & au tiers article des quatre doigts. Toutesfois ilz ne sont pas coniointz avec le premier article, sinon par vn ligamét membraneux. Mais le cinquieme tendon , qui est porté par le mylieu de vola, ou palma, cõme dun cercle, est implanté au secõd, & au tiers article du poulce: ains il est implanté au second , par vn ligament membraneux tant seullement. Mais dautant, que la flexion du poulce est bien forte , & que le poulce est equipollent aux autres quatre doigts, il semble, que le gros muscle gisant en la palme (dite en Grec thenar) ayde à ladite flexion : duquel nous parlerons es muscles de la main extreme. Mais il ny ha nul muscle appliqué au premier article du poulce , en la partie interne : car en la flexion du poulce dessus les autres doigts, qui sont fleschis, le premier article du poulce est totalemēt oyseux : comme celuy, qui ne pourroit ayder à aucune action, sil estoit fleschi.

Item deux secõds en magnitude, cest-à-dire moindres, sont situés pres des deux autres, aux costés : fleschissans tout le

o s carpus.

carpus. C'est aſſçauoir lun, qui eſt implan-  
té à vne longue apophyſe cartilagineu-  
ſe, du premier os de carpus, iouſte le  
pouce : par vn tendon diuiſé en deux.  
Toutesſoïs ce tendon neſt pas tout con-  
ioint, à ceſte ſimphyſe ſeule, ains il eſt  
amené, & produit iuſques à metacarpiũ.  
Et illec eſt appliqué au commencement  
des os ſitués au deuãt du doigt moyé, &  
de index. L'autre eſt pres du petit doigt:  
lequel eſt implanté par vn ſimple ten-  
don, au huiſtieme os de carpus : lequel  
os eſt cartilagineux. Ces deux muſcles  
ſont implantés aux os cartilagineux de  
carpus, par tédons obliques. Pource que  
auec les muſcles exterieurs eſtédans car-  
pus, ilz mouuent circulairement la main  
extreme, en figure prone, & ſupine. Et  
ces tendons ſont aucunement plus obli-  
ques, que les exterieurs.

- 2 Item deux obliques, & tous charneux:  
leſquelz tournent premierement radius,  
& conſequenment enſemble toute la  
main extreme, & auſſi vlna, en figure  
prone. Ces deux muſcles ſont explantés  
de cubitus, & nont point de tendons:  
mais par vne ſubſtance charneuse ilz  
ſont implantés en los de radius, par plu-  
ſieurs implantations. Car il ha eſté im-  
poſſible, que ces deux muſcles commen-  
çans

çans en vlna , fussent mués en tenuité nerveuse (cestadire en tédon) pour estre implantés en radius:veu que ces os,cest-à-sçauoir vlna, & radius, sont si pres lun de lautre.

*Des muscles exterieurs de vlna,  
ou cubitus.*

**L**Es muscles exterieures de cubitus, sont neuf: comme il sensuit.

1 Le premier, & le plus grand, est situé en la superficie, soubz le cuyr: lequel muscle obtient la moyenne region de tout cubitus. Et se diuise au carpus, en distribuant quatre tendons aux trois articles des quatre doigts, pour les estendre luy seul, & non autre. Toutesfois au premier, & au second article iceux tendons sont seulement coniointz par vn ligament membraneux.

2 Item deux petis, obliques, sont adiacens audit premier muscle, deça, & de-la: lesquelz font abduction des quatre doigts, cestadire, qui les eslongnēt loing du poulce, vers le petit doigt. Dont le superieur fait abduction de index, & de medius, les eslongnant loing du poulce, par deux tendons, quil enuoye aux trois articles de ces deux doigts: tant à dextre, que à senestre, extrinsequement.

Laquelle

Laquelle chose se doit entendre, quand la main est prone. Or ces tédons ne sont pas implantés du tout lateralemét : ains plus en hault, iouxte les tédons, qui font l'extésion, le muscle inferieur fait abduction du petit doigt, & de annularis.

2 Item il y ha deux autres muscles du poulce, lateraux, & obliques, lesquelz gisent dessus ledit muscle. Quand ces deux muscles sont tendus, ilz estendent le poulce. Mais si lun de eux seulement est tendu, il attire à costé lautre partie du poulce : cestasçauoir celle, qui luy est prochaine. Lun de ces deux muscles est implanté exterieuremét, par son tendon, aux trois articles du poulce : mais au premier, & au second article, seulement par vn ligament membraneux. Et ameine le poulce seul vers index : par mouuement oblique. A laquelle action ayde vn petit muscle, large toutesfois, situé en la partie interne de la main : pour ceste cause. Duquel nous parlerôs es muscles de la main extreme.

2 Autre muscle est coherét, & conioint avec le premier, transcédant, ou passant le nœud de radius : lequel est diuisé en deux tendons. Dont lun est implanté à la racine du poulce : lequel appert estre diuisé en deux, & aucunesfois en trois : & estend

& estend moderement carpus. L'autre tendon est enuoyé, ou implanté extrinsequement en tous les articles du poulce: toutesfois il est conioint au premier, & secôd, par vn ligament membraneux seulemēt. Lequel tendon fait abduction du poulce, loing des autres doigts. A laquelle action ayde aussi le grand muscle de la palme. Duquel tantost apres nous parlerons.

2 Item deux, qui estendent carpus, cest-à-sçauoir vn de chacun costé: tout ainsi, que de la partie interieure, il y en ha deux, qui fleschissent: lun pres du poulce, gisant sus radius: lequel muscle parvient par vn tendon double, iusques à icelle partie de metacarpium, laquelle est denant index, & medius. L'autre est implanté iouxte le petit doigt, par vn simple tendon. Ces deux muscles sont implantés en carpus, par tendons obliques: lesquelz ont esté faits obliques, tant externes, que internes fleschissans (qui sont aucunemēt plus obliques, que les externes) à celle fin, que non seulement ilz estendent, & fleschissent, mais aussi à fin, quilz tournent la main extreme, avec carpus, en figure prone, & supine.

2 Item deux obliques: lesquelz conuertissent

tissent tout radius, & ensemble toute la main extreme, aussi vlna, en figure supine. Dôt lun est tout charneux, sans tendon : comme les deux dessusdits internes, qui mouuent radius en figure prone. Lequel est implâté en los de radius, par ses parties charneuses. Lautre est le plus long de tous les muscles de vlna : lequel gist sus radius, en hault. Duquel seul est explanté vn tendon, de ces quatre muscles mouuans radius, bien brief, & court, & membraneux iouxte sa fin. Lequel est explanté des parties internes de radius, iouxte carpus.

*Des muscles de la main extreme.*

*Galibid.*

**L**Es muscles de la main extreme, sont sept : cestasçauoir,  
 2 Deux au poulce : dont lun est grand, & gros, gisant sus la palme : lequel fait abduction du poulce, loing des autres doigts : par vn seul tendon, avec vn autre tendon plus fort explanté du cinquieme muscle exterior de vlna, & implanté au poulce : duquel nous auons deuant fait mention. Ce muscle cy (comme nous auons dit) ayde aussi à la flexion du poulce. Oultreplus avec le septieme de ces muscles, lequel est peculiar,

lier, & propre au petit doigt, il engédre la palme de la main, dite en Grec thenar, en Latin palma, ou vola. Car ces deux muscles, qui sont les plus grans de tous les muscles de la main extreme, sont adioustés, comme accessseurs, & augmentateurs : par lesquelz la partie charneuse de la main extreme est faite haulte, & la moyenne caue, ou creuse : pour contenir les liqueurs. L'autre est moyen entre le poulce, & index, en la partie interne. Lequel semble estre double : aussi est il fait pour deux vtilités, cestasçauoir tant à celle fin, que icelle partie de la main extreme fust charnue, pour faire plus grande cauité : que aussi pour adduire, & approcher par son tendon, le poulce vers index. Auquel mouuémēt ay de aussi vn autre tendon, produit du quart muscle exterior de vlna : duquel parauant nous auons parlé. Car nature sachant, que le poulce auoit besoin de fors mouuémēs vers les costés, pour l'approcher, ou pour le slongner de index, elle nha pas commis telz mouuēmens à ces deux muscles seulemēt, mais dauantage ha amené de plus fors tendons des muscles externes de vlna : lesquelz elle ha implantés au poulce, en la partie externe.

4 Il y en ha autre quatre petis en la palme, propres aux autres quatre doigts: lesquelz ont chacun vn tendon court, implanté aux parties laterales dun chacun doigt, vers le poulce. Et sont en tous les trois articles des quatre doigts. Lesquelz adduisent, ou amainent lesdits quatre doigts vers le poulce. Lequel mouuemēt dautant quil nha pas grand force, & vehemence, aussi nauoit il pas besoing de grans muscles, ne explantés de loing, ne dautre part: ains ha esté commis seulemēt aux muscles, qui sont en la main extreme.

1 Le septieme est en la partie interieure, iouxte la palme, ou thenar, lequel adhere au petit doigt: ayant deux vtilités: car, comme dit est, luy, & le gros muscle du poulce, font la palme. Item par son tendon il abduit, & esslongne le petit doigt, loing des autres. Lequel mouuement n'est pas seulement commis à ce muscle, ains aussi est aydé du troisieme muscle exterieur de vlna. Duquel nous auons dessus fait mention. Car les abductions sont plus fortes, que les adductions. Galien estime ce muscle n'estre que vn, comme celuy, qui est entre le poulce, & Index: toutesfois chacun de eux appert estre double. Mais il ny ha pas



pas grand different, si tu le fais simple, ou double. Pource que la chose n'est pas encores bien accordée entre les anatomistes, touchant la circonscription du muscle.

*Des muscles, qui sont entre les os  
de Metacarpium.*

O Vltre ces sept muscles, il y en ha six autres petis, qui sont dessoubz la palme, entre les os de metacarpium. Côme au pied, entre les os de pedium: desquelz nous parlerons en tēps, & en lieu. Les anciens anatomistes ont du tout ignoré ces six muscles. Aussi ha fait Galien par long espace de temps: mais finablement il les ha trouués, côme il confesse au premier liure des administrations anatomiques. De ces muscles, côme il dit au lieu allegué, il y en ha deux, qui paruiennent intrinsequemēt au premier article de chacun doigt: & touchēt desia aux muscles obliques. Parquoy ilz font vne flexion, laquelle n'est pas totalement roide, ne indeclinable, mais inclinant vn peu de costé: à celle fin, que vn chacun deulx, sil est tendu, fleschissent le premier article, en inclinant vn peu lateralement. Toutesfois silz sont tous deux tendons, ilz font tout vne flexion droite, sans decliner ne çà, ne là.

*Gal libr.  
1. de ana.  
administ.*

*Des muscles du bras.*

**L**Es muscles du bras sont quatre obliques, qui se transuersent lun sus lautre, à la similitude de ceste lettre Grecque X. Lesquelz font de deux mouuemens obliques, vn droit, cestasçauoir,

- 2 Deux interieurs, qui font la flexion de vlna: dont le moindre ha explantation des parties externes du bras iouxte humerus. Et peu à peu dillec est cōuert dedens: & se implâte à loz de vlna. Lautre, qui est plus grand, ha son explantation, ou origine des parties interieures, du lieu, lequel incline vers lespaule, ou humerus, pres de laisselle. Et dillec est porté aux parties anterieures du bras: & se implâte en loz de radius. La situation de ces deux muscles est manifeste, cestasçauoir semblable à ceste lettre Grecque X: aussi lobliquité du mouuement est manifeste, quand chacun deux fait son action à part. Car quand le plus grand muscle fait son action tout seul, la main extreme touche les regions internes de larticle de humerus, iouxte laisselle. Et quand le moindre muscle fait son action tout seul, la main extreme touche les regions externes, opposites à icelles. Mais quand tous deux ensemble font leurs actions, alors se fait la

la flexion de vlna, ou cubitus.

2 Item deux extérieurs, qui estendent vlna: car tous deux sont implantés en vlna. Dont lun ha ses explâtations plus aux internes regions du bras: & se implâte aux internes regions de vlna, pour la plus grand partie. Lautre ha ses explantations aux parties posterieures, & externes du bras: & se implante aux externes regions de vlna.

Or puisque ainsi est, que en vlna y ha sept muscles intérieurs, & neuf extérieurs: & en la main extreme, avec ceux, qui sont entre les os de metacarpium, treize: & puis quatre au bras, il sensuit, que le nombre de tous les muscles de toute la main, ou de la grande main, paruient à trentre trois muscles.

*De la production des ueines superficielles en toute la main.*

**D**Eux veines sont propagées, cestadi- *Gal. libr.*  
re ramifiées, ou distribuées en toute *3. de ana.*  
la main. *administ.*

1. Lune plus grande, sort de la veine ca- *et com-*  
ue, deuant quelle soit diuisee en veines *ment, lib.*  
jugulaires: laquelle fait son cours par *2. de rat.*  
laisselle: dont elle est appelée axillaris. *uictus in*  
Elle apparroist intérieure en vlna, dont *morbis*  
elle est nommée vena interna cubiti. *acut.*

Guydon l'appelle *basilica*, & *iecoraria*, ou *vena hepatis*.

2. L'autre monte hors du thorax, d'une part, & d'autre, depuis les veines Iugulaires exterieures, desia diuariquees, cest adire diuisees: avec lesquelles elle ha sa racine commune. Et fait son cours par humerus descendant en l'externe region du bras. Dont elle est nommee *humera-ria*, & *externa*. Guydon l'appelle *Ce-phalica*, ou *vena capitis*. De laquelle comme superieure, nous traiteròs premierement.

*Gal. libr. 3. de ana. administ.* Ceste veine dite *Humeraria*, est manifeste à tous mesmement deuant sa diuision, laquelle est situee en toute la superficie, entre le cuyr, & les muscles subierz. Apres quelle est venue pres de l'article de cubitus, adòc elle monte dessus le muscle long de Radius. Et là se diuise en trois rameaux: lesquels aucunesfois sont totalement egaux, & aucunesfois inegaux, & plus grands les vns, que les autres.

1. Dont lun se cache dedés, au profond.
2. L'autre procede iusques à la flexuosité de l'article.

*Gal. libr. de dissect. arteria-rum.* 3. Le troisieme rameau decline peu à peu en l'externe regiõ de Cubitus. Et illec se distribue en rameaux innumerables. Ceste veine humerale, & aussi tous les rameaux

meaux propagés d'elle, sont sans artere: excepté vn seul, lequel ha son origine en l'article de Cubitus: & s'en va profondement aux parties interieures.

La veine faisant son cours par laisselle, *Gal. libr. 1. de anat. humerale*, se diuise en deux rameaux: vn *administ.* peu deuant la commissure de l'article.

1 Le premier rameau descend obliquement à loz de Cubitus, ou vlna: pour faire son cours, par l'espace, lequel est entre le tubercule interieur du bras, & le sinus, ou cauité de vlna.

2 L'autre ayant son origine de la mesme region, comme le premier, descend aucunement plus enleué. Et incōtinent se diuise en deux parties, dont la plus basse tend peu à peu obliquement. Et apres quelle ha procedé vn peu plus loing, aucunes fois elle paruiet à la veine, laquelle est estendue en Cubitus. Mais souuentefois deuant, que la toucher, elle se diuise en plusieurs rameaux.

Le premier rameau dessusdit est superfi- *Gal. ibid.* ciel: faisant son cours obliquement. Et incōtinent se conioint avec celle, qui procede de l'humerale. Et s'appelle vena communis, ou media. Guydon l'appelle Mediana, & corporalis. Aucuns l'appellent Nigra.

*Galibid.* Or tu verras la veine Axillaire, illec ou elle est cōiointe à la partie de l'humérale. Laquelle tu poursuivras iusques au lieu, ou te deduira vn vaisseau composé des deux. Car tu la verras sortant en la summité de Radius plus bas, que n'est sa longitude moyenne. En apres elle sestend par l'extreme region de loz de Radius, avec deux rameaux, quasi egaux: tellemēt, que ces deux vaisseaux representent la tierce lettre des Grecz  $\gamma$ .

1 Car lun de ces deux vaisseaux fait son cours apres la scissure, droitemēt vers le poulce: & est porté dessus Radius. Et apres auoir touché à carpus, il estéd vn autre ordre de rameaux, en la posterieure region du poulce: & vn autre en la partie, qui est entre le poulce, & index. Item vu autre en tout index, par derriere, & par les costés. Et en ceste partie, l'extremité de la petite veine est vnée. Laquelle est diuariquee, & ramifiée de la veine conforme à elle.

2 L'autre vaisseau tend vers le petit doigt, par ceste extremité de cubitus, ou ulna, par ou il est implanté en la main. Et quand il passe par loblique tubercule de ulna, il enuoye vn petit rameau au derriere du doigt moyen. Incontinent apres il est diuisé en deux parties: dont lune

lune procede entre le doigt moyen , & annularis : laquelle veine aucuns phlebotomēt en la main fenestre, & en laissent fluer le sang, insques à ce , quil s'arreste de soy mesmes. Lesquelz asserment que la ratelle est aydee par telle euacuation. Pourquoy aucuns l'ont appellee splenitica. Guydon l'appelle saluatella: mais maintenant les modernes appellent celle de la main fenestre splenitica : & celle de la main dextre saluatella.

Après, que ceste veine de laquelle sera di- *Galibid.*  
uisée en rameaux, deuant l'articulation de cubitus, ou vlna , celle qui paruiet en la flexuosité , ou curuature, contient l'artere subiette , pour quelque espace. Laquelle nous auons obseruee, & trouuee es natures maigres, & de grans pouls, par l'attouchemēt: qui nous demōstroie aucunement le mouuement dicelle. Parquoy si tu fais phlebotomie en ceux , qui ont toute ceste veine manifestemēt apparente, il la fault faire bien loing de l'artere. Mais en ceux, qui ont seulement la veine manifeste gisant dessus l'artere, & tout le reste occulte, & caché, il y fault penser diligemmēt. Premièrement quand tu estrains le bras , que la prochaine region ne s'eleue en notable, & grande tumeur. Secondement, que

tu nen incis es vne autre : car iamais tu ne inciseras ceste veine au lieu , qui est enbê: sachant que lartere subiacente est large, & forte. En apres quand elle sera fort enflée, tu esleueras , & environneras la veine gisant dessus, avec ladite artere. Dont il aduient , que la veine enleuee en la partie gibbeuse de lartere, soit plus euacuee, que enleuee: tellemēt que le rasoir faisant mediocre incision , la penetre toute subitement : & ensemble naure lartere subiette. Parquoy ie conseille la laisser, & prendre quelque autre veine prochaine: principalement dicelles, qui viennent en loz de cubitus, ou vlna.

*Galibid.* Mais es maladies, qui sont au dessoubz des clauicules, sil fault phlebotomer, il y ha plusieurs veines à ce commodés.

- 1 Premierement la veine, laquelle vient iouxte la flexuosité, ou curuature de vlna, ha le premier, & principal lieu du remede.
- 2 Secondement la veine, laquelle descend en vlna.
- 3 Tiercement la veine commune.
- 4 Quartement la veine, laquelle vient de humeraria, à la flexuosité de vlna.
- 5 Et finablement humeraria.

Mais es maladies, qui sont dessus les clauicules, cest au contraire, Car



- 1 Premièrement on phlebotome de la veine dite humeraria.
- 2 Secondemēt de celle, qui vient de humeraria, en la flexuosité de cubitus.
- 3 Tiercement de la commune.
- 4 Quartement de celle, qui procede iouxte les arteres.
- 5 Et finablement de celle, qui va en cubitus, ou vlna.

Et ainsi il ne reste rien à dire des veines superficielles de tout le bras, iusques aux doigts: principalement de celles, qui sont en vſage. Quant est des profondes, ly Galien au lieu allegué. Maintenant il fault parler des arteres, qui sont situees desſous les veines.

*De la production des arteres  
en toute la main.*

**I**L ny ha que vne artere, qui procede en toute la main: laquelle artere est prochaine à la veine, qui passe par laisselle. Or chacune dicelles, cest asçauoir tant la *Galibid.* veine, que lartere, descend du thorax avec la neuueme coniugation des nerfz de la spinale medulle, desquelz tantost nous traiçterons: & illec entre au bras: auquel lieu paruient le tiers nerf. En apres elles enuoient des rameaux notables à tous les muscles du bras, & descēdent à la flexion

de l'article , par lequel le bras est conioint avec cubitus. En ce lieu, iouxte la flexion, ceste artere est diuisee en deux , avec la veine axillaire : laquelle aussi diuisee en deux (comme nous auons dit) est produite ensemble, & dispensee, ou distribuee en ordre de rameaux , en tous muscles : iusques aux commencements des doigts. Et ainsi quand nous voulons explorer , ou enquerir le poulx, nous touchons la plus haulte, & plus enleuee artere: laquelle fait son cours à loz de radius, aupres de la commissure de carpus.

*Gal. ibid.* Item l'artere moyenne entre index, & le poulce , ayât son origine de ceste dite artere, ha mouuement sensible. Mais il n'est possible d'appercevoir manifestement le mouuement de l'artere plus basse: laquelle fait son cours par los de cubitus, droit iusques au petit doigt : sinon que l'homme soit extenué: toutesfois elle fait grande pulsation, ou poulx. Car nature retient les arteres en la profondeur, sans enuoyer manifestement aucune particule dicelles au cuyr, ainsi que aux veines, & nerfs.

Parquoy tu ne trouueras nulle artere aux mains extremes , par dehors : & non sans cause : car aussi il ny ha nul muscle. Mais la region interne (pource quelle est enuironnee de beaucoup de muscles) aussi est

est elle de beaucoup darteres estendues en chacun diceux muscles. Toutesfois tu veras toutes les arteres de carpus estre aucunesfois coniointes avec les veines, apres auoir osté le large tédon. Entre lequel, & ceux qui fleschissent les doigts, les arteres sont situées, avec les subtilz nerfz : desquelz maintenant ie feray mention.

*De la production des nerfz en toute la main.*

**L**es nerfz de la main sont produitz de la spinale medulle, ou moelle, du *Gal. libr. col, & du dos.* 13. & 16.

Il y ha au bras cinq nerfz : cestasçauoir, *de usu*

3 Trois en la partie exterieure, au despart. *Gal. libr. 3. de anat. administ.*

sonbz du cuyr : lesquelz ont leur origine de ceux, qui font leur cours aux muscles du bras. Dont le premier entre dedens los du bras manifestement : illec, ou deux testes de muscles se doiuent assembler en vn, iouxte humerus. Lautre est beaucoup plus bas, lequel entre au nœud interieur, & inferieur du bras, là ou le bras est bien plein, & non gibbeux. En procedant, ces deux nerfz enuoient rameaux en la teste du petit muscle anterieur de cubitus, ou vlna; aucunesfois de lun, aucunesfois de tous deux. En apres le second nerf departist, & communique au premier seulement.

ment vn rameau, aufsi grand comme appert illec celuy, qui reste du premier. Mais celuy, qui est composé des deux, est estendu iusques à cubitus par le mylieu de sa flexion, ou curuature.

3 Le troisieme, lequel est le plus grand de ceux, qui font leurs cours es mains, cest adire le plus gros, ensuit les deux dessusditz entrant dedens brachium, quasi aupres du second muscle avec les grans vaisseaux, cest asçauoir l'artere, & la veine, lesquelles paruiennent au bras par l'aisselle. Mais apres que ce nerf est yssu hors de l'os de brachium par la partie exterieure procedant vn peu au dessus de l'article de cubitus, illec quelque partie de luy paruient au cuyr.

2 Item deux autres en la partie interieure: lesquelz apparoissent manifestement, apres qu'on ha descouuert plusieurs parties du bras. En laquelle partie interieure les trois dessusditz sont implantés, vn peu plus bas, que nest le tiers nerf. Dont lun est dessous le cuyr: lequel apparoist le premier de tous, sans faire incision des muscles du bras. Ce mesme muscle procedant en cubitus, par le mylieu de la flexion du bras, enuoye illec incontinent vn rameau fort subtil, adherant à la veine, laquelle est estendue en long

long , en la superficie du mylieu de cubitus : & vn peu apres adhere à lartere procedante en carpus , laquelle represente vn poulx euident. Item il dispense , & distribue vne autre propagation fort subtile en la teste,ou chef dun long muscle: lequel est propre à radius. Consequemment il enuoye vne autre propagation , au reste de la veine humerale. Laquelle propagation est fort subtile , faisant son cours par tout le bras, en maniere de toyle daraignes. Lautre, qui est le cinquieme des nerfz du bras descendants de la spinale medulle , vient par la region interne dudit bras , en la maniere des autres. Lequel toutesfois ne communique aucune part , ou portion de soy, à quelque particule du bras, que ce soit, ou superficielle, ou profonde.

Le cuyr anterieur reçoit sept nerfz : c'esta- *Galibid.*  
sçauoir,

- 1 Vn de la partie superieure de la premiere origine du second nerf : entre ceux , qui sont produitz de la spinale medulle, au bras.
- 1 Mais de la partie inferieure , deuant l'article de cubitus , de quelque autre nerf spinal , lequel descend seul des le commencement de son origine.
- 1 Il y ha vn autre nerf, qui fait son cours  
entre

entre tout le cuyr interieur, & postérieur du bras, iusques aux extremités des scapules, ou omoplates: lequel procede du second intercostal: lequel aussi se estend iusques au bras (comme les autres) par laisselle: tellement que il y ha deux nerfz, procedants de la spinale medulle, lesquelz vont au cuyr des mains, par propagation de rameaux.

4 Quatre autres nerfz sont disseminés, & dispersés profondement, en tous les muscles de tout le membre, lesquelz enuoyent aucuns rameaux subtilz au cuyr.

*Galibid.* Par cubitus descendent deux grans nerfz, au mylieu des muscles fleschissants les doigts: lesquelz gisent en ce mylieu, & sont subiacents à cubitus. Et chacun de eux enuoye aucuns rameaux. Mais depuis, que ces muscles se finissent en tendons, le reste de ces deux nerfz paruient en carpus, & puis en metacarpium, & est distribué es corps, qui sont illecques, & aux intimes, & profondes parties des doigts. Cestascavoir la plus haulte partie aux deux grands doigts, & à la moytié de medius, iouxte index. Mais la partie basse est distribuee à l'autre moytié de medius, & aussi au  
my

mylieu des autres doigts. Et ainsi le plus hault nerf est finy en ce lieu. Mais le plus bas, & infime enuoye vn rameau assez grand, en la partie exterieure de la main: iouxte le commencement de carpus.

Ce nerf inferieur embrasse la moytié *Gale.lib.* de toute la main exterieure: faisant son cours soubz le cuyr extreme, iusques au bout des doigts: cestasçauoir par tous les petis doigts, & par la moytié de medius. Car toute la fin du troisieme nerf dessusdit reçoit lautre moytié de medius, avec le poulce.

*Des os de la main.*

**L** Es os de toute la main sont trente: *Gale.lib.*  
 cestasçauoir, *2. de usu*  
 1 Vn en brachium, ou humerus. *part. et de*  
 2 Deux en vlna, ou cubitus: dont le moindre est appellé radius. Et le plus grand *osib<sup>9</sup> ca.*  
 vlna, ou cubitus: ayant tel nom, comme *16. 17. 18.*  
 ha tout le membre. *19.*

27 Et vingtsept en la main extreme: cestasçauoir huiët en carpus, quatre en metacarpium, & quinze es doigts: oultre le neuuieme os de carpus, & les os nommés sesamoidea, que les anatomistes ne comptent point.

*De l'os de brachium, ou humerus,  
que Guidon appelle os  
adiutorij.*

*Gale. lib. 2. de usu part. & cap. 16. de osibus.* **L**E plus grand de tous les os, cest l'os de humerus, ou brachium (excepté l'os de la cuisse: en Latin femur) lequel os du bras est lié en hault, & en bas. Sa partie supérieure ha vne teste bien grande: laquelle est coniointe, & adnaiscente à vn petit col. En icelle teste, iouxte la partie antérieure, il y ha vn sinus, ou cavité, semblable à vne scissure, ou fente assez ouuerte: lequel sinus diuise toute ceste teste, quasi comme en deux tubercules. La partie inférieure du bras se finist en deux tubercules, ou petis chefs inégaux: dont radius par sa cavité oculaire environue celui, qui est situé extrinsequement: mais avec l'autre, lequel est prominent, & incliné en la partie interne de la main, totallemēt il ny ha nul os, qui y soit conioint: ains appert nud, & sans chair, à ceux, qui le voyent, & le touchent: pour ceste cause il se monstre beaucoup plus grand, que le tubercule extérieur. Nature ha créé la teste interne de brachium, pour la tutelle, & deffense des veines, artères, & nerfs. Laquelle aussi luy ha annexé, & adioint les chefs des muscles internes de vlna: lesquels



quelz muscles sont situés selon rectitude. Au mylieu de ces chefz il y ha quelque sinus, ou cavité petite, & ronde, semblable aux orbités, ou concauités des roues: à len uiron duquel sinus les apophyses agues de vl̃na ( appellees en Grec cor̃na ) sont meſes. Mais là ou la cavité, ou sinus se finist, il y ha dauantage deux cavités, dun costé, & d'autre: dont lanterieur est moin dre, que la posterieure. Hippocrates appelle ces deux cavités vathmides: dedens lesquelles, entrent leſdites apophyses agues de vl̃na: quand nous estendons, & flechissons toute la main, avec vl̃na. Lesquelles cavités sont le terme, & fin dextreme extension, & flexion: dont lanterieur reçoit lanterieur cor̃ne de vl̃na, en la flexion: & la posterieure reçoit la posterieure, en lextension. Toutes les autres parties du bras, rondes, & non pas droites, ny semblables du tout, sont gibbeuses en la partie anterieure, & exterieure: à cause de ſeureté. Mais en la partie posterieure, & interieure, elles sont conuexes, ou caues: à cause de apprehension, cestadire, pour mieux prendre.

*Des os de cubitus, ou vl̃na.*

**I**L y ha deux os en cubitus, ou vl̃na (en prenant le nom de cubitus largement)

*Gale. lib.  
2. de usu  
part. &  
cap. 17. de  
ossibus.*

q pour

pour toute la partie , qui est entre l'article de cubitus , & de carpus. Car il est aucunesfois prins specialement ( comme dit est ) pour le plus grand os de ceste mesme partie.

i Lun est superieur, plus court , & oblique : appellé en Grec cercis, en Latin radius: Guydon l'appelle le moindre forcile. Duquel l'extreme partie superieure , estant vn peu caue , reçoit le tubercule exterieur du bras , & ha colligance avec luy. L'office , & vtilité de ceste colligance, ou connexion , est de tourner toute la main en figure prone, & supine . Et pourtant radius ha esté fait oblique . Sa partie inferieure correspond , cestadire , que elle est situee au droit du poulce , tout ainsi , que la partie inferieure de vlna correspond au petit doigt . Et illec iouxte les parties de carpus, chacun des deux ha vne appendice , ou addition : laquelle est concaue interieurement , & gibbeuse exterieurement . En ceste cauité carpus se insinue , & ha sa colligance : par laquelle colligance, & connexion, l'article de carpus , & la main extreme est estendue, & fleschie. Mais ce, qui est entre radius & vlna , est du tout séparé , pource quil y falloit mettre des muscles.

2 Le second os est inferieur, plus long, & droit : les Grecz le nomment pechys, les Latins cubitus, ou vlna : Guydon le appelle le plus grand focile. Duquel lextreme partie superieure ha deux apophyses agues, dites en Grec cornæ, ou corna : pource que elles sont rondes. Lapophyse, ou corne anterieure, est la moindre : lautre est la plus grande : laquelle les Atheniens appellent olecranon, cestadire le tubercule de cubitus. Hippocrates lappelle ancœn, cestadire cubitus, en Francoiſ le coulde. Le sinus, ou cavitè de vlna, semblable à ceste lettre Grecque Σ, est comprinſe par ces deux apophyses : dedens lequel sinus, lorbitè ou rotondité de brachium est implantee. Loffice, & vtilité de ceste articulation est destendre, & de fleschir toute vlna, & par elle, toute la main : pour ceste cause, vlna ha esté faite droite. Item la partie inferieure de cubitus correspond au petit doigt. En laquelle partie cubitus ha vne apophyse dabondance, que on appelle processus styloides, à la similitude dune colomne : laquelle apophyse ha colligance avec carpus. Loffice de ceste colligance, ou connexion, est de mener, ou de mouvoir carpus obliquement.

*Des os de carpus, en Latin  
brachiale.*

*Gale. lib.  
2. de usu  
part. &  
cap. 18. de  
ossibus.*

**I**L y ha huiſt os en carpus, leſquelz ſont liés, & ferrés tous enſemble, par ligaments nerueux, & cartilagineux: par ſynarthroſis, ceſt adire par vne iointure, ou articulation d'os, leſquelz n'ont ny fort, ny manifeſte mouuement. Tous ces huiſt os de carpus ſont durs, & bien petis, & ſans moelle. Item ilz ſont vn peu gibbeux en la ſuperficie exterieure, & caues, ou ſinueux intrinſequement. Auſſi ilz ſont diſtinſtéz, & diuiſés en deux ordres.

- 1 Le premier ordre, qui eſt la ſuperieure partie de carpus, eſt articulé avec vlna. Et eſt compoſé de trois os, qui ſont quaſi en figure ronde, connexés, & liés avec cubitus, & radius, & proceſſus ſtyloides. Le premier os, qui regarde le petit doigt, reçoit ledit proceſſus ſtyloides de cubitus, en vne petite cavité, ou ſinus. Le ſecond os, qui eſt au mylieu des trois, eſt ſitué là, ou cubitus, & radius ſont coniointz enſemble. Le troiſieme os, qui eſt party en deux, eſt compris par radius.
- 2 Le ſecond ordre, qui eſt la partie inferieure de carpus, eſt compoſé de quatre os, moins ferrés, que les deſſuſditz: par leſquelz quatre os, il eſt lié, & connexé avec

avec metacarpium.

Le huitième os de carpus est cartilagineux, & assez long: lequel est porté par les parties intérieures de carpus: esquelles il est articulé audit processus styloides de vlna, vers le petit doigt.

Item iouxte le pouce, est le neuvième os de carpus, petit, & cartilagineux: lequel n'est point compté des anatomistes, non plus, que les os appellés sesamoïde, à l'espece, & similitude dun petit legume, nommé sesamum. Lesquelz os nature ha mys (cōme dabōdant) en plusieurs articles des piedz, & des mains: à cause de seureté.

*Dès os de metacarpium, en Latin  
postbrachiale.*

**M**etacarpium est composé de quatre os, distants lun de lautre selon Galien: Iasoit, que Celsus, & Guidon, & plusieurs autres en ayent mys cinq. Laquelle chose n'est pas vraye. Ces quatre os de metacarpium, entre les doigts, & carpus, accomplissent la palme: & ont colligance avec carpus, par synarthrosis: mais ilz ont colligāce avec le premier ordre des doigts par diarthrosis, cestadire par vne iointure d'os, dont le mouuement est euident. Ceux, qui attribuent le troisième os du pouce, à metacarpium, ilz afferment, que

*Gale. lib.  
2. de usu  
part. &  
cap. 19. de  
ossibus.*

metacarpium est composé de cinq os, & les doigts de quatorze.

*Des os des doigts.*

*Gale. lib. 3. de usu part. et c. 19. lib. de ossibus.* **L**Es cinq doigts sont cōposés de quinze os, en Latin internodia, cestasçavoir chacun de trois os: dont le premier entre dedens la cavité du subseqvent. Car aussi le poulce est composé de trois os, contre l'opinion de Celsus, Guidon, & plusieurs autres. Et son premier os est articulé en carpus: mais le premier os des autres quatre doigts est articulé en metacarpiū. Et ne doit pas estre cōpté, avec les os de metacarpium: ains est propre os du poulce, d'autant que il est lié, & connexé de chacune part, par diarthrosis: laquelle chose aduient aux premiers os des doigts, & non pas de carpus.

C'est assez dit des mains: reste à parler des iambes.

*Des iambes.*

*Gale. lib. 3. de usu part. et de ossib<sup>9</sup> ca. 21. 22. 24. 25. et li. 3. de anat. administ.* **T**Out ce, qui est depuis l'article de l'ischion, iusques aux extremités des doigts, est appellé en Grec sceelos, en Latin crus, en François toute la iambe. Laquelle ha trois grandes parties correspondantes aux trois parties de toute la main. Cestasçavoir,

- 1 La cuiſſe, en Latin femur, ou crus aucunesfois, en Grec meros, ou meron, cest tout le membre, qui est entre ischion, & le genoil : lequel est correspondant au bras. Sa iointure en los de tibia est appelée, en Grec gony, en Latin genu. Sa partie postérieure est appelée en Grec ignya, & ignys, ou ancyle, en Latin poples, cest le iarret.
- 2 Item tibia, en Grec cneme, Celsus l'appelle crus, cest toute ceste partie, qui est située entre talus, & genu, correspondante à tout cubitus. Aussi le plus grand os dicelle mesme partie, est appelé tibia, comme en cubitus, ou ulna. La partie antérieure de tibia, subtile, & sans chair, est appelée en Grec anticnemion, en Latin crea, en François la greue, ou la gresle de la iambe. Et la partie postérieure, est appelée en Grec gastrocnemia, en Latin sura, en François le vêtre, ou le gras, & le mol de la iambe.
- 3 Item le pied, en Grec pous, en Latin pes simplement, au cōtraire de la main, cest la partie extreme de toute la iambe, depuis talus, ou astragalus, diuisée en doigts. Laquelle derechef ha trois parties, correspondentes aux trois parties de la main extreme. La premiere est appelée tarsos en Grec, en Arabe rasceta,

*Celsus. c.  
lib. 8.*

cest la premiere partie du pied , correspondente à carpus. La secōde partie est appellee pedion en Grec, en Latin planum, ou planta, ou pecten: laquelle correspond à metacarpium. Cest la partie situee entre tarsus, & les doigts : laquelle est ainsi nommee, pource que elle est pleine , & que elle touche à terre. La tierce partie, ce sont les cinq doigts, fort semblables aux doigts de la main : toutesfois ilz sont tous constitués dun ordre. Car le pouce nest point opposee aux autres doigts, cōme en la main : de peur de gaster la fermeté du pied. Car le pied de l'homme est fait à cause de fermeté, ou stabilité, & aussi à cause de apprehension. Pource, que sil eust esté petit, rond, dur, & du tout leger, comme le pied dun cheual, lapprehension eust esté du tout gastee. Parquoy nature lha créé tel, cest à sçauoir long, large, mol, & fendu en plusieurs parties, & caue en la partie interne : & gibbeux en la partie externe : pour eslire toutes les deux commodités, ou vtilités, cest à sçauoir de stabilité , & dapprehension , & aussi pour euitier tout nocument.

*Gal. li. 3.* La iambe humaine, en Grec sceelos antropou, cest instrument pour cheminer, & *usu part.* aussi pour prendre : par lequel l'homme peult



peult cheminer, courir, prendre, demourer debout, & seul se soir. Or cheminer, ou courir, se fait, quand lun des piedz est ferme en terre, & lautre est porté circulairement. Mais estre ferme, cest lactïon du pied: & estre porté circulairement, cest lactïon de toute la iambe. Item le pied est diuise, & fendu en plusieurs parties: & est caue au mylieu, pour aller par tous lieux. Car par sa partie caue, & moyenne, il préd toutes choses gibbeuses: comme fait la main. Et vse de ses doigts en lieux droits, & obliques, & decliues, & rompus, comme es rochiers. Station, cest adire, quand on se tient debout, est faite, quand toutes les deux iambes sont fermes en terre, & semblablement tendues. Item entre tous animaux lhōme seul est droit: car à luy seul, & non autre, la spine est selon la rectitude des iambes. Et si ainsi est, que elle soit droite, aussi est tout le corps. Dautant, que la spine du corps humain est, cōme le dos dune nauire, en Latin carina: & en icelle les iambes des bestes à quatre piedz, & des oyseaux, font vn angle droit: mais aux hommes seulemēt elles sont estendues par vne ligne droite. Donc les iambes des bestes à quatre piedz, & des oyseaux, quand ilz cheminent, ont telle figure avec la spine, comme ont les iambes des hommes:

quand ilz sont assis. Et pour ceste cause, nulle beste n'est iamais en droite station: ains toutes les bestes sont prones: & l'homme seul est en station droite. Il est aussi manifeste, que les bestes ne se peuvent seoir: ce que fait l'homme. Iacoit quil se tiennent appuyees sur les ischies. Pource, que quand on est assis, il fault que les iambes, qui sont coniointes aux ischies, soient ployees en arriere, en l'articulation de femur, avec tibia. Car, quand nous sommes assis, la spine, avec femur, fait vn angle droit. Derechef si femur, avec tibia ne faisoit vn autre angle droit, tibia ne seroit pas droite vers la terre: & pour ceste cause lon ne se pourroit pas seoir fermement. Si donc, quand telz membres sont fleschis, ou ployés au genoil (lesquelz sont coniointz aux ischies) il aduient, que l'animal soit assis, il est manifesté, que cela ne peut aduenir à aucune beste. Car toutes bestes ont les iambes de derriere ployees au deuant.

*Des differences des mouuemens de  
toute la iambe.*

**A** Present (à cause de briueté) nous delaissons les mouuemens de ischion, & de femur: & aussi les muscles, qui font telz mouuemens. Desquelz Galien traite amplement

plement au quinzieme de vſu partium.

Larticulation de tibia, & du genoil, ha *Gal. libr.*  
quatre mouuemens, *3. de uſu*

2 Deux droits, ceſtaſçauoir extension, *part.*  
& flexion.

2 Et deux obliques: par leſquelz la iam-  
be eſt meſſe lateralement.

En tibia il y ha treize cheſz de tendons:  
ceſtaſçauoir,

6 Six derriere.

7 Et ſept denant.

Leſquelz mouuent le pied : ſelon tous  
mouuemens, qui luy conuiennent.

Or il y ha quatre mouuemens, qui con- *Gal. libr.*  
niennent à tout le pied extreme (ſans les *3. de uſu*  
doigts) comme à carpus : ceſtaſçauoir, *part.*

1 Extension.

2 Flexion.

3 Circonduction à dextre.

4 Et à ſeſtre.

Car larticulation ſuperieure de talus, ou  
aſtragalus, avec los de tibia, & de fibula,  
fait lextension, & la flexion du pied : leſ-  
quelz mouuemens ſe font au pied, en ma-  
niere cōtraire à carpus. Mais larticulation  
du cheſ de aſtragalus (laquelle eſt à los  
nauiforme) fait la circonduction aux co-  
ſtēs. Il y ha quatre muſcles ordōnés, pour  
ces quatre mouuemens, leſquelz ſont du  
tout correfpondans aux quatre muſcles  
mouuans

mouuans carpus.

*Galibid.* En chacun des doigts du pied (comme de la main) Il y ha quatre mouuemens: cestasçauoir,

1 Extension.

1 Flexion.

2 Et deux mouuemens obliques.

Parquoy nature ha gardé quatre lieux de implantation aux tendons, comme en la main. Or veu, quil ny ha que vingt & huiët articles des doigts des deux piedz (car le poulce nen ha, que deux, comme il nha, que deux os) aussi il ny ha, que cent, & douze implantations de tendons. Toutesfois les tendons des piedz fleschissans, ou estendans, ne sont pas si grans, comme les tendons des mains. Car il ne falloit pas, que le pied fust instrument autant apprehensif, cest adire autant i doyne à prendre, comme est la main. Parquoy, non seulement les doigts, mais aussi les tendons des piedz, & des mains, ont magnitude contraire. Car dautant, que le pied est plus grand, que la main, dautant les doigts, & tendons du pied, sont plus petis, que ceux de la main. Pource, que la principale action des mains consiste es doigts, dautant quilz sont instrumens, pour prendre. Mais il ha esté plusvtile, que les piedz fussent beaucoup plus grans, que les mains:

& tout

& toutesfois quilz eussent de plus petis doigts, & tendons: pource quilz sont faits non seulement pour apprehension, mais aussi pour seure firmation, & pour porter tout le corps. Ce nha pas donc esté chose iuste, que quatre genres de tendons mouuans les doigts, fussent produits des muscles de tibia: ainsi comme ( en la main) des muscles de vlua, mais deux seulement: cestasçauoir,

- 1 Lun pour faire l'extension des quatre doigts.
- 2 Et lautre, pour faire la flexion du premier, & troisieme article; des susditz quatre doigts.

Car le pouce du pied (comme nous auõs dit) ha seulement deux articles.

Il y ha quatre autres genres de tendons, qui sont produitz des muscles du pied extreme: cestasçauoir,

- 1 Les vns pour faire l'adduction,
- 2 Les autres pour faire labduction.
- 3 Les autres pour faire la flexion du second article des quatre doigts.

Car en chacun article, il y ha quatre mouuemens, & cinq principes diceux mouuemens, comme en la main: toutesfois ilz ne procedent pas tous de lieux semblables, & correspondans en proportion. Maintenant il fault parler des muscles, veines,

veines, arteres, nerfz, & os de toute la iambe: en tel ordre, comme de la main. Laquelle chose parfaite, nous viendrons à la fin de nostre ceuvre. Commençons donc premierement au muscle de femur: d'autât quilz doiuent estre incisés les premiers.

*Des muscles de femur.*

*Gal. libr.  
3. de usu  
part.*

**L**Es muscles de femur, cestadire de la cuisse, sont neuf: lesquelz tous descendent à la teste, ou chef de tibia, apres auoir passé larticulatiō du genoil, cestasçauoir,  
3 Trois en la partie de deuant de femur, les plus grans de tous les muscles, qui sont en ce lieu: lesquelz paruiennent droit au genoil. Dont lun est implanté aux charneuses apprehensions de la palette du genoil, dite mola, ou patella. Et les deux autres engendrent vn grand tendon: lequel dilaté se plante desia à toute la palette: la serrant, & estraingnant du tout, & la conioignant aux parties subiettes du genoil. Et apres, quand ce tendon ha passé larticle, il est implanté aux parties anterieures de tibia: lesleuant en hault, sil est tendu, & estédant toute larticulation du genoil. Ces trois muscles, qui font lextension, sont plus fors, & plus grans en dignité, que les autres trois, qui font la flexion.

Laquelle

Laquelle chose est tout au contraire en la main : comme dit est.

<sup>2</sup> Les deux autres sont, lun deça, & l'autre dela : iouxte les trois dessusdits: cest-à-sçauoir lun exterieur, & l'autre interieur. Lesquelz sont implantés aux parties laterales de tibia: pour faire le mouuement oblique de tibia, & par icelle, de la iambe. Dont linterieur ameine la iambe dedens : ayant son origine, ou explantation, en la commissure des os pubis. Mais l'exterieur meine la iambe dehors : ayant son explâtation des parties exterieures de ischion. Ces deux muscles (à cause de leur situation oblique) sont pour bien mouuoir la iambe obliquement.

<sup>3</sup> Les trois autres sont situés par ordre en la partie de derriere de femur : en l'espace, qui est entre ces deux obliques. Lesquelz trois muscles mouuent le genoil, par petis mouuemens, & ne sont pas si robustes, comme les trois de deuant : Et aussi ne s'assemblent pas tous en vn tendon. Dont lun est continu avec linterieur dessusdit, lequel fleschist le genoil, & ameine tibia aux parties interieures. L'autre, qui touche le muscle exterieur, ameine tibia dehors, en la fleschissant. Le tiers, qui est au mylieu de tous,

tous, en la partie postérieure, est implanté en la teste interne de femur: iuxte le genoil. Lequel fleischist tout femur, & avec luy attire tibia. Ce muscle gist sur les parties, qui sont depuis l'articulation du genoil, iusques à l'autre grand muscle de tibia: avec lequel il retire aussi toute tibia.

- 1 Le neuuieme des muscles mouuās l'articulation du genoil, est estroit, & long: naissant de los ilium. Lequel muscle eleue en hault tibia: & constitue toute la iambe, principalement en ceste figure, en laquelle nous eleuons le pied en hault, iusques à l'anguine de l'autre iambe, quād nous broyons, & concuquōs, ou foullons quelque chose des piedz.

*Gal. ibid.* Oultre tous les muscles dessusdits, il y ha vn petit muscle du iarret, qui ploye, ou fleischist le genoil.

*Des muscles de sura.*

*Gal. libr. 3. de usu part.* **E**N sura il y ha six muscles: & non pas cinq tant seulemēt, comme il ha semblé aux anciens anatomistes, qui ont estimé les deux derniers nestre que vn: pour ce, que en plusieurs parties ilz sont coalescēs, & vnīs ensemble.

- 3 Les trois premiers mouuent calcaneū, par vn seul tendon: & d'une grande part,



part, & portion dudit tendon, ilz constituent la partie du pied, laquelle est sans poilz, & non muable, ou uersatile. De ces trois muscles naist vn seul tendon manifeste : lequel est fort robuste, & le plus grand de tous. Et se implante en calcaneum, qui est le plus grand, & le plus fort de tous les os du pied. Ce tendon attirant à soy ledit calcaneum, tient tout le pied si ferme, que si tu veux quelquefois demourer de bout, sur vn pied, en esleuant lautre, tu ne tomberas point: iasoit encores, que aucun des autres tendons mouuās le pied, fust blessé: tant il ha grande vertu, & equipollente à tous les autres tendons. Et si quelque fois luy seul est blessé, il est nécessaire, que le pied cloche. Or il est produit de trois grans muscles (laquelle chose aduient à luy seul, & non à autre) à celle fin (si lun deulx est quelque fois blessé, ou tous deux) que celuy, ou ceux, qui resteront sains, & entiers, seruent. Item ce tendon deuoit estre tel, dautant quil est implanté au premier, & principal instrument dambulation, ou de cheminer : cest asçauoir en calcaneum: Et quil conioint calcaneum avec tibia, luy seul. Ce tendon correspond, & est proportioné totalement en situa-

tion,

tion, & en action, au tendon, qui est implanté dedens la main, au huitieme os de carpus, denant le petit doigt. Or tous les anatomistes anciens ont estimé, que les trois muscles de sura sont implantés au calcaneum, par ce dit tendon: mais il n'est pas ainsi. Car vne grande part & portion de lun de ces trois tendons, apres auoir passé outre calcaneum, est implantee à toute la partie inferieure du pied: ainsi que nous auons dit du cuyr de la palme. Lequel possible mieux vouldra estimer estre, non pas part, & portion du troisieme muscle, mais plustost vn quart muscle à part. Ceste chose aussi ha esté incongneue aux anciens: cest asçauoir, que des muscles, qui doiuent estre implantés en calcaneum, cestuy cy, qui est produit, ou explanté de los de fibula, se implante plus profondement: lequel est quasi du tout charnu, iusques au calcaneum. Les deux autres, depuis les cheffz, ou testes de femur, iusques au genoil, sont terminés en vn tendon fort, & robuste: & sont consequemment implantés avec le muscle dessusdit, à la summité de calcaneum. Mais le cuyr de la plante du pied (lequel cuyr est de nature moyenne entre mol, & dur) adhe-

re exactement à toutes les particules subiettes, ou subiacentes : à celle fin, quil ne se tourne facilement, ne ça, ne là : ainsi que dessus ha esté dit en la main. Auquel cuyr est disseminée, & dispersee toute la germination du tendon, lequel est au calcaneum : à celle fin aussi, quil ne soit facilement tourné çà, & là : & dailleurs, quil participe de beaucoup de sentiment : ce quil ha des nerfz. Car les petites germinations de nerfz de la spinale medulle, des lombes, sont distribuees en la profondeur du pied, laquelle est dessous le cuyr. Mais les nerfz de la main, sont beaucoup plus grans, que ceux du pied : pource que la main ha plus grand besoing de sentiment exacte, & agu, que nha le pied : veu que non seulement elle est organe, ou instrument dapprehension, mais aussi dattouchement. Mais le pied dautant, quil ne deuoit pas estre instrument de lattouchement, comme à tout le corps, ains de cheminer seulement) autant, quil requeroit de sentiment, autant en ha il heu : à celle fin, quil ne fust blessé, pour petite occasion.

3 Trois autres tendons adherens soubz iceux, fleschissent les doigts, par leurs tendons impliqués, & meslés ensemble :

à cause de seureté. Et font vn mouuement conuenable au pied : lequel mouuement est fait en la main , par vn tendon implanté deuant le poulce : comme nous auons demonstté.

1 Lun est diuisé en cinq tendons : dont quatre fleschissent le premier , & le tiers article des doigts : & le cinquieme tendon fleschist les deux articles du poulce.

2 Item deux autres , dont lun est implanté au petit doigt : & lautre est implanté en bas , en ce lieu , qui est entre le poulce. Et chacun par vn tendon. Lesquelz deux muscles font lextension du pied , avec ce tendon robuste , lequel (comme nous auons dit ) est implanté au calcaneum. Mais quand lautre fait son action , les mouuements obliques se font tout ainsi , comme en carpus. Car ces tendons correspondent en proportion à ceux , qui fleschissent carpus en la main , comme dit est. Mais il fault icy entendre lextension , & la flexion du pied , estre faite tout au contraire , que en carpus. Toutesfois

en quelque maniere , que  
tu le prenes , il ny  
ha pas grand  
different.

Des muscles anterieurs  
de tibia.

**E**N la partie anterieure de tibia , il y *Galibid.*  
ha sept muscles: ou (si tu veux) trois:  
cestasçauoir,

2 Deux, qui esleuent, & suspendent, &  
rendent le pied caue, silz sont tendus  
dune part, & dautre: tout ainsi que  
ceux de la main, qui leur sont corre-  
spondans, estendent carpus. Mais quand  
le troisieme fait son action, alors sont  
faitz mouuemens obliques: tout ainsi,  
comme par ceux, qui sont en carpus.  
Le premier est fort robuste: lequel est  
tendu dessus los de tibia, pour faire le  
mouuement interieur du pied, oblique.  
Ce muscle est explanté des parties du  
pied, iouxte le poulce, au costé inte-  
rieur: ayant deux tendons, dont lun va  
en los nauiforme, & lautre au petit os  
de tarsus, au deuant du poulce. Et dil-  
lec deux germinations paruiennét ius-  
ques au poulce, auquel elles sont im-  
plantees, pour eslongner le poulce bien  
loing des autres doigts. Lautre est moin-  
dre, lequel est rendu tout à lencour de  
los de fibula, pour faire le mouuement  
externe oblique. Il est implanté par vn  
seul tendon, es parties, qui sont de-

uant le petit doigt, en la partie externe du plus petit os de pedum. Et dillec il est implanté aux parties externes du petit doigt, pour leslongner bien loing des autres: comme le dessusdit eslongnoit le poulce. Car le petit doigt, & le poulce du pied (comme de la main) surmontoient tous les autres doigts par vn mouuement: cestasçauoir abduction.

i Le troisieme, qui est situé entre les deux dessusditz, estend les doigts: lequel est le moindre des trois, à cause quil meult les moindres organes:& quil tend droit aux doigts, par le mylien de tibia,lesquelz il deuoit mouuoir. Et est correspondant au muscle, dont les tendons passent par la main exterieurement.

*Galibid.* Les anciens anatomistes ont cuydé, quil ny eust, que trois muscles anterieurs de tibia: pource que pour la plus grande partie ilz sont coalesceez, & vnis ensemble. Toutesfois mieux vault dire, quil y en ha six, ou sept. Car il leur semble, que celuy, qui estend les quatre doigts, ne soit que vn (aussi nest il) mais en chacune partie de luy, derechef il y en ha vn: lequel est terminé en trois cheffz de tendons, lesquelz bien consyderés, & aussi leurs utilités,

sités, nous trouuerons, quil y en ha six, ou sept. Neantmoins si à present nous nen comptons que trois, cela ne retardera en rien, le cours de nostre oraison, & propos.

*Des muscles du pied.*

**I**L y ha (comme il se congnoist par lexperience des anatomistes) trois manieres de muscles au pied.

1. Les vns sont cōstitués en pedion, cest-à-dire plānum en Latin: lesquelz doiuent faire le mouuement interieur oblique, des doigts, vers le poulce.
2. Les autres sont situés en toute lautre partie du pied, iusques an calcaneum: lesquelz fleschissent le second article des quatre doigts.
3. Les autres sont adherens, & situés en la superieure region du pied: lesquelz font le mouuement exterior oblique, vers le petit doigt.

*Des muscles situés entre les os de pedion.*

**O**ltre les muscles dessusditz, il y en ha dautre fort petis, entre les os de pedion. (comme en la main entre les os de metacarpium) lesquelz nont pas esté obserués, ne considerés des anciens anatomistes: ne mesmement par Galien, vn

espace de temps, comme luy mesmes le confesse au premier liure des anatomiques administrations.

*Gal. libr.* Ces muscles (comme il est escrit au lieu  
*de anat.* allegué) fleschissent le premier article de  
*administ.* chacun doigt : & font ladduction, semblablement aux piedz, & aux mains. Toutesfois en la main (pource quil ny ha, que quatre os en metacarpium, & trois interualles, ou entredeux seulement entre ces quatre os) il sensuit quil ny ha, que six muscles : cestasçauoir deux en chacun interualle. Mais au pied, dautant quil y ha cinq os en pedion, & quatre interualles entre ces cinq os, il y aura huit muscles : cestasçauoir deux en chacun interualle.

Voyla les muscles de toute la iambe. Quant au nombre diceux, ie le laisse à compter, & considerer, à vn chacun, à son plaisir. Or venons maintenant aux vaisseaux.

*De la production des uaisseaux,  
en toute la iambe.*

*Gal. de* **L**A veine caue, ainsi comme la grande  
*dissec. ue-* **L**artere, enuoye deux rameaux infignes, & grans, en chacune iambe : desquelz  
*narum.* la figure est semblable à ceste lettre V.  
*Gal. libr.* - Vn certain rameau paruient inconti-  
*de ana.* nent en la region anterieure, & interne,  
*administ.* de



de femur (cest la cuisse) lequel rameau est distribué soubz le cuyr superficiel, en plusieurs autres. De ce rameau autres petites, & subtiles veines sont dispersecs, & disseminees au cuyr, par petis interualles, cest-à-sçauoir trois, ou quatre. En apres vne autre veine assez grande, semblable à la premiere, est consideree, & veüe au mylieu de femur, pres du muscle estroit: auquel muscle ceste veine se va inserer, ou implanter. En apres deux autres petites veines, & à l'aduenture trois, sont distribuees par petis interualles, & espaces. Apres lesdites veines, il y en ha vne autre grande, & insigne, laquelle entre dedens tibia, interieurement. En apres sensuit vne autre veine diuatiquee, cest-à-dire diuisee, en deux parties. Conséquemment sensuyuent plusieurs autres. Or toutes ces veines sont superficielles, & sans artere: comme tantost apres sera dit.

Mais en la profondeur, il y en ha d'au- *Galibid.*  
tres, en ceste maniere. Cest-à-sçauoir la pre- *ex lib. de*  
miere propagation, iouxte les inguines, *disssect. ne*  
ou aynes: laquelle est dispersee avec vne *narum.*  
petite artere, es deux muscles anterieurs. Incontinent sensuit vne autre plus profonde, assez grande: laquelle est produite au plus grand muscle de tous: lequel muscle entre les anterieurs est interne. De

T A B L E

laquelle veine plusieurs propagations de  
autres veines, sont disperſees preſque en  
tous les muſcles de femur.

*Gale. lib.* Ceste veine vn peu plus haulte, que là,  
*de diſſect.* ou femur eſt conioint avec l'article de ti-  
*uenarū.* bia, eſt diuiſee en trois rameaux.

1 Le rameau du mylieu, qui eſt le plus  
grand, deſcend par femur, iuſques au iar  
ret, en Latin poples: là ou vulgairement  
on l'appelle vena poplitis: de laquelle on  
ha accouſtumé de faire phlebotomie.  
Et dillec en procedant par la profondeur  
de ſura, elle diſtribue pluſieurs rameaux  
es muſcles de ſura. Ceste veine vulgai-  
rement eſt appelee vena communis, ou  
media, comme en la main.

2 Lautre rameau, qui eſt ſuperficiel, eſt  
produit par la partie exterieure, de l'au-  
tre os de tibia, qu'on appelle perone: le-  
quel rameau paruient iuſques à l'article  
du pied. Parquoy elle eſt appelee vena  
externa malleoli: ceſt adire la veine ex-  
terne de la cheuille du pied. Guydon  
l'appelle ſciatica: laquelle ſeroit mieux  
nommee iſchiadica, pource que la phle-  
botomie de icelle eſt vtile à la goutte  
ſciatique, dite en Grec iſchias.

3 Le troiſieme interieur, procede en la  
partie anterieure de tibia: laquelle par-  
tie eſt appelee crea en Latin. Et de là à

la

la cheuille, ou malleole, qui est l'extre-  
mité de tibia. Ceste veine est trescom-  
mode à phlebotomer. Guydon lappel-  
le saphena, par vn vocable corrompu,  
pour saphea, cestadire manifeste. Car  
saphes en Grec signifie autant, comme  
manifeste. Aussi ceste veine est tresma-  
nifeste. On lappelle aussi vena interna  
malleoli, comme lautre estoit nommee  
vena externa.

Les extremités de ce rameau, & des autres, *Gale. li. 3.*  
paruiennent iusques à tarsus, & au pied, & *de anat.*  
aux doigts: lesquelles extremités sont mes- *administ.*  
lees ensemble, & aussi avec icelles, qui sont  
adiacentes, & prochaines.

*De la production des arteres en  
toute la iambe.*

**L**A grande artere est implantee en la *Galibid.*  
Iambe, par les inguines, tout ainsi  
comme la grande veine: tellement, que si  
tu y metz la main, en ceux qui sont mai-  
gres, & qui ont grand poulx, tu y sentiras  
sensible mouuement. Or chacun de ces  
deux vaisseaux procede par les parties  
interieures de femur, gisant sur le plus  
estroit muscle dudit femur: auquel muscle  
paruiennent aucuns rameaux de lartere,  
selon la portion de sa magnitude: comme  
ilz

ilz paruiennent en tous les autres muscles de femur. Et ainsi quil est en la main, semblablement est il en la iambe. Car les veines sont coherentes, & coniointes avec les arteres inserees aux muscles. Toutesfois les arteres ne montent pas avec les veines superficielles, ains toujours entrent plus profondement par les muscles.

*Gal. ibid.*

Donc autant que iay dit, quil y ha des veines, qui sont propagees, & distribuees profondement par tibia, aux muscles de femur, autant y ha il darteres adiacentes à toutes icelles veines: mais aux veines superficielles, il ny ha nulle artere subiacente. Laquelle chose est manifestemēt vraye, pour ceste cause: car en la iambe de ceux, qui sont charnus, napparoist nul poul: sinon en tarsus, directemēt au second doigt apres le poulce. Et ainsi nous touchōs lartere illec situee, quand nous ne pouuōns toucher celle qui est dessoubz carpus.

*Gal. ibid.*

Item il y ha dautres arteres en tarsus, & au pied: lesquelles souuentefois mōstrent aucun poul, en ceux qui sont maigres, quand elles sont esleuees en magnitude.

*De la production des nerfz en  
toute la iambe.*

*Gal. li. 17.*

*Et 16. de  
usu part.*

**A**Veuns nerfz descendent de la spinale medulle des lumbes, & de os sacrum,

crum, iusques aux iamboes. Quatre racines de nerfz, faifans leurs cours au cuyr, appa- *Gale. lib. de anat. administ.* roissent iouxte le principe, & commence- ment de femur: pareilz en nombre aux principes des grans nerfz, qui sont disper- sés aux muscles: dont procedent ces petis nerfz superficialz.

- 1 Lune descend des muscles anterieurs, en tout le cuyr prochain à iceux.
- 2 L'autre, qui est plus interieure, que la dessusdite, est portee par les inguines, par vn muscle grand, & estroit.
- 3 La tierce est iouxte la pointe de os sacrum, laquelle les Grecz appellent coccyx, & est moins euidente, que les autres.
- 4 La quarte est encores plus occulte, laquelle consiste au pertuis de pesten.

Après auoir veu ces petis nerfz superficialz du cuyr, tu inciseras tous les muscles de femur. Car quand tu les separes lun de l'autre, adonc apparoissent quatre principes de grands nerfz: lesquelz sont portés par le mylieu des muscles, dont ces nerfz superficialz sont produitz. Voyla comment sont les nerfz de femur. Consequem- *Galibid.* ment il fault voir les nerfz de tibia.

En tibia il y ha seulement deux grands *Galibid.* nerfz, qui sont manifestes par la partie posterieure de femur: apres auoir incisé le muscle

muscle large : soubz lequel seul ilz sont portés, faisant leurs cours iusques au principe de tibia. Et en ce lieu premierement ilz sont separés lun dauec l'autre.

1. Lun, qui est le moindre, & qui doit estre distribué aux muscles extérieurs de tibia, & qui est extérieur, entre en tibia: dessoubz la teste de son os postérieur, que on appelle perone.

2. L'autre, cest à sçauoir le plus grand, qui doit estre distribué aux muscles intérieurs, & qui est intérieur, entre profondement au commencement de sura. Et ce en la region moyenne, entre les deux testes des grandz muscles de sura.

Les autres propagines, & diuisions de ces deux nerfs; aux parties inférieures du pied, sensuyuent cy pres.

*al. ibid.* : L'autre partie assez grande de ce nerf, lequel nous auons dit estre le plus grand, & intérieur, est produite aux parties inférieures du pied. Mais les subtiles extrémités de l'autre nerf, lequel est moindre, & extérieur, sont dispersées, ou distribuées aux supremes, & haultes parties de la plante du pied. Aussi quelque portion de ce nerf paruiet à l'autre nerf, laquelle portion est portée par sura, iouxte la fin inférieure de tibia. Et ainsi il y ha vn nerf assez

assez grand, qui paruient en la partie infime du pied : lequel est distribué en toutes les parties diceluy. Or ce nerf est le reste dun autre plus grand : lequel nous auons dit estre porté aux muscles postérieurs de tibia. Toutesfois il descend en la plante du pied, avec les tendons, qui flectissent les doigts. Mais il y ha quatre nerfz petis, qui sont produitz en la supérieure partie du pied : lesquelz sont le reliqua, & reste de trois autres, cestasçauoir de lun, qui descend avec la veine, dedens tibia : & de lautre, qui se monstre superficiellement derriere sura.

Item vn autre petit nerf procede du *Galibid.* nerf gresle, ou cestuy cy est inseré : lequel fait son cours par sura, depuis le muscle estendu sur los de la partie postérieure de tibia, iusques à l'extremité de ce muscle, qui est pres du pied. Et illec est distribué aux parties externes de tarsus : iouxte les petis doigts, comme le nerf dessusdit y estend ses fins, & extremités : lequel est porté avecques la veine, par toute la iambe, iusques aux grands : comme iay desia dit.

Item entre ces nerfz y en ha deux autres, qui descendent de lun des grandz nerfz : cestasçauoir,  
De celuy, qui embrasse les muscles antérieurs

rieurs de tibia.

Ces deux nerfz montent sur le mylieu de tarsus.

1 Lun est superficial, qui consiste soubz le cuyr: lequel gist soubz le ligament de l'article, ou iointure. Et est distribué aux parties prominentes de tarsus, au cuyr seulement.

2 L'autre, qui est caché au profond desous le ligament, est distribué par tous les muscles superficialz de tarsus: desquelz les tendons font le mouuement oblique des doigts: comme nous auons dit.

*Des os de toute la iambe.*

*Gale.lib.* **L**Es os de toute la iambe (comme aussi de toute la main) sont trente, outre les os appellés sesamoidea: lesquels ne sont point nombrés des anatomistes.

*3. de usu part. et de ossib<sup>9</sup> ca.* 1 En femur, cestadire en la cuisse, il y ha vn os seul, correspondant à l'os de brachium.

2 En la palette du genoil il y ha vn os, auquel ny ha nul os correspondant en la main.

2 En tibia il y ha deux os, dont le plus grand est appellé tibia, par le nom du tout: lequel est correspondant à vlna. Le moindre est nommé perone, ou fibula, cor



la, correspondant à radius.

26 Au pied il y ha vingtsix os, dont trois nont aucune partie correspondante en la main. Cest asçauoir astragalus, ou talus nauiforme, en Grec scaphoïdes, & calcaneus, ou calcaneum. Item quatre en tarsus, correspondants à carpus: cest asçauoir cyboïdes, ou cubiforme: & trois sans nom, appellés chalcœidea selon aucuns. Item en pedion cinq, correspondants à metacarpium. Item quatorze aux doigts: cest asçauoir deux au poulce seulement, & trois en chacun des autres quatre doigts.

*De l'os de la cuisse, en Grec*

*meros, ou meron: en*

*Latin femur.*

**L**Os de la cuisse, en Grec meros, en *Gale.* Latin femur, est appellé par le nom <sup>3. de n.</sup> de tout le membre: lequel est le plus grād <sup>part. et</sup> de tous les os du corps, pour iuste cau- <sup>osibus</sup> se: pource que il porte toute la charge du <sup>cap. 11.</sup> corps. Cest os ha colligance en hault, avec coxendix: & en bas, avec tibia. En la partie superieure il y ha vne teste fort ronde, naïue à vn col prolix, incliné au dedens: laquelle entre dedens le sinus, ou grāde, &

profonde cavité (dite cotyle en Grec) de ischion. Soubz le col de femur, dun costé, & dautre il y ha deux petites apophyses, ou processus, que les Grecz appellent trochanteres. Dont lexterieure, qui est beaucoup plus grande, est appelée gloution, en Latin natis. Femur en la partie inferieure est vn peu manifeste : lequel se finist en deux tubercules, si grans, que on les peult appeller testes. Ces deux tubercules sont coniointz avec tibia : non seulement par ligamens membraneux, par lesquelz toute larticulation est enuirōnee, mais aussi par trois autres ligamens fors, & rondz. Dont le premier est estendu depuis la partie exterieure de toute la connexion. Le second est de la partie interieure. Et le tiers est depuis le mylieu de la partie posterieure, & interieure. Or toute la forme de femur est gibbeuse en la partie anterieure, & exterieure : mais en la partie posterieure, & interieure, elle est caue. Et ainsi elle est plus idoyne aux sésions, cestadire à se seoir : & à beaucoup dœuvres, que nous faisons assis, comme descrire en vn liure estendu sur la cuisse.

*De la palette, ou rotule du genoil,  
en Grec epigonatis, ou  
myle.*

**V**N os cartilagineux, & rond, situé ex- *Gal. lib.*  
 terieurement, là ou femur est anne- *3. de us.*  
 xé, avec tibia ( à celle fin, que l'article du *par. et de*  
 genoil soit exactement estrait de toute *osibus. c.*  
 part) est nommé la palette, ou rotule du *23.*  
 genoil, en Latin patella, ou rotula genu:  
 en Grec myle, id est, mola: ou selon les  
 autres epigonatis, quasi supra genu. Ceste  
 palette comprend les gibbosités, & com-  
 me tubercules des os subietz: par cauités,  
 ou sinus aptes, & conuenables. Item elle  
 comprend, & embrasse l'espace, qui est vn  
 peu tumide, & enleué entre femur, & ti-  
 bia. Item elle contient toutes les parties  
 anterieures de l'articulation, qui est au ge-  
 noil, prohibant les testes de femur sortir  
 aux parties anterieures: principalement es  
 figures, que les Grecz appellent gyax, id  
 est genu flexo, cestadire, quand on ha le  
 genoil ployé: & oclax, id est genicula-  
 tim, & curué. Item elle est vtile, pour nous  
 garder de cheoir: & principalement es  
 lieux decliues, ou descendans, quand tout  
 nostre corps est incliné au deuant.

*Des os de tibia.*

*Gal. libr.*

*3. de us.*

*part. et de*

*osibus. c.*

*22.*

**E**N toute tibia il y ha deux os, sembla-  
 bles à ceux, que on voit en vlna.

1 Le plus grand est appellé en Grec ene-

me, en Latin tibia, par vn mesme nom, comme tout le membre : Guidon lappelle le grand focile. Lequel est situé en la partie interieure, & auquel femur seulement est annexé, & conioint. Et de la partie, dou il est conioint avec femur, il reçoit les testes de femur se insinuans, & courbans, par vne grande appendice adnascente, & coagmentee ayant en soy deux sinus. Entre ces sinus de tibia, il se esleue vne eminence nerueuse, & cartilagineuse, laquelle est implantee entre les tubercules de femur, comme en vne fêissure profonde.

2. Le moindre est appellé en Grec perone, en Latin fibula : Celsus lappelle sura. Et selon Guidon, le moindre focile. Lequel est situé par dehors : & est fort gresle, & subtil, & beaucoup moindre, que tibia. Et nest pas si estendu, quil puisse toucher au genoil : mais en hault, & en bas, il est allié, & annexé avec tibia, par synarthrosis : & le mylieu est separé l'un de lautre.

*Gal. libr. de ossibus cap. 12.* Les basses parties des apophyses, ou processus de tibia, & de fibula, sont caues interieurement, & gibbeuses exterieurement (comme il appert) & du tout sans chair : aussi elles sont prominentes : cest adire, que elles exceedent, & passent dehors. Les Grecz les

les appellent sphyra, & les Latins malleoli, en François les cheuilles du pied.

*Des os de la partie du pied, soubiacente  
deffoubz tibia : lesquelz os nont nul-  
le partie correspondente en la main.*

**L**A partie du pied soubiacente, ou si- *Gal lib*  
tuee deffoubz tibia, sur laquelle gist *3. de*  
toute la iambe en rectitude, nha pas vn *part.*  
seul nom, comme est tarsus, & pedion: *de ossib*  
ains est composee de trois os, ayans leurs *cap. 24.*  
propres noms. Ausquelz seuls, il ny ha  
nulle partie correspondente, & propor-  
tionale en la main : mais ce sont les instru-  
mens de la seule base, ou fondement. Mais  
toutes les autres particules, cestasçauoir  
tarsus, pedion, & les doigts, sont instru-  
mens de la base, & aussi de l'apprehension.  
Ces trois os de la partie deffusdite, sont  
telz : cestasçauoir,

- 1 Astragalus en Grec, en Latin talus, en  
Arabic caab, vulgairement os balliste:  
cestadire los de l'arbaleste. Il est situé  
deffoubz les apophyses de tibia, & de  
fibula: & est compris par lescites apo-  
phyfes en hault, vers les costès, & vers le  
dos. Item il gist dessus calcaneum : &  
illec est affermé de deux eminences, es  
deux cauités du calcaneum. En la par-

tie posterieure il est lisse, & plein, & vn peu rond: & ha son regard plus en hault. En la partie posterieure, ou il est enleué en vne teste ronde, ayant vn long col, il est conioint avec los nauiforme: & fait vne figure semblable à vne vouste, que nous appellons en Latin fornix, & en Grec psallis. L'action, & oeuvre de la superieure articulation de astragalus, cest destendre, & de fleschir le pied: laquelle articulation est faite aux apophyses de tibia, & fibula: comme dit est. Mais mouuoir le pied dun costé, & dautre, cest l'action, & oeuvre de larticulation de la teste de astragalus: laquelle articulation est à la cauité de los nauiforme. Parquoy le plus principal de tous les os appartenās à mouuoir le pied, cest astragalus.

- 2 Scaphoïdes en Grec, en Latin nauiforme, est conioint avec astragalus. Lequel par sa cauité semblable à vne nef (dont il ha prins le nom) enuironne la teste de astragalus. Et est enleué en lair, semblablement comme astragalus: sa situation est aux parties interieures du pied, vers le poulce.
- 3 Pterne en Grec, en Latin calcaneus, ou os calcis, cest le plus grand de tous les os du pied: & le plus principal de ceux, qui

qui appartiennent à la fermeté, ou firmation du pied. Car directement (quant à sa partie du mylieu) il est situé dessous la rectitude de tibia : & quasi luy seul la soustient toute : & par elle il soustient femur, & par femur tout le corps. Et principalement, quand nous voulons sauter, ou faire vn grand pas. Pour ceste cause il ha esté necessaire, quil fust grad. Sa situation est dessous astragalus, & reçoit les parties rondes de luy : & ses deux excres, ou eminences, quil implante bien commodément en sa cavitè, ou sinus. Mais la partie dequoy nous cheminons, est vn peu ronde, & large. Aussi la partie posterieure est ronde, & excède fort la rectitude de tibia. Quant à ses parties anterieures, celle qui est vis à vis du poulce, gist dessous la teste de talus : & nest coniointe avec autre os. Mais son extremité, laquelle correspond au petit doigt, est coniointe avec los cubiforme, par synarthrosis.

*Des os de tarsus.*

**L**Es os de tarsus sont quatre, correspondans à carpus. *Gal. ibid.*

1 Le plus grand, & externe, touche à terre : lequel est conioint avec calca-

neum, vers le petit doigt. Il se appelle cyboædes, ou cubiforme, ou cubieum, à la similitude dun det; pource quil est quarré.

- 3 Les autres trois sont fort petis, & se eleuent peu à peu: lesquelz nont point de noms. Aucuns les appellent chalcædea. Ilz sont coniointz avec la partie inferieure de los nauiforme, par synarthrosis. Avec lesquelz aussi los dit cyboædes est estendu, vers la partie exterieure.

*Des os de la plante du pied, dite  
en Grec pedion.*

*al. libr. de usu  
ert. Or  
ossibus  
p. 25.* **L**Es os de pedion sont cinq, lesquelz touchent à terre: & sont correspondans à metacarpium.

*Des os des doigts.*

*al. libid.* **C**Hacū doigt du pied ha trois os, que les Latins appellent internodia: à la similitude de ceux, qui sont en la main (excepté le poulce tant seulement) lequel entre les autres, est constitué de deux os. Parquoy tous les os de cinq doigts du pied, seront en nombre quatorze, & non plus.

Or



Or puis que ainsi est, que nous auons  
perscruté, & enquis tout le corps humain,  
depuis le cuyr, iusques aux os, & à la  
moëlle intime : & quil nest loysible de  
poursuyure plus oultre, il est temps de  
faire icy fin. Et si quelque chose ha esté  
omise, ou dite trop brieuement, ou  
avec trop grande prolixité, vne  
autrefois (comme iespere)  
nous la traicterons  
mieux, & plus  
parfaite-  
ment.

\*

F I N .



